



طريقك للصحة

علم نفس






طريقك للحرية

علم نفس


الزهراء درويش





حقوق الطبع والنشر لهذا المصنف محفوظة للمؤلف،
ولا يجوز بأي صورة إعادة النشر الكلي أو الجزئي،
أو نسخه أو تصويره أو ترجمته أو الاقتباس منه،
أو تحويله رقمياً وإتاحته عبر شبكة الإنترنت،
إلا بإذن كتابي مسبق من المؤلف أو الناشر.





إهداء

إلى عزيزة النفس: "رضوى محمد محروس" ولكل قُرَّائي الكرام ولكل فتاة
وسيدة قررت بقوة إرادتها وبقناعتها؛ إنَّها تكسر التابوهات الرجعية
القديمة، وتخلق لنفسها هالة من الفكر المُنير.

لكل الي قدرت تحمي حدودها من بطش المُتَعَجِّرين وعديمي الذوق
وتعرّفهم حدودهم!


لست البنات وست الستات، العظيمة الحرّة الأبيّة الي قدرت -بفضل الله-
إنَّها تقضي على "الست أمينة" الضعيفة الذليلة المُهانة وتقطع نسلها تمامًا؛
لئلا يخرج من رحمها جيل لا يعرف الكرامة!

جيل لا يعرف سوى؛ كيف يسير بجانب الجدران ولو استطاع أن يسير
بداخلها؛ لفعل خوفًا! جيل يدفن رأسه في الرمال كالنعام؛ قضيتُ عليه بين
سطوري!

الكتاب ده إهداء لكل مَن أرادت أن تكتب بخط يدها؛ نهاية "سي السيد"
الزجسي!

طريقك للقوة.. للإرادة.. للنجاح.. للتفرد.. للوعي..
طريقك للحرية..

الزهاء درويش




لا تُحِبِّي أَحَدًا لدرجة أن تتحملي أذاه في سبيل حُبِّك!

لازم في البداية كده تعرفي إن زي ما ليك واجبات وبتعمليلها، فأنت ليك حقوق لازم تاخديها وتطالبى بيها بكل الطرق، يبقى عندك ميزان عطاء تاخدي على قد ما بتدي عشان الكفتين يتساووا، وما ينفعش كفة فيهم تطب! لو خدتي أكثر: تبقي أنانية، لو اديتي أكثر: تبقي ضحية استغلال فظيع، لأن محدش أبداً حيفضل ياخد منك على طول ويحترمك! وده أفضع بمراحل كتير من كفة الأنانية! فلازم تحاولي تساوي الكفتين بذكاء.

وزي ما الي بيدي حيفضل يدي على طول؛ بردو الي بياخد بيفضل ياخد على طول

بس تعالي تخيلي معايا كده نفسك وأنت عمالة تحبي الي حواليك وتهتمي بيهم وتحافى عليهم وتحترمهم وتقديرهم بدون ما تتبادلي نفس الشعور! المخزون الي عندك بيخلص بالتدريج، آه خد من التل يختل.. المثل ده مش في الفلوس بس، حتى المشاعر بتخلص، حبيبي عليك وقت معندكيش حاجة تديها لحد، زهقتي، مليتي، تعبتي، ليه؟؟ عشان منبعك خلص، ليه؟ عشان محدش بيصب فيه! محدش بيسندك، فحتتقي إن عاجلاً أو آجلاً، بتدخل أي علاقة -سواء صداقة، جيرة، خطوبة، أي علاقة ومش بقصد علاقتك بالجنس الآخر بس، أنا كل كلامي في العموم- بتدخل مندفعة أوي وعازية تدي كل الي عندك وتثبتي جدارتك وتحببي الطرف الثاني فيك



وتثبتني حسن نيتك، مش بتدي لنفسك فرصة عشان تشوفي نيته هو إيه!
 طب اصبري، طب ثواني، طب اتقلي، طب.... ولا الهوا... فنتيجة طبيعية
 تكوني السبب في أنايته وأنه ما يفكرش غير في نفسه ومصلحته وبس،
 كل الي همه يحقق الي قال ويوصل لأعلى درجة اهتمام وحب منك
 وووووو.... وتيجي بعد كده تشتكي، عشان العلاقة فشلت، وهي فاشلة
 أصلاً من الأول بس أنت الي بتقاوحي وعمالة تزقي فيها عشان تمشي، هي
 هتمشي آه بس بتعرج، لأن مقومات نجاحها كنت السبب في فقدانها، وأنت
 كنت بكدة متخيلة إنك بتحافظي عليها.. فهارد لاك يا سكر.

قدامك هما حل من الاثنين ما لهمش تالت، يا تفضلي تقاوحي على أمل
 التغيير - في يوم مش حييجي - وإن العلاقة جايز تنجح والشخص ده
 احتمال يبقى أحسن... يا إما تفكري بعقلك وتركني عواطفك على جنب
 عشان حتلبسي في الحيط، وتبصي لنفسك في المراية وتشوفي كنت عاملة
 إزاي وبقيتي إزاي! وآثار الدموع والسهر الي عملت هالات سودا تحت
 عينك وشعرك الي بيقع وجسمك الي بيخس وضوافرك الي بتتكسر
 والأنيميا الي عندك، والتنميل الي في ذراعك الشمال، والقولون الي جالك
 وأنت لسه مادخلتيش العشرين، وصحتك الي بقت نيلة ونفسيته الي
 بتساوي 0


مين السبب؟ وإياك تقولي هما.. أبدأ.. أنت السبب، لو ما كنتيش موطية
 راسك؛ -آسفة يعني - محدش كان حيركب على ضهرك!

شعارنا في الحملة دي (أنتِ بنت ناس) وماتنسيش ده طول الوقت هما مش أحسن منك، أمهم تعبت فيهم وأبوهم صرف عليهم، وأنتِ أهلك جابوك جاهزة من كارفور؟ أنتِ غالية وغالية أوي فماتسمحيش لحد يرخصك..

عايزاكِ تتحرّري تماماً من أغلال حديدية غليظة جداً، اسمها (كلام الناس) لو عرفتي تقفلي ودانك تماماً عن آراءهم وتغمضي عينك عنهم وماتشوفهمش أبداً في أي تصرف بتعمليه؛ هتنبأ لك بنجاح وتفوق في حياتك كلها حقيقي!

كام مرة اترددتي إنك ما تعمليش حاجة معينة لمجرد بس إنك خايفة من الناس الي شايفينك يا ترى هيقولوا عليك إيه؟! وكام مرة ضغطتي على نفسك وكملت في حاجة غصب عنك لمجرد بس عشان تشوفي قيمتك الثمينة في عيون الناس!

كام مرة تصدّقتي مثلاً أو عملي طاعة المفروض إنها لله، لكن عملتيها بس عشان الناس شايفاكِ والناس يقولوا إنك بتعملي طاعات؟ دائماً اعلمي الطاعات ابتغاء مرضاة الله وحده، ماتعمليهاش رياء للناس عشان يقولوا عملي أو ماعملتيش! شيلي الناس خالص من حساباتك.. خلي دائماً وجهتك الأولى والأخيرة؛ هي (ربنا)..



الناس مش هيدخلوك الجنة لو عملت الخير، ولا هيدخلوك النار لو عملت الشر.. دائماً يكون مرجوعك قال الله وقال الرسول فقط (أو حسب دينك) مش كلام الناس..

لو قدرتي تحققي المعادلة دي فعلياً مش بالكلام وخلاص وفعلًا من جواك من جوة قلبك أوي ومن أعماق روحك؛ فعلًا مش فارق معاك كلام الناس؟ هنا بس أقدر أقولك: "حمداً لله على سلامتك.. أصبحت حرة"


وهنا أكيد أنا ما أقصدش النقد البناء، في ناس من حقهم علينا أن احنا نسمع نقدهم البناء فينا، علشان نتطور أكثر ونسعى دائماً للحصول على أفضل نسخة مننا، ولولا نقدهم ده؛ كنا هنفضل واقفين محلك سر مكاننا مش بنتقدم خطوة.. أما النقد الهدام؛ الناس الي ما بتعرفش تعمل طول النهار غير نقد واعتراض للاعتراض وبس! مش عاجبهم أي حاجة بنعملها سواء خير أو شر! طول الوقت حاطين عيونهم (ميكروسكوب) علينا وبينقدونا وبس! وقتها اقفلي ودانك تماماً عن الناس دول.. ده نقد يهدمك ويعطلك ويشتتك عن طريقك الصحيح، مش نقد يطورك.. وطبعاً أنت أكيد فاهمة الفرق بينهم وعارفة مين الناس دول في حياتك!

الحرية.. هي الصدق والشجاعة والوضوح مع نفسك أولاً، لو ما قدرتيش تحقيقهم مع نفسك؛ مش هتعرفي تحقيقهم مع غيرك.

عشان توصلي للسلام النفسي والتصالح مع الذات؛ لازم تتحرّري من كل القيود الي فرضها عليك المجتمع وما أنزل الله بها من سلطان! لو بصيتي لكل العادات والتقاليد؛ هتلاقيها كلها عاهات وتقاليع! بِـدَع! قبل أي تصرف هتعمله وأي كلمة هتقولها وأي مذهب هتعتنقه، وأي فكر هتقتنعي بيه؛ اسألي نفسك: ده كلام ربنا ولا كلام الناس؟! كلام ربنا مفيش جدال فيه، بناخده بننفذه بصدر رحب عشان فرض، ولأننا مقتنعين إنه الخير لينا، حتى لو مفيش منطق فيه، لكن بعدين ربنا بيظهر لنا الحكمة في المنع والعطاء...

كلام الناس معظمه عاري تمامًا من الصحة والمنطق.. ورغم ذلك قوانين صارمة، مطلوب مننا ننفذها بدون نقاش وكأنها أحكام مقدسة من فوق سبع سماوات! لأن للأسف المجتمع ده يخشى كلام الناس كخشية الله أو أشد خشية! ومؤمنين بالعادات والتقاليد أكثر من إيمانهم بالأحكام الشرعية، ومقتنعين بالعيب أكثر بكثير من اقتناعهم بالحرام! وأوقات كثيرة جداً؛ مايكونش التصرف حرام، لكن مش بنعمله عشان عيب! حافظين مش فاهمين، بنكرر كلام وخلاص من غير ما نمّرّه على دماغنا ونفكر فيه!

الحرية بقى؛ هي الفكر.. بتخليك تفكري في أي كلمة هتقولها وأي تصرف هتعمله، ومش هتعملي أي حاجة غير لما تقتنعي بيها (طبعاً الكلام ده لا يشمل أبداً كلام ربنا.. ممكن آه نتناقش فيه عشان نفهمه أكثر، لكن مش




شرط نقتنع بيه لأنه مش حرية شخصية! نتأمل ونتفكر ونبحث لحد ما نؤمن ثم نعمل.. ربنا قال: "الذين آمنوا وعملوا...." فضروري قبل ما نعمل حاجة نكون مؤمنين بيها الأول، لكن كلام ربنا مش هيمشي على هوانا في الآخر.. عموماً قوانين الناس والعادات والتقاليد هي المقصودة بالكلام ده) ما تعمليش أي حاجة غير لما تكوني مقتنعة بيها وتناقشي فيها وتبحثي عنها بنفسك وتأكدي أن الكلام صح، وقتها بس اتصرفي أو ماتصرفيش؛ بضمير مرتاح.. لأن ربنا سبحانه وتعالى هو وِس الي هيحاسبنا في النهاية.. حتى الوالدين مش دورهم يحاسبوا أبناءهم، دورهم رعاية ونصح ودعوة إلى الله بالحكمة والموعظة الحسنة وربنا هيسألهم عن ده، لكن مش دورهم يجبروهم على أي شيء، حتى المذهب الديني مش من حقهم يُكرهوهم عليه! قال تعالى: "لا إكراه في الدين....."

لكل كلمة (لأ) هتقوليه، وأي فعل هترفضيه؛ ده للأسف هيبقى له ضرايب لازم تدفعيها، لكن خلينا مؤمنين إن لازم نخوض حروب؛ عشان نحصل على السلام! مفيش نتيجة مُريحة بنحصل عليها بالراحة أبدًا! وإلا فلماذا أصبحت الدنيا سجن المؤمن؟ بيحرم نفسه من الحرام ويحارب الشهوات ويصوم عن المحرمات، عشان هو مؤمن إن في الآخرة في جنة ونعيم منتظره برحمة الله..

وهكذا.. تمرّدي على الظلم بحكمة، وارفضي الطغيان، وقولي (لأ) بشجاعة بأعلى صوتك في وش كل ظالم، لكن طالما هتعترضي؛ استعدي لجيش من


الحمقى واقف قدامك مُعترض طريقك بيمينك من تحقيق أهدافك،
هتفضلي تقاومي إلى أن تتحرّري وتحصلي على أكثر ما يمكن من السلام
والراحة.. طريقك للحرية مش سهل أبداً، لكن النتيجة تستحق تبذلي
فيها وقت وجهد وكل السُّبُل ودم إن لزم الأمر! الإنسان بيتولد مرة، لكن
ييموت مرّات، المهم ييموت بشرف وعزة نفس وكرامة، لكن مالوش لازمة
لو عاش بإهانة وذل هيكون ميّت مش عايش أصلاً!



شعارنا كان (أنتِ بنت ناس)؟ زودي عليه بقى (أنتِ حرة) وفي فرق بين "الحرية" و"الانحلال والانحراف والتطرف والميوعة وقلة الأدب" فاعرفي كويس أنتِ بتعملي إيه وعازية توصلي لإيه بدون ما تخلطي الأمور ببعضها.. ربنا خلقتك حرة بدون قيود فما تخلقيش أنتِ القيود لنفسك وترجي تشتكي من الخنقة والتحكم والفروض الي ما أنزل الله بها من سلطان! أنتِ حرة يعني تحاولي قدر الإمكان تعملي كل الي عليكي بصدر رحب -مع مراعاة ميزان العطاء الي اتكلمنا عنه- عشان يبقى ليك عين تطالبي بحقوقك بدون ما تحسي بينك وبين نفسك إنك ظالمة.. أنتِ حرة فمش مضطرة تبرري لحد أفعالك ونيّتك وتفكيرك مهما كان مع احترامي لكل! فكري كتيبيير قبل ما تتصرفي واستخيري -واستشيري إن لزم الأمر- يعني الاستشارة مش شرط، طلب النصيحة مش عيب لكن لما تحبي تستشيري؛ ركزي شوفي أنتِ بتختاري مين -حد ناضج وذكي وأفكاره معقولة وعارف هو بيعمل إيه وحافظ لأسرارك وجربتيه قبل كده ونَصِفْكِ، حد مهما يشوف أفكارك مهما كانت غلط؛ يقدر يناقشكِ ويقومك بلُطف بدون ما يحسسك إنه يجبرك على رأيه ولا تنزلي من نظره- لقيتي الحد ده؛ يا بختك وسعدك وهناكِ وربنا بيعتلنا زيه، ما لقتيش؛ يبقى "استفتِ قلبك" احنا كلنا رجال ونساء وأطفال و.... عارفين الصح من الغلط حتى الحيوانات -

أعزّكم الله- عارفين الصح والغلط والحلال والحرام لأنها فطرة، تخيلي كدة قطة دخلت بيتكم على ريحة سمك وأنتم حاطين الأكل فأخذت سمكة، حتعمل إيه؟ حتجري تاكلها بعيد بدون ما حد يشوفها، ولو جدعة أوي يعني؛ حتقسمها هي وعيالها، ليه جريت؟ عشان عارفة إنها غلطانة وسرقت حاجة مش من حقها، تخيلي معايا بقى لو أنتِ الي حطتيلها السمكة دي؛ حتقعد جنبك تاكلها وتنونو وفرحانة وبتمسّح فيك وآخر جمال.


الشاهد في الكلام إنك عارفة الصح من الغلط لكن محتاجة حد يأكذلك إن ده الصح، عشان كده بقولك فكري كويس جداً في أي حاجة قبل ما تعمليلها وما تستهنوش مهما كانت الحاجة دي تافهة -من وجهة نظرك- إن شالله رايحة تشتري فستان، فكري ساعتين يومين أسبوع براحتك محدش بيجري وراكي حتى لو اتباع -لا قدر الله- طبعاً في مواضيع لازم تاخدي فيها قرار سريع جداً، لأن فعلاً ساعتها سيكونوا بيجروا وراك، فأنتِ تعوّدي نفسك في التفكير على مهلك في "الفستان" عشان لما يجيلك موضوع كبير وأكثر أهمية؛ تقدري تاخدي القرار الصح في وقت قياسي، فكري كتييييير ما تملّيش، أحسن بكتير من التسرع والاستعجال الي بييجي بعدهم ندم، وأنتِ في غنى عن لحظة ندم تكّرّهك في نفسك وتحسّسك بمدى غبائك وجلد ذات بقى وبردو الوضع حيبقي كما هو عليه! أنتِ حرة أفكارك، في زمن توريث الأفكار والعاهات والتقاليع!



الي مش مقتنعة بيه؛ اكسري قواعد والقوالب الي حطوك فيها بدون أي وجه حق، وعشان ما تحشيش بالذنب؛ أسألي نفسك واجبني ودوري في الكتب وعلى مواقع النت المضمونة زي إسلام ويب مثلاً، وشوفي رأي العلماء (من الكتاب والسنة) لقيتيه يوافق كلامهم؛ نفذي باقتناع، ما يوافقش؛ اقطعي دائرة الجهل واخرجي منها واقفلها وراك كويس أحسن الجهل بيتسرب وينتشر في الهوا للأجيال الجاية.


أنت ركن مهم في أركان العالم، عمود أساسي في بناء كل بيت، ومش شرط تتجوزي عشان تثبتي جدارتك، في أي بيت..... بيت أبوك/عمك/خالك/أخواتك/..... فأنت مطالبة بتعديل أفكار جيل صغير لسه بيطلع (تاخدي فيهم ثواب عظيم)، وقدامك اختيارين ما لهمش تالت: يا تطلعهم أسوأ بكثير من جيلنا والأجيال الي فاتت لمجرد بس إنك طبقتي منهج العاهات والتقاليد بجذافيره فطلعتي جيل شبهك حافظ مش فاهم والعواقب أنت عارفها وشيفها في شوارعنا.. الخيار الثاني والأخير: تطلعهم مفكرين، ياخذ منك الكلمة يحللها ويفكر فيها قبل ما يقتنع بيها عمياني... ويردو عواقب ده معروفة لكنّها محمودة... والقرار قرارك.

الي فات مش حنقدر نصلحه أوي، لكن يكفيننا شرف المحاولة، لكن الأكيد؛ إن الي جاي حنقدر نتحكم فيه بالعقل والمنطق وحرية الفكر.. وفي حاجات مهما حاولنا نغيرها ونتحكم فيها مش هنقدر على فكرة! فنسيبها لله..



كوني حرة..

ليك جزء ترفيه خاص بيكي (بترسمي/ بتغني/ بترقصي/ بتكتبي/ بتقري/ بتصورني/.....) ده عالمك أنت لوحده، الجزء الخاص بمهاراتك وإبداعك ومواهبك، عبري وطلعي الي جواك مهما كانوا شايفينه هبل وتفاهة ومالوش قيمة؛ اعملي الي أنت شايفاه طالما مابتئذيش حد، فما تديش لحد المساحة أنه يعيش حياته زي ما هو عايز لكن حيعيشك حياتك زي ما هو عايز بردو! هو حر وأنت حرة... محدش أحسن من حد!



البنت/ السيدة العاملة.. بتشتغلي ليه؟ عشان عايزة تثبتي نفسك وتحققي ذاتك وتعتمدي على نفسك مادياً ومعنوياً؟ مجال عملك باختيارك أنت وقناعتك؟ ولا أي شغل وخلص، المهم أنه يحسن من مستواك، ولا عايزة تطلعي من البيت والسلام عشان تريجي دماغك من شغل البيت مثلاً أو تحكمت الأهل واختلاف الآراء الي بينتهي بخناقة؟ ولا بتساعدي جوزك في مصاريف البيت، ولا أنت نفسك محل جوزك وأنتِ الراجل والست؟!


إذا كنتي لسه بنوتة.. حلو أنك تشتغلي لأي سبب كان، المهم ما تكونيش بتهرني من مواجهة حاجة معينة بشغلك ده! وهل ناوية تفضلي عاملة بعد جوازك ولا شغلك مجرد حاجة بتملي وقت فراغ وتفيدني وتستفيد بيه وتكتسبي خبرة منه وخلص؟

إذا كنتي سيدة.. زوجة وأم، أخبارك إيه؟ مختارة شغلك ولا مجبورة عليه عشان ظروف المعيشة؟ حاسة بتقصير بنسبة كام في المية؟ ما هو لازم تكوني مقصرة يا إما في بيتك ومسؤولياتك تجاه زوجك وأولادك (صحتهم، نفسيتهم، غذاءهم، دراستهم.....)، يا إما مقصرة في شغلك - وناجحة في إدارة شؤون بيتك - بتروحي متأخر (وبتزيد الخصومات من راتبك) عشان صاحبة متأخر عشان نايمة بالليل متأخر! كنتي بتجهزي مثلاً أكل ثاني يوم لأنك بترجعي من شغلك هلكانة ومش بتقدري عملي

حاجة وولادك جابين من المدرسة عايزين يتغدوا، بقيتي بتشوفيهم بالصدفة؟ مش طايقة تسمعي الزن بتاعهم عشان الصداق الي سيطر على دماغك من شغل وإرهاق طول النهار!

يا إما مقصرة في الاتنين وده على الأغلب، لأنك كائن ضعيف مهما فكرتي نفسك قوية، المفروض أنك مسؤولة منهم -سواء زوج، أب، أخ، ابن- وأحياناً للضرورة القصوى بيكونوا هما المسؤولين منك، في حالة المرض والكِبَر.... لكن غير كده، تنزلي ليه الشارع وتتعامل مع كل أنواع البشر، ونفسيك بتتغير وبتتأثر بالي بتشوفيه ومش بيعجبك وما بتقدر يش تتكلمي، عشان بس لازم تشتغلي، الحاجة وحشة، صح؟ مين الي حطك في الخانة دي! الشغل مش عيب ولا حرام، لكن بشرط، قادرة تتعامل بمحدود مع الناس بدون اختلاط؟ عارفة تحافظي على نفسك وعليهم من الفتنة؟ عارفة توازني بين واجباتك برة البيت وجوة؟

استوفيتي الشروط دي؟ أوك انزلي اشتغلي وضميرك مرتاح... وأنا وأنت وكلنا متأكدين أنك مش حتقدي توازني لأنك ببساطة؛ أنثى، ليدي، رقيقة.. لكن تقريباً أنت تناسيتي ده عشان تثبتي نفسك، بالعكس أنت نسيتي نفسك! الأدوار اتبدلت! الزوج يرجع من شغله -ده إذا بيشغل يعني- يسخن الأكل أو يطبخه ويأكل الولاد ويقعد معاهم لحد ما الزوج الثاني ييجي! هلكانة تعبانة، تاكلي ويا دوب تغسلي الطبقين ولو قدرتي تذاكري




لأولادك يبقى كتر خيرك، وطبعاً مفيش شقة بتتنصف غير جمعة وسبت
عشان أجازتك

لهجتك اتغيرت، بتتكلمي بالفاظهم عشان تواكبي العصر! أحسن يفتكروك
خاية ويدوسوا عليك! بقيتي مادية، شايفة الدنيا من منظور واحد بس،
فكرة إنك بكده بتهيئي حياة أسعد لأولادك؟ على فكرة هما مش عايزين
فلوس، طلباتهم أبوهم بيحاول قدر الإمكان يوفرها لهم، ولو مش قادر؛ لازم
يرضوا ويقدرّوا الظروف، هما عايزينك أنتِ محواطهم وبتسمعيهم وتربيهم
على الصح والغلط والحلال والحرام، ونسبة كبيرة من الأزواج لما يشوفوا
زوجاتهم بيشتغلوا ببداؤا هما يكسلوا وبالتدريج حيسييلها الدفة كلها
وهي الي تشيل الليلة وتحاسب على المشاريب كلها! كانت بتساعد فضل
منها، فأصبح فرض عليها وبمنتهى الطاعة بقي يطلب منها أكثر وأكثر!
وتستاهل! حد قالها تدفن نفسها بالحيا وتضحى وتلبس توب مش مقاسها؟!
أنتِ راجعي نفسك قبل ما تلاقي المركب بيغرق وأنتِ واقفة تتفرجي! الشغل
مش حرام بدليل أن السيدة خديجة كانت بتشتغل بالتجارة قبل زواجها من
النبي عليه الصلاة والسلام، وأكيد استوفت الشروط.. لكن في الأساس
"وَقَرْنَ فِي بُيُوتِكُنَّ"، أنتِ محتاجة تتمردي على أخطائك قبل ما تتمردي على
الظروف الصعبة المحيطة بيك!

أكبر غلطة ممكن تغلطها في حق نفسك؛ لما تحكي لخطيبك أو جوزك عن علاقتك بخطيبك السابق، ضايقتك إزاي وكنتي بتعامليله إزاي، -الحاجة الوحيدة الي من حقه يسأل عنها هو سبب انفصالكم وتجاوبيه بصراحة، من حقه يعرف ويقرر حيكمل معاكى أو لا- أو حبيبك السابق وكل ماضيكي الي ما يسررش!


زي ما أنت مالكيش حق تسأليه عن ماضيه مع أي واحدة قبلك، وتكتفي بأسلوبه معاكى؛ هو كمان لازم ما يسألش ويحاسبك غير من بداية معرفتك بيه - ده مش مبرر تروحي تغلطي طالما حتداري على الي حيكون جوزك! - فافهمي الكلام صح، وده مش معناه أنك بتكذبي وبتخدعيه، لكن ده معناه أنك عرفتي غلطك الي غلطته في حق نفسك وديس واستغفرتي وتوبتي عليه ونويتي تبدئي حياتك صح، فالي ستره ربك ما تفضحوش أنت، عشان العاقبة سودة أقسم بالله، وحتدخلي في دائرة شك واتهام وتكذيب مهما كنتي صادقة معاه وأنت في غنى عن ده.

ولا تحكي عن سوء معاملة أهللك ليكي، هو خطبك أنت، عايز يتجوزك أنت، مايهموش أي حاجة غير تربيتك ودينك وأخلاقك، ما يخصوش أي حاجة غير كده، لازم تتكلمي كويس على أهللك وبا احترام وحب، تخيلي هو حيحترمهم إزاي وأنت بتحكي أدق تفاصيل حياتكم الي تعتبر أسرار



البيت، أصرار على أي حد غير أهل البيت، حتى لو خطيبك الي كلها كام شهر ويبقى جوزك، أو حتى بعد ما يبقى جوزك! لازم تفهميه إنك دلوعة البيت حتى لو هما لسه عاجنينك علقه مووت! حتلاقيه بيستمّر معاك على نفس المنوال أو على الأقل حيحاول يعمل ده، ويخاف على زعلك، ويعمل لأهلك حساب.. لكن تخيلي عرف طبيعة علاقتك بيهم إذا كانت مضطربة؟ أبسط حاجة حيقولها لنفسه: "إذا كان أهلها الي ربوها وعاشوا معاها سنين بيعاملوها كده، عايزيني أنا أعاملها إزاي!" وحيبقى متأكد إنه مهما عمل فيكي محدش منهم حيدافع عنك ويمنعه لأنه ببساطة كمل مسيرتهم! -طبعاً مش بعمم، في أزواج محترمين بيعرفوا يحتوا الموقف ويفرقوا بين علاقتك بأهلك وعلاقته بيكي، لكن الاحتياط واجب لأن الأغلبية كده- وأنت لالا لازم وحتماً ولا بد تجبريه يعاملك باحترام زي ما أنت بتعامليه، وتعملي لنفسك هيلمان حيساعدك على محافظتك على عرشك يا كوين.

بتغاض أوي لما ألاقى واحدة بتاخذ أوامر من خطيبها ولا لازم تنفذها! زي مثلاً، عايزة تخرج مع صاحبها أو نازلة تعمل شوبنج أو تزور خالتها أو... أو... أمها وأبوها موافقين، لكن تتصل بخطيبها تاخذ إذنه! دي المصيبة بقى! تستأذنيه ليه أصلاً! مش مطلوب منك تقويله أساساً إنك رايحة في مكان، وإذا حصل؛ فأنت بتقوليله كمعلومة يعني، مش عشان يقولك آه أو لا! والمصيبة بقى؛ أنه وارد يقولك لأ ماتروحيش! وأنت طبعاً تسمعي كلامه وتنكدي على نفسك وما تخرجيش، رغم أن أمك وأبوك وافقوا.. نعم؟ لا مجد نعم؟ اللي هو إزاي يعني؟! بأي حق يوافق ولا يرفض؟ يقربلك إيه يعني؟ خطيبك يعني إيه؟ يعني خطيبك مش جوزك، يعني أنت لسه في بيت أبوك مش في بيته! يعني الأمر يرجع لأمك وأبوك مش ليه، يعني بتديله أكبر من حجمه وأكثر من حقه وبتيجي تزعلي عشان مهما بتحاولي تراضيه ما بيرضاش! حيرضى إزاي وأنت حطيتيه في مكان مش بتاعه ولبستيه توب مش مقاسه؟! هل ينفع تاخدي إذن أبوك وأمك وأنت متجوزة؟ جوزك يقولك لأ مثلاً فتتصلي بابا ويقولك ماشي فتسمعي كلام بابا! دي زي دي، فحطي كل حاجة في مكانها الصحيح.




خطيبك يعني مفيش خروج لوحدكم ولا يمस्क إيدك يعديكي الشارع وسيبيه يمسكها يا فوزية ولا الكلام ده! مفيش قعاد مع بعض في أوضة لوحدكم، وبالتالي مفيش سلام بالإيد، ولازم بابا أو ماما أو أخوكي الراشد يقعدوا معاكم، مفيش مكلمات غير لو المايك مفتوح وأهلك سامعين أو على الأقل أنت قاعدة معاهم ومش بتقولوا كلام يكسف! وبالتالي مفيش شات إلا في حدود الأدب وبطريقة رسمية جداً، ده مش كلامي، ده التزام بحدود دينية وأحكام شرعية الي لما فرطنا فيها حصلت المشاكل الي بنشوفها في أغلب العلاقات، سواء الخطوبة اتفسخت، أو كملوا مع بعض لكن اطلقوا!

تخلي خطيبك الي اتكلمتي معاه فون وشات وخرجتوا سوا واتصورتوا ومسك إيدك وووووو... وقالك من كلام الغزل الي يخلي عندك مخزون لسنين قدام، قلتوا كل حاجة، حصل تفريط واستهلاك لمشاعركم، وبعدين سبتوا بعض! طبيعي تتعبي وتنهاري وتكرهي الرجالة كلهم وترفضي أي علاقة تاني وتترهيني! ليه؟ عشان معنديش حاجة تديها للجاي بعده، لأنك كنتي كريمة واتديتيله كل مشاعرك وكلامك الطالع من قلبك! لكن هو عادي سهل يخطب في نفس الشهر عادي ويعمل معاهها زيك وياخد منها أكثر من الي خده منك، ويقارن بينك وبينها ويشوف مين الي بتدي أكثر!

إيه العك ده؟ ولنفرض ما فسختوش واتجوزتوا خلاص؛ هل حتفضلوا تتعاملوا سوا زي ما كنتوا مخطوبين؟ صعب جداً إن ما كاذش مستحيل، لكني حقول صعب عشان ضد التعميم

معظمنا عارف أن الخطوبة يعني مجاملة، يعني نغش بعض عشان نطلع واو مفيناش غلطة ونتمسكن لحد ما نتمكن ونلبس في الحيط بعد الجواز لما نكتشف الحقيقة! أو إنها فترة معينة عشان العروسة تجيب حاجتها والعريس يجهز الشقة، فبالمرة يتخطبوا عشان يحجزوا العروسة رسمي بدل ما حد تاني ياخذها! لو كانت الخطوبة معمولة لكده يبقى بلاها أحسن!

بالشكل ده بعد الجواز مش حيعاملك برومانسية الخطوبة الحلمانة السهانة انسي! لسببين؛ لأنه هو خلاص ضمن وجودك في البيت، يعني حنيته كانت مجرد وسيلة لبلوغ الغاية وهو الجواز من حضرتك! ولأنّ خلاص مشاعركم نفدت في الخطوبة، معندكوش جديد، بقى في روتين ممل واتعودتوا وزهقتوا من بعض فبيحصل صمت وخرس زوجي وبتستمرروا على كده لحد ما يبجي متطوع يفاجئكم أن المدام حامل! فبتفرحوا آمليين أن دي حاجة كويسة حتحصل وتكسر الروتين وتجدد من جو البيت، لكن البيبي يبجي ويشارك معاكم في الروتين نفسه، لكن الفرق؛ بدل ما كان بيتقسم على اتنين، حيبقى بيتقسم على ثلاثة! تعرفوا ليه البيبي مافرقش أوي؟ لأن أبوه وأمه كانوا متطلقين عاطفياً من قبل ما يبجي أصلاً، والمصيبة أنهم لسه عرسان! والكل بيحسدهم على مدى تفاهمهم وسعادتهم! ويفضلوا




ضاغطين على أنفسهم يكملوا مع بعض عشان خاطر العيال! والي اتجوزوا
عن حب بيتساووا بالي اتجوزوا تقليدي!
نتيجة طبيعية للخطوبة الغلط، رغم إنها ممكن جداً تكون نتيجة
لخطوبة شرعية، لكن بنسبة ضئيلة جداً، فاعملوا الي عليكي، واعرفوا
حدودك فين وحدوده هو فين وما تخلطيش الجواز بالخطوبة وما تفرطيش
في مشاعرك ولا تبوحوا بكلام حتندمي عليه بعدين.. خطوبة يعني وعد
بالزواج.. يعني تتعرفوا على بعض بصدق ووضوح وما تستعجلش على خطوة
عقد القران إلا لما تظمني له بنسبة كبيرة ويكون فاضل على الزفاف وقت
قليل..

نداء لأولياء الأمور؛ اعرفوا يعني إيه خطوبة قبل ماتدبسوا عيالكم
وتكونوا سبب خراب بيوتهم وأنتوا مش واخدين بالكم "وكلكم راع
وكلكم مسؤول عن رعيتته"..

ربنا خلقنا مجتمعات، عشان مفيش حد فينا حيعرف يعيش لوحده، فبنتعامل مع بعض وبنصنع علاقات عشان نخفف ضغط الحياة من على بعض، مش عشان نكون احنا ذات نفسنا ضغط عليهم أو هما ضغط علينا!

بنشوف مين أكثر حد شبهنا، أو مختلف عننا شوية بحيث الاختلاف يكون ميزة مش عيب؛ نكون بنكمل بعض، مش في بيننا فرق زي السما والأرض ومفيش بيننا أي نقطة مشتركة ونقاوح ونقول علاقتنا حتنجح! نتيجة العلاقة بتكون باينة من البداية سواء ناجحة أو فاشلة، لكننا احنا اللي بنعمل نفسنا مش واخدين بالنا وبنفضل نتحايل عليها عشان تستمر رغم إنها كان لازم تنتهي من قبل ما تبدأ أصلاً!

ما ينفعش نحاول نغير طباع بعض عشان الي عايز يغير حاجة في نفسه؛ مش حيستناك تدخل في حياته الأول عشان يقرر ده! ممكن يبدأ قبل ما أنت تيجي فأنت تساعدك يستمر، لكن تساعدك يبدأ يتغير لا ما أعتقدش، حتى لو أوهمك أنه وارد يتغير؛ مش حيستمر! وممكن يستمر لكن بنسبة 2٪ مثلاً ودول شواذ القاعدة! ربنا بعزته وجلاله مش هيغير من حد طالما هو رافض التغيير! قال الله تعالى: "إِنَّ اللَّهَ لَا يَغَيِّرُ مَا بَقِيَتْ حَتَّىٰ يَغْيُرُوا مَا بَأَنفُسِهِمْ....."



فطالما قررتي ترتبطي بفلان يبقى أنتِ موافقة بأسلوبه وطريقته وماينفعش بعد كده تيجي تشتكى، بشرط طريقته دي ماتكونش شاملة إهانتك والتقليل منك وتكذيبك والتشكيك في أخلاقك أو إلغاء شخصيتك وحجر على حريتك ويتعدى على خصوصياتك زي باسورد موبايلك أو إيميلك! وتقولي موافقة! وطبعاً لو رفضتي حيتهمك إنك مش واثقة في نفسك وتعملي حاجة من وراه وخايفة منها!


في فرق بين "طبعه" و"احترامك" وما تحاوليش تقنعيني أنه بيعمل كل ده ويحبك! عشان الي زي ده ما بيعرفش يحب حتى نفسه!

أو أنه يعتبرك ملك من أملاكه الخاصة ويأكلك ويشربك ويلبسك على كيفه! أو يحددك حتصاحبي مين وتكليي مين وما تعرفيش مين، ونوع البرامج أو المسلسلات الي تتفرجي عليها، ونوع الكتب والروايات الي تقرأها، وامتي تقفي فونك وامتي لأ! دي أبسط حقوقك تعيشي زي ما كل الناس عايشين، قلنا في البداية احنا كائن اجتماعي، فما تحصرش كل معارفك في شخص واحد، الأول حيبقى بمزاجك وعلى هواي ومبسوطة.. لكن عشان فاهمة غلط! ولما تفهمي الصح؛ حتعرفي إنك قد إيبيبويه مخنوووووة ومالكيش أي حقوق وحطيتي نفسك في دايرته هو وِدس، وفي المقابل؛ هو بيلبس وياكل ويشرب ويصاحب ويخرج براحته تماماً! طيب اشمعنا؟! هو إنسان وأنتِ لأ؟! ربنا كَرّمه وأنتِ لأ؟! ربنا حررنا فماتسمحيش لحد يحبسك جوة سجنه!

علاقة زي دي بتهد مش بتبني، بتضغط على الأعصاب مش بترّج، بتموت بالبطيء، ولازم تنفدي بجلدك وتدوسي على مشاعرك وتقفل حنفية عواطفك وحمافتك شوية! وتفكري بعقلك الي صدّي من الركنة! كفاية خيبة وقلة قيمة والاستغلال باسم الحب! الحب بريء من العلاقة دي!

اسمها قاتل ومقتول، ظالم ومظلوم آه ماشي لكن مش حب، وحتى المظلوم هو ظالم بردو، هو الي ظلم نفسه وأدّى الحق للتاني عشان يظلمه.. محدش عيهينك غير لو أنتِ أهنتي نفسك الأول واتنازلت عن حقوقك فهو طبيعي يفرط فيها.. (الحقوق تُؤخذ ولا تُمنح) محدش هيلايكي بتفرطي في حقوقك وييجي يخبط على كتفك كدة بهدوء ويقولك اتفضلي حقوقك أهي..

علاقة زي دي مايتركيش عليها وماتحافيش مش حتندمي عليه، إذا كان ولا بد من الندم؛ فحتندمي على الوقت المهدور والصحة الي راحت والأعصاب الي باظت والقلب الي اتجرح والمشاعر الي خلصت خلاص، فكفاية هبل وانهي المهزلة دي بقى وفوق لنفسك يا بنت الناس قبل فوات الأوان!



البنات الي ساكنين في بيت عيلة أو لسه حيسكنوا، ماتنسيش حاجة مهمة؛ خدمتك لحماذك وحماكي فضل منك، حاجة كدة بينك وبين ربك، لكن في بعض الأحيان الفضل بيتحول فرض ويبقى حق مكتسب وواجب عليكي وبتتلامي لو قصرقي فيه! المشاكل الي مالهش حل بينك أنتِ وسلفتك ومين عمل أكثر، وقالت وقلنا وووووو كل الرغي ده، وبيتك الي مش بتشوفيه غير وقت النوم وولادك الي مش بتشوفيهم أصلاً غير وقت الأكل، فين اهتمامك بيهم وبأبوهم وبنفسك؟! ده كله كوم، وعدم تقديرِك رغم كل مجهودك ده كوم ثاني خالص!


أنا مش حقولك إيه الي أنتِ عملتيه في نفسك ده! وإزاي رضيتي بالوضع ده، لكن لو لسه ما دخلتيش في المعمة دي؛ إياكي... إيااااكي تصدقي إنك حتسكني في بيت عيلة وتبقي مستقلة في بيتك وتنزلي زيارة وتطلعي شقتك براحتك والكلام الحلو الي بنسمعه في الأول قبل ما نلبس في المحيط ده!

أنتِ مش للخدمة وبس، أنتِ أنثى، أم، حبيبة، عشيقة، صاحب، قبل ما تكوني زوجة، فين دلحك ودلالك عليه.

إزاي حيشوف الطفلة المرحة الي جواكي وأنتِ هلكانة شغل ليل ونهار!
وإيدك بقت أذشف من إيدِه! شغل البيت مايخلصش كده كده، ففوق
لنفسك شوية وفضي وقت تبصي فيه للمراية الي نسييتي شكلها دي!

مش حقولك تعملي إيه، لأن أنتِ أدري واحدة بالي المفروض يتعمل، والي
يناسبني ما يناسبكيش والعكس صحيح، لكن الي أقدر أقولهولك؛
ماتنسيش نفسك في زحمة الحياة ورتم الأيام السريع، اهتمي بنفسك من
أول جمال شعرك وعلاج تقصيفه وهيشانه، لحد تدليك رجليكي بالكريمات
لحد ما تخليلها بيضا وطرية وناعمة زي أقدام الأطفال! ومش اهتمام
بشكلك الخارجي بس، الداخلي كمان، روحك، قلبك، نفسيتك، شوفي كتي
بتلاقي نفسك في أي هواية وكمليها وخلي لنفسك ركن خاص ببيكي تدخل
فيه كل يوم نص ساعة على الأقل تمارسي فيه خصوصيتك بهدوء وتشربي
مشروبك المفضل وتفصلي فيه عن أي ازعاج.. دي مش أناية منك! بل
أناية من الكون كله لما تفضلي عاملة زي الماينة ليل ونهار في سبيل
خدمتهم وإفناء نفسك في سبيل رضاهم وسعادتهم وبردو مش حتلاقيهم
في الآخر سعداء وراضيين!

حطي كل حاجة في مكانها الصحيح، وكفاية تفريط في الي فات، واعملي
ستووووووب وابدئي من جديد، وحطي النقط على الحروف واعرفي فين
واجباتك اعمليلها وفين حقوقك وطالي بيها يا بنت الناس..



بما إننا بنعشق الاستغلال وأي منتج عليه عرض بنروح نشتره حتى لو
مش محتاجينه! وبما أن أي حد لطيف معانا؛ بندوس عليه ونخله يندم
على ذوقه لأننا ببساطة كنا عديمي الذوق معاه!

إذاً "3" نقط فوق بعض؛ لازم ولا بد وحتماً نسرق الناس المُستغلّة دي
ونحطهم في محمية طبيعية ونعمل لهم تماثيل فالصو! ليه بقي؟! عشان في
فرق بين الطيبة والسذاجة وهما اختاروا يبقوا ساذجين ويطمّعوا الخلق
فيهم ويستاهلوا الي يجراهم! حلو أكون بحسّ بالناس وأراقب الموقف من
بعيد وأشوف أيه أحسن رد فعل وأعمله وأحسن التصرف وما أكونش
تقيلة على حد عشان كل واحد فيه الي مكفّيه وزيادة، لكن الي مش حلو
بقي إني ما لقاش حد بيعاملني نفس المعاملة، وأفضل أحسّ بناس فاقدة
نعمة الإحساس أصلاً! يبقى العيب على مين؟! صح عليا، عشان كل
مابديهم؛ ده تصريح مني عشان ياخدوا مني الي هما عايزينه، فلازم أقفل
الحنفية شوية بقي وأجرب أعاملهم بالمثل، مش قلة أصل مني! بس عشان
أعرفهم غلطهم بس، ويعرفوا إني ساكتة بمزاجي ولما بتكلم بخرسهم.. مثلاً
يعني..

ده رد فعل طبيعي لأي بني آدم قرفان من تصرفات الي حواليه، حاجة مهمة
كمان، ماينفّش تكون طهقان وعمّال تغلي منهم ومفيش قدامك حل

غير "الكلام الجاني" كوسيلة لفش الغل! طيب ما تروح تقولهم الكلام ده وتضرب 3 عصافير بحجر واحد؛ منها تفش غلك، ومنها تعرفهم أنك واخذ بالك من تصرفاتهم وفاهم الليلة فياخذوا بالهم المرة الجاية، ومنها يدافعوا عن نفسهم ويصححوا الصورة يمكن أنت الي فاهم غلط!

المهم ما تخليش حاجة في قلبك وطلع أول بأول واعمل جرد يومي، مفيش موقف يضايقك وتسبيه يعدي كده بدون ما تعاتب وتناقش وتفهم صح ولو ليك حق حتاخده..

الزعل المتراكم ده أكثر حاجة بتهد الصحة النفسية والجسدية والعلاقات الاجتماعية والأرصاء الجوية وكل حاجة في الدنيا دية.. آه والله!

وطبعاً محدش بيشيل عن حد، ولا حد يستاهل تحرق دمك وأعصابك عشانه.. والحلو الي جواك هيتلاشى بالتدريج وملاحك تبته وقلبك يتكسر وتفقد الإحساس ووووو..... حاجات كتير أنت في غنى عنها.. فصحتك بالدنيا.. وهو المطلوب إثباته..


مراثة الطاهرة العفيفة الي محافظة عليه، الي تعب عشان يبقى جوزها
وشقي عشان يعمل بيتهم ده وما داقش طعم النوم طول ما هي حامل
وتعبانة أو لما ولدت وأطفاله مسهرينه بصراخهم طول الليل، حسيبها
عشانك؟! أو يخونها معاكي؟ تمام.. متوقعة حسيبك أنتِ الخاينة مقابل
أهه؟!

34

ضهرها! إزاي ربنا حياركلك في حياتك وأنتِ لسه خاربة بيت وفرقتي بين راجل وزوجته، أنتِ شيطانة إنس مش بني آدم ولا تستحي لقب إنسان! مش بشيل اللوم من ع الزوج أبداً، لكن لو كل ست قفلت الباب في وشه؛ مش حياقي غير مراته حلاله وغصب عنه حيحسن من معاملته ليها لأن هي الي باقياله.

وعلى فكرة الزوجة بتبقى حاسة بخيانة زوجها، حتى لو هو اجتهد عشان مايسيبش وراه ولا دليل لإدانتته وعامل احتياطاته؛ بتحس وبتشوف شبحتها واقف بينه وبينها.. وبتحس بيُعبده عنها مهما كان بيحاول يبقى قريب!

أنتِ اخترت زوجتك بكامل قواك العقلية، محدش فرضها عليك بالعافية، ولنفرض أن أهلك مثلاً فرضوها عليك لصلة قرابة أو... أو.... فهي مش ذنبها حاجة، ولا أولادكم ليهم ذنب عشان تعاقب نفسك فيهم بالشكل ده! افرض لأسوأ الظروف حد منهم سمعك بتتكلم معاها، أو شاف شات بينكم كنت نسيت تمسحه، احكي لي عن شكلك قدامهم حيبقى عامل إزاي! حيحترموك إزاي؟! طيب لو ربنا ستر ومحدش عرف، ما هو ربنا عارف وشايف وسامع! حترضى عن نفسك إزاي؟ حتحترم نفسك إزاي؟! حتنام وضميرك مرتاح؟ ولا حتشوف أخطاءك فيها؟ وتعمل إسقاطات عليها وتقلب التراييزة عشان تشيلها هي الليلة وتطلع منها سليم! وتعلق غلطاتك على شماغتها؟ وتشك فيها؟ ومش حتشق فيها لأنك أصلاً مش




واثق في نفسك وأنت بتكذب عليها باستمرار، فبيتهياً لك أنها كمان بتعمل
زيك وبتكذب عليك؟ فطبيعي حتخلق معاها المشاكل عشان تثبت
لنفسك - بالكذب والافتراء - إنها تستحق الخيانة؟!
اتق الله في زوجتك وأولادك عشان كما تدين تُدان، وأنت اتقي الله
عشان الي بتعمله حتدوق منه إن عاجلاً أو آجلاً.

مجمع ذكوري!

يسعى طول الوقت أنه يحصل على حاجات لوحده، هو شايف من منظوره الضيق أن ده حلال عليه وحرام على البنت (أخته، خطيبته، أمه، مراته....) مثلاً.. يصاحب بنات، يحكي لدي، ويرتاح مع دي، ويقول أسرار له لدي، ويحب دي، وفي الآخر يتجوز واحدة خامسة ما لهاش علاقة بكل دول! لكن هو نفسه بردو، يرفض إن البنت تصاحب ولد وتحكي له وتاخذ رأيها! رغم أن البنت بطبيعتها مش متعددة العلاقات زي الشاب، يعني هي هتكتفي بصديق واحد فقط؛ تحكي له وترتاح له وتقوله أسرارها وتحبه وتجاوزة في الآخر! هو مرجعنا زي ما قولنا (قال الله وقال رسول الله..) وهنا ربنا قال (ولا مُتَّخِذَاتِ أَخْدَانٍ) يعني مفيش صحوية أساساً في الشرع.. الحرام حرام على الجنسين! قولاً واحداً.

مثلاً.. التدخين.. معروفة أنه حرام على الجميع وأي شيء مؤذي للإنسان ومؤذي لي حواليه؛ حرام.. فهنا الراجل يحلل لنفسه شرب السجائر والشيشة والبيرة والخمر وعادي دي حرية شخصية، لكن هو نفسه بردو، يشمئز من الست الي بتدخن فقط! ويبصلها باحتقار! والستات كمان يفضلوا يشتموا فيها وفي الي ربوها وإنها قليلة الأدب ومُنحلة وهكذا! ما هو حرام على الجنسين! لا في التقاليد عادي أنه يدخن، لكنها مش عادي



أبداً ولازم تستخبي في الحمام ولا في أي مكان مغلق عشان تعمل نفس الي هو بيعمله على الملاء عادي!

ليه! عشان احنا في مجتمع ذكوري، بيحلل كل حاجة للراجل وبيحرّمها على الست! وما أنزل الله بهذا من سلطان!

مين الي قال إن الراجل من حقه يعمل كل الي هو عايزه، والست لا؟ من أول ما كان طفل وأمه وأبوه وخالاته وعماته وجيرانه وكل المحيطين بيه بيقتنعوه أنه راجل وكل حاجة حقه، رغم أن أخته التوأم ما لهاش أي حقوق ولا تملك صلاحياته لمجرد بس أنها بنت!


لو الاتنين راحوا يستأذنوا مامتهم ينزلوا يلعبوا في الشارع؛ فطبيعي أنها حتوافق للولد بس! عشان هو طبيعي ينزل ويلعب مع أصحابه ويتعرف ع ولاد جيرانهم الجداد ويبقى مدرّج كده وبيعرف يتكلم عشان هو الراجل، أما البنت فمكانها في البيت! تلعب براحتها لكن هنا قدام عنيّا عشان خايفين عليها، عشان لازم يبقى عندها حياء، عشان تتعود أن محدش يشوفها، أصلها غالية وما ينفعش أي حد كده يتكلم معاها في أي وقت!

ده مش تشجيع مني للبنات أنها تنزل تلعب في الشارع من صغرها! لكن زي ما هي لا، يبقى أخوها لا، ولما يتقال لها لا، لازم يبقى في بدائل عن نزولها الشارع! مثلاً توفروا لها ألعاب كتير، تنمو مواهبها، تشتركوا لها في نادي، تودوها عند بنت جارتها الي في سنّها تلعب معاها.... أي بديل

يرضيها وميحسسهاش بالقهر والظلم، مش ممنوع نزول مع أخوكي وممنوع أي بديل ثاني، وهو كده، وورينا حتعملي أيه، وأيوه حنعاقبك عشان أنت بنت وتتكسر رقابتك وما تتكلميش! أنتوا طبعاً مش بتقولوها كده، لكن أفعالكم هي الي بتتكم!

فبتكبر على كده، عندها عقدة وبتقول ليه يا رب محلقتنيش ولد، حتدخل مدرسة حكومي عادي جداً، وأخوها مدرسة خاصة ودروس خصوصية في البيت أو يروح ياخذ درس عند أصحابه، عشان لازم ينجح ويشغل ويبقاه مستقبل عظيم ويتجاوز واحدة من مستواه ويبني بيت، والبنت كده كده حتتجاوز وتقعّد في البيت، فالشهادة مش حتعمل بيها حاجة -رغم أنها حتبقى أم ول لازم تكون متعلمة أحسن تعليم عشان تعرف تربي عيالها وتذاكرهم كويس- والي ماشيين ع النهج ده للأسف بيكتشفوا متأخر أن البنت تعبت وسهرت وذاكرت عشان تثبت نفسها، وأن أخوها فاشل ومصيره قعدة ع القهوة مع المقاطيع أصحابه! الأهل مش يتعظوا بقى ويعترفوا بتقصيرهم تجاه بنتهم ودلعهم لابنهم وأنهم كانوا سبب أساسي في فشله؛ لا.... بيزودوا الطين بلة:

يا حبيبي أنت لازم تتجاوز، ماشي يا ماما دورولي ع شغل وجهزولي الشقة واخطبولي وجوزوني!



آه ما هو لازم يتجوز عشان يعقل ويعرف يتحمل مسؤولية ويبقى راجل
يُعتمد عليه! على أساس عروسته دي حتبقى مركز تأهيل وتهذيب
وإصلاح؟!

وأخته خلصت دراستها ونزلت اشتغلت وبتجهز نفسها عشان تشيل من
على أهلها شوية مسؤوليات، والآية انعكست، هي الي خرجت واشتغلت
واترمطت واتحملت كلام مجتمعها السخيف وضحت باهتمامها بنفسها
مقابل أنها تساعد أهلها، اتمنت تكون ولد من صغرها لكن كبرت وبقت
ب100 راجل! ويا ريته جايب نتيجة، بردو عليها اللوم في أي حاجة
بتعملها


نفسها تحب وتتحب، لالا حرام عييب، كلام الناس، احنا مش عايشين
لوحدا، حرام عليكي، الفضيحة..... وأخوها كلم وعرف بنات أقل من عدد
شعر راسه بشوية! وكل واحدة فيهم واعدتها بالجواز، لكن في الآخر مش
حيتجوز واحدة آمنت له وخرجت معاه وكلمته طول النهار والليل، وأنها زي
ما عاملته كده أكيد حتعمل مع 10 غيره نفس الكلام! فمنتظر أمه تحطب
له! واحدة تصونه في غيابه!

هو يزق ويدشم ويدخن ويسهر ويفشل، ورغم كل العك ده واثقين فيه ثقة
عمياء! وهي من شغلها للبيت ومن بيتها للشغل وكل شوية يتعمل
عليها حملة تفتيش ومراقبة! هي وارد تغلط لأنها إنسانة، ومش قديسة،

جابهوله موبایل أحدث مودیل عشان مايقاش أقل من أصحابه ولما يخرج معاهم يعرفوا يتصلوا بيه في أي مكان، لكن هي لأ وكفاية أنهم سمحوها تستخدم التليفون الأرضي! تبقى تحت عنيتهم وعارفين بتكلم مين وبتقول أبه

سمحوه يسافر شرم أسبوع مع أصحابه في الصيف ودفعوله حق تذاكره ذهاب وعودة وإقامة وخروجات هناك، وهي كفاية عليها بتروح شغلها! على أساس أن دي خروجة كفيلة تقعدها أسبوع في البيت بقى! طيب عايزة تشتري هدموم جديدة، ما تشتري، أو مال أنتِ بتشتغلي ليه؟! طيب حبيب طقمين ب2000 ج، لا انا غاليين أوي كفاية طقم واحد والباقي هاقي حاجة شيلها في جهازك وارحمينا شوية من مصاريفك! يعني ولا عايزنها تجيب ولا عايزن تجيبوها؟! وأخوها رايح يتفصح ويتصرمح ويتكفلوا بمصاريفه من قبل ما يطلب!

ارحموها، وكفاية قهر وظلم، عشان كتر الضغط بيموت الإحساس أو بيولد تَمَرْد، وجهلكم السبب، مشيتوا على نفس طريق أجدادكم في تربية أولادكم ونسيتوا أن الأجيال بتتغير، والي نفع معاكم ماينفعش معاهم!




كفاية تخلقوا نموذج أناني غبي ما بيشوفش غير احتياجاته وبس وطز في أي حد تاني، ما بيشوفش نفسه غلطان مهما عمل، عشان وراه مجتمع عقيم بيشجعه ويبصقفه، أنتِ كأم أو مربية أو... أو.. ما تفرحيش أنك قدرتي عملي منه شخصية. شكلها كده، عشان أنتِ أول واحدة حيطنى عليها، وحييجي عليكي وقت تلاقي نفسك خيفة منه! لأنه بقى عنيف ولازم كلمته تنفذ مقابل أي حاجة، بقى وَخَشَ بمعنى الكلمة وأفعاله مش مُتَوَقَّعة، اعمليله شخصية ويبقى له حرية الرأي زي أخته بس مش بالطريقة دي كفاية قرف بالله عليكم وربوا ولادكم بالعدل وبرّوهم قبل ما تشتكوا أنهم عاقّين! وده مش معناه أنكم تدلّعوهم وتطلّعوهم فاقدين المسؤولية واعتماديين! ربنا حيحاسب البنت والولد والست والراجل، الحساب مش للبنات فقط!

يعني الست الي قايدة صوابها العشرة شمع ومش مقصرة جوة البيت وبرة؛ بتتخان، والمقصرة ومكبرة دماغها؛ بتتخان، الجميلة الرفيعة البيضة المهمة بنفسها؛ بتتخان، السمرا التخينة؛ بتتخان، القصيرة والطويلة، الشقرا، القمحاوية..... مهما عمليتي أيتها المرأة؛ حتتخاني وحيلاقي عشروميت مبرر لخيانته عشان يطلّعك أنتِ الغلطانة وأنه ليه الحق يعمل كده! وأنتِ تستاهلي! لو بتشتغلي؛ حيقولك ما أنتِ مش فضيالي، لو مابتشتغلش حيقولك ما أنتِ مراقباني ومركزة معايا وخنقاني ووووو.....

ما تراقبش جوزك/ خطيبك عشان حتتعي وتتهاري من الي حتشوفيه
ومش حترضي غير بالانفصال لأنك حتفضلي شاكة فيه ومستحيل تثقي
فيه بعد كل الي عرفتيه.. فبلاش أحسن.. طيب نفرض وقعت حاجة قدام
عينك بالصدفة؟ بالصدفة هاهنا؟

تلمّحيْله.. ممم شوفت يا محمود؟ رشا صاحبتى اكتشفت أن جوزها بيكلم بنات ع الفيس وطول الوقت ضحك وهزار ومرقعة ومسخرة وفالح بس يوربها الوش الإسمنت فى البيت وهو ها يص معاها! قلبي عليها، أنا لو منها أطلع عينه وأعمله عاهة مستديمة وأخليه منبوذ كده محدش يعبره غيري وساعتها حنيزه أنا كمان ويستاهل!

طبيب ما اتعطش وعمل احتياطاته وغيرَ بأسورد الموبايل وقعد يسمح في الشات أول بأول، وأنا طبعا عارفك طالما لاقيتي حاجة حتفضلي تراقي وتدعبسي وتزني على خراب عشك! طبيب لاقيتي حاجااااا ومحتاااااات تانية أفزع؟ ونسي يمسخها المرة دي، ما هو طبيعي الا لازم ربنا يكشفه... واجيه بعد ما تعملي حسابك وتجهزي ردود صاااارمة حاااازمة حاااااسمة لكل مبرراته وكذباته: (دي أول مرة) وحياتك عندي - كداب عشان ربنا مايكشفش حد من أول مرة أبداً- (دي زميلتي في الشغل ومفيش أي



حاجة بيننا، دي أخت المدير وبتقرب منها عشان تظبطلي كام سبوبة كده، دي زي أختي، دي بتحاول تلفت نظري وأنا مش مديها ريق، دي زي أمي، دي كانت بتساعدني في كيفية كتابة الـ CV، دي كنت ساعدتها مرة ومصممة تكلمني كل يوم تشكرني وتردلي الجميل! ووووووو.....)

بعد ما تواجهيه خدي موقف جامد ما فهوش نقاش، اقلبي الترابيزة على دماغه، ماتبقيش أنتِ قايمة بكل واجباتك وشايلة الليلة كلها وهو ييجي من برة تعبان يا كل وينام ما يتكلمش معاك نص كلمة ، وسابق الهبل والعبط مع غيرك برة وضحك وهى ومى! قولنا قبل كده لازم توازني ميزان العطاء وزى ما بتدي؛ تاخدي ودي أبسط حقوقك.

وأنت سيادتك شغال مُساعد ومصلح اجتماعي برة البيت وسايبها هي تصلح الحنفية وتغير الأنوبة وتشيل البيت فوق دماغها! صح ما هو الغلط عليها مش عليك! ما هي لو مشيلاك مسؤولية كل صغيرة وكبيرة ومشاركاك في أدق التفاصيل؛ مش حتلاقي وقت تتصرمح فيه مع غيرها.. فاشغلي جوزك بيك وبعيالك يا حلوة وماتسيبلهوش دقيقة يلتفت وراه، يا إما تلوحيله راسه دي وتخرميله عينيه وساعتها حيبقى منبوذ بردو ومش حيلاقى غيرك تعبّره بمجد!

طيب الموضوع أطور مع كام واحدة وهو مش بيتعظ لأنه ذكر شرقي جامد أوي وما بيتهددش وشايف أن زعلك مش حياثر معاه، لأنك حتضعفي


ويومين وحتنّني لأنه اتعود منك على رد فعل سلبي وبترجع ريمة لعادتها القديمة!

اتطور معاهم وبقي في تبادل صور وغزل صريح وكلام سافل وأفلام زفت ومواعيد ومقابلات! نعم بقي مستنية أيه؟ لما يدخل عليك بيهم؟ طريقي الدنيا فوق دماغه، صرخي وكسري واتجنني ولمي الناس عليه، مش حيهون عليك تفضحيه صح ده عشرة عمر، لكن هو هان عليه كل حاجة عادي وكده كده حيعرف يطلع منها بردو لأن كل المجتمع حيقف معاه ضدك لأن دي مجرد نزوة وربنا حيهديه، أو تحمدي ربك أنه بيلف يلف ويرجع ينام جنبك! أو يتهموك بالتقصير ويبرروله عملته السوداء!

مش حقولك غير حاجة واحدة بس:


لو كل واحدة شافت ده بعنيها - وقبلها شهور طبعاً حاسة بس ما كانش عندها دليل - وساكتة عشان ماتخريش بيتها ولازم تتنازل وتطاطي للريح لحد ما تعدي والكلام الخايب ده؛ حيقى مصيرك أنت والي زيك جلطة وشلل سداسي وخرس وبلاوي زرقا وتبقي تستاهليهم وتستاهلي أكثر من كده كمان وحتساعدي في استمرار قلة أدبه، وبكدة بتشجعي كل حيوان بيعمل كده وبتخلقي نوع رابع لسه ما استقروش على اسمه وتصنيفه!

زي ما الحلال حلال على الست والراجل، الحرام حرام على الـ 2 بردو، ربنا مش حيحاسبها لوحدها، رغم أن نفس المجتمع الي وقف معاك ضدها



وقال دي نزوة؛ هو نفسه الي حيقف ضدها معاك ويقول دي خاينة وزانية
 وووووو أنت نفسك مش حترضي ولا تقبل مجرد تفكيرك في أنها وارد
 تجرب وتعمل زيك، ده مش معناه أن الستات كلها مخلصات (لا) وقولنا قبل
 كدة الراجل لما بيخون بيخون مع ست مش مع راجل ، أنت نفسك مش
 حتبقي واثق فيها حتى لو هي مخلصه 100٪ لأنك أصلاً مش واثق في
 نفسك ومعترف بينك وبين نفسك أنك خاين، حتفضل دماغك تودي
 وتحيب وتتخيل أنها بتعمل زيك! نظام حياتك كله حيتقلب.. فليه بقي؟
 وترجعوا تقولوا الست زنت على خراب بيتها؟ على أساس أنه بعد عمايله
 السوووودة دي كلها ما كانش بيخرب البيت بالتدريج! أو على أساس إنها
 حتعرف كل... ده وتفضل محافظة على بناء البيت الشامخ!
 بطلوا عك أرجوكم وخليكم مُنصفين للحق، وكفاية تنصحو الست
 تسكت وترضى بالـعك ده! لا يا حبيبتى ما تسكتيش، ده ظلم ارفضيه
 واتمردي عشان ربنا حرّم الظلم على نفسه فما تبقيش أنت بتقبليه على
 نفسك! ورزقك على ربنا مش عليه هو، اعتبريه مات حتعملي إيه؟ خاين
 يغور في ألف داهية ما تعيشيش معاه، وما تقوليش عشان خاطر عيالي!
 عيالك أول ناس مش حيسامحوك لما يكبروا في خناقاتكم دي ويعرفوا
 أنك شيطانة خرسه وساكته عن حقك، ده غير أنهم يا إما حيطلعوا زيك
 شياطين خُرس، يا إما حيطلعوا زي أبوهم خَوَنَة! وفي الحاليتين حيبقوا
 مُشوّهين نفسياً وحببقوا جثث منتشرة تعيث في الأرض الفساد!

لو كل ست وقفت وقفة صح وخذت موقف جامد؛ الحَوَنَّةُ التانيين حيفكروا
ألف مرة قبل ما يستمروا على كده، عشان نهايتهم حتبقى زي نهاية
المخلوع بسلامته، أنتِ بكده مش بتحافظي على بيتك لوحذك، بل
بتحافظي على بيوت أخواتك كتير.. وعلى رأي المثل "اضربي المربوط يخاف
السايب!"



تخينة جداً ومكبظة؟ رفيعة أوي ومعضمة؟ طويلة جداً وبتعاني عشان
هدومك قصيرة عليك مثلاً؟ رجلك كبيرة وبتفصلي جزمك عشان
مابتلاقيش مقاسك؟ رجلك صغيرة أوي وبتجبي جزمك من محلات
الأطفال؟ شعرك مجعد؟ بشرتك سمرا؟ عندك نمش؟ بطنك كبيرة ومش
مناسبة لشكل جسمك؟ أهلك سموك نفيسة وفتكات وأم هاشم والمجتمع
كله بيتريق عليك؟! نظرك ضعيف، عندك نسبة حَوْل، بتتكسفي تلبسي
نضارتك قدام حد؟ عندك تأتأة وبتتخرجي تتكلمي مع الناس؟ عندك رُهاب
اجتماعي؟ عندك عيوب الدنيا والآخرة وحابسة نفسك في قُقم ومش
عارفة تواجهي الناس وبطّلت تروحي أفراح وعزومات وأعياد واحتفالات!

استووووب بقي تعاليلي هنا، أنتِ وهي واسمعي كويس..

مجتمعك عقيم صح؟ آه صح، بيهمه المظاهر والماركات وسطحي جداً، عارفين
كل ده أوك، وعارفين بردو أن الغلط مش يبقي على الفاعل قد ما يبقي على
المفعول به، لأنه ساكت وراضي وخايف من فعله فبيشجعه يعمل اللي هو
عايزه ويتمادي فيه

فبطلي تشجيعهم على السطحية، إلسي وكي واخرجي وعيشي حياتك
طبيعية، لكن قبل ده كله:

حِـيَّ يَـنْفِـسِـك


زي ماهي

لو عايزة ترتبطي بحد اقبليله على عيبه، وخديه باكيدج كده على بعضه..
لكن الأولى إنك تقبلي نفسك وتقتنعي أوي بكل تفصيـلة فيك، فيك عيب معين؟ شيلي من قاموسك أصلاً كلمة عيب دي، ثقي في نفسك وحي نفسك زي ما هي، عايزة تطورها للأفضل؟ حلو بس بشرط: يكون ده طالع من جواك ومن قناعتك أنتِ، مش عشان فلانة قالتلك خسي شكلك وحش! لأن طول ما أنتِ مش مقتنعة بحاجة عمرك ما حتعملها صح وعمرك ما حتستمر عليـها وعمرك ما حتقنعي الي حواليك بيها!

بطلي تسمعي من حد خصوصاً النقد الهدام! آراء الناس فيك؛ أنتِ ما طلبتيهاش منهم، فلما يتطوعوا ويقولوك عليها؛ ابتسي بثقة واضحكي ضحكة عالية كده وقولي أنا عاجبني شكي كده، محدش طلب رأيك يا طنط ويا ريت تحتفظي بيه لنفسك وتحطي مناخيرك في وشك مش في حياتي!

ما تديش لحد الفرصة يتدخل في خصوصياتك واتخاذ قراراتك وطريقة تفكيرك، زي ما هما أحرار وما بيرضوش يدخلوا حد في تفاصيل حياتهم! هما عندهم حياة خاصة وأنتِ عندك كيلو بامية يعني؟!

احرجيهم بأدب أو بدون وعادي جداً ولا تعكري مزاجك ولا يومك يتقفل ولا تدخل في دور اكتئاب ولا حاجة، ده مش حيحصل طبعاً من يوم



وليلة! ده محتاج تدريب قدام المراية أو تسجلي فيديو غسل كده وتقولي فيه كل الي جواك وتفرجي على السوبر ستار العسلية دي..

عقلك الباطن زي ما بيستجيب بالتفكير السلبي وبيحققك كل المصايب الي خوفي منها؛ بردو بيستجيب بالتفكير الإيجابي وبيعكس قناعاته على عقلك الواعي فبينعكس على تصرفاتك وبتبقى جزء لا يتجزأ من شخصيتك تلقائياً بالتدريب..

فيها إيه لما تقفي قدام المراية وتعاكسي نفسك وتحديلها بوسة في الهوا كده؟ وربنا ما فيها حاجة!

لو ما دلّعتيش نفسك واهتميتي بيها وصدّقتها واقتنعتي بيها؛ مستنية مين يعمل ده؟!

اتعاملي مع كل (ديفوه) فيك عادي كأنه مش موجود، لأن تفكيرك طول الوقت فيه بيخليك مسجونة جواه وبتلفتي الأنظار أكثر ليه، فليه بقي؟ واجهي نفسك واتحديها وحاربي كل عدو بياكل راسك!


بتضايقي من قُصرِكَ وبتلبسي كعب؟ بطلي تشتري كعب نهائي واتعاملي معاه عادي جداً وشوفي الموضوع من نظرة تانية، إن مثلاً الكعب ضار للظهر وبيساعد على انحنائه، بيكعبلك وكل شوية تقعي، الشوز الأرضي أخف وأريح..... وهكذا، اعملي الي يريحك أنتِ مش الي يرضي عيون الناس لأن مهما عانيتي؛ مش حيرضوا

بطي تحطي مكياچ أوووفّر وتمشي تنوّري في الضلّمة عشان شكلك وحش بدونه، عشان الناس مش حتحبك غير عروسة مولد! أنتِ مش ناقصة عشان تكلمي بالميك آب، ومش الروج والكحل والبرفيوم هما الي حيعملوك قيمة! طيب لو مش فارق معاكِ كلام الناس؛ بتحطيهم وأنتِ خارجة ليه؟ ما تحطيهم في البيت عشان أنتِ عايزة تشوفي نفسك كده

حد من أهلك مات؟ الله يرحمه، لابسة أسود ليه؟ عشان حزينه، طيب بتلبسي هدوم بيتك سودة بردو؟ لا! مممم أنتِ بتحزني وأنتِ خارجة بس؟ بتحزني للناس؟ عشان ما يقولوش يا عيب الشوم خارجة بألوان واسمه إيه لسه ميت ما كملش سنتين! كفاية أرجوك، افرحي لنفسك وازعلي لنفسك وشيليهم من دماغك واعتبريهم مش موجودين أصلاً!

اخرجي من دايرة أفكارهم السطحية الغبية دي، خليههم يخاطبوا عقلك وأفكارك مش شكلك ولبسك وألوانك ورموشك الي بتركبيها بصعوبة فبتقع منك ويبقى شكلك يصرع!

لو حبيتي نفسك مجد؛ كل مشاكلك حتتحل، ماتقريش الكلام وتمشي وخلص، طبّقيه لو عايزة فعلاً تتمردى على العقم والجهل الي بقينا عايشين فيه وساكتين! ومش آسفة لو قولتلك إنك أنتِ السبب في المعاناة دي بصمتك.. حتعيشي مرة واحدة، انطقي، اعترضي، عيشي لنفسك، محدش حيعبّرَكَ لو وقعتي، أنتِ عكازك.



"الرجال قوامون على النساء"

يعني إيه قوامة؟

*يعني تربية؛ عشان لما تكون راجل متربي حتعرف تعاملها بأخلاق
وتخلفوا جيل سوي، متربي، صالح، يقدرُوا يتعاملوا مع زوجاتهم بأخلاق
ويربوا عيالهم فيما بعد وهكذا...

*يعني شخصية قوية عادلة؛ ولأزم القوة ترتبط بالعدل، عشان لو بالباطل
والظلم؛ مش حتبقى قوة، بل حتبقى فسوق وعنف وعجرفة وبلطجة
ولسان وإيد طوال وقلة أدب.

*يعني شخصية قيادية مُحَقَّقة؛ عشان لما هي تمشي وراك تروح الجنة، مش
تلبس في الحيط أو تاخذ القطر بالحضن

*يعني تعرف يعني إيه بنت/ ست؛ يعني طفلة مهما كبرت وبقت جدة،
وبأسلوبك أنت لوحديك؛ حتحدد معاملتها معاك، وشكل ملامحها وأسلوبها
عموماً.. عايزها تفضل طفلة طول عمرها لحد ما تموت في حضنك، ولا
عايزها تبقى عجوزة وهي لسه في العشرين!

*يعني حضن... احتواء وحنية وحبّ وعطف، ونقاش بهدوء.

*يعني أمان؛ ودي لازم تكون نقطة لوحدها مش في وسط الكلام لأهميتها..

لازم تحس معاك بالأمان، تهرب من كل الدنيا ووجع القلب ليك أنت، تجري من الكل وتستخبي فيك أنت، عشان أنت سندها وضهرها الي بتحميها وبتتحمل مسؤوليتها ومش بتحملها فوق طاقتها

لو اتطمنت وحست بالأمان؛ حطيعك وتفرضلك أرضك ورد، حتبقي بتتفنن في إسعادك، حتخلي بالها من كلامها عشان ما تضايقش منها، لما ترعلك حتعتذر عشان حتخاف تكون سبب في عمل فجوة بينكم، الخلاصة: حتحبك بجد..

*يعني عقل؛ لما ييجوا ولدين يتخانقوا مثلاً.. بنروح نتفاهم مع أكبرهم ونعقله كدة ونعرفه إزاي يتعامل مع الصغير وبنقوله: "أنت الكبير" فالكبير طول عمرنا عارفين أنه مش بسنه، بل بتصرفاته ونضجه ورجاحة عقله وحكمته وحسن تديره، فلو أنت الكبير بسنك وما بتعملش ده؛ تبقي هي الكبيرة يا معلم

وده مش أنت الي تقوله وتعترف بيه! لا... شهادتك ف نفسك مجروحة يا حلوا! أسمع الكلام ده منها وهي في كامل قواها العقلية وبدون ضغط منك.. أيوااا كده عشان نبقي على نور، عشان ما تبقاش مطلع عين أبوها وتيجي تقول أنا ما بظلمهاش ومعيشها أحسن عيشة ويا ريت الرجالة كلهم زي! *يعني تصرف عليها وعلى ولادك وتكفي طلباتها على حسب الأولويات والتافه ماتجهوش، وتقنعها انه تافه بالنقاش الهادي، مش بمنعها منه بالعافية وبخناقة كبيرة! وعلى فكرة وارد جداً تكون أنت لوحدهك شايفه

طيب شوف بند المصاريف جه فين؟ آااااخر حااااجة، عشان ما تتفشخرش وتتفرد وتتني وتمد كرشك قدامك وتحط رجل على رجل وتقول: أنا بصرف عليها من جنيه لألف! عشان الألف جنيه دي ما بقتش تجيب حاجة أصلاً.. قصدي يعني ما تشوفش من القوامة الي يناسب هواك، وخذها على بعضها باكيد چ كده.

فاسترجل واشرب بيريل قبل ما تيحي تتشّدق بحقك في القوامة أو تتطالب بحقوقك في التعدد، طبّقوا كل الفروض والسنن النبوية الأول وبعدين عددوا على زوجاتكم! مابتعرفوش من الحلال غير التعدد والقوامة الي بردو فاهمينهم غلط! (وحتكم عن التعدد في حلقة لوحده)..

وأخيراً.. القوامة؛ يعني تبدأ أنت بكل ده، وتقوم بواجباتك قبل ما تطلب حقوقك، ساعتها حتلاقيها بتعاملك بمنتهى الحبّ، عشان فعلاً من قلبها بتحريك بجد، مش عشان ده واجب وتأديّه!

وَأَتَّحِدُ!!!!!! كَ لو عملت ده كله ولقيتها لسه بتنكد عليك؛ وساعتها يبقى لك الكلام.. رغم إني متأكدة أنه مستحيل حعاملها كده ومش حتبادلك نفس المعاملة.. دى فطرة وغير كده يبقى شواذ..!

الزوج/ الخطيب/ الأب/ الأخ..... - أياً كانت علاقته بك.. طالما إنك
مسؤولة منه- مطلوب منه يقف جنبك ويساعدك على تحقيق هدفك، إن
شاء الله يشجعك بكلمة طيبة - ده أضعف الإيمان- طيب مش عايز
تشجعها، كسلان تساعدنا، صعبان عليك تتحمل جزء بسيط من
مسؤوليتها؛ خلاص ماتحبطهاش! ده أقل حاجة يعني!
لكن لا.. ما يهدالكش بالال إلا لما توقف مراكبها السائرة وتثبتها
وتحبطها وتكسر مجاديفها!

أشبه الرجال في النقطة دي بينقسموا لقسمين:

* يحبطك وش كده، بدون لف ودوران

* يفهمك إنه بيساعدك وحيقف جنبك، لكن هو بينه وبين نفسه ناوي
يدمرّك، ورجلك اللي أنت واقفة عليها دي؛ حيكسر هالك! وده النرجسي
الخفي الخبيث بقى، على الأقل النوع الأول كان واضح وصريح!

الهدف من ده واحد مالوش تاني؛ مش عايزك تكوني أحسن منه، أو سابقاه
خطوات، أو ناجحة وليك كياناتك المستقل، عايزك تفضلي ماشية وراه،
محتاجاله، واقفة في ضله، عشان يفضل سبع الرجال المسيطر وما تجيش أمه
أو أخته أو أي حد من معارفه يشاور عليك ويقول: "شوفوا بقت فين وهو
فين؟"!

مثلاً: أنا حساعدِك، لازم تكلمي دراستك وتشتغلي وتنجحي ووووو....
وتلاقيه بيعزملك أهله وأصحابه كل يوم! طيب وأنتِ حتلاقي وقت تنجحي
فيه امتي وفين وإزاي يعني؟! وبدل ما يساعدك في الكركبة الي عملها لك
دي؛ يدخل ينام ويسيبك تغسلي مواعين الوليمة لوحذك! بصي هو غالبا
حينام دلوقتي ويقوم يساعدك على نجاحك بكرة الصبح!


ده مش معناه إني بشجع المرأة العاملة! ولا إنك تمنعي حملك عشان دراستك ونجاحك... ده مجرد مثال للزوج الي من النوع ده، الي بيتحجج ويحطيك العراقيل في طريقك وبعدين يقولك "أنتِ اتكعبتي ليه"؟!

وهكذا.... يوعدك بكلام أفلام وتلاقيه بعمل عكسه تماماً، لحد ما يوصلك في الآخر صورة "إنه عمل الي عليه وزيادة" لكن الحُمل ده رزق من عند ربنا، حنعترض يعني؟!

النوع ده محتاجة تتعاملي معاه بساطور وتفكري دايمًا بعمق في أفعاله وتعرفي المغزى منها إيه، وتبينيله إنك كشفاه وابقى قابليني لو اتعدل!

أنتِ محتاجة تكسري البرواز وتطلعي من الصورة دي، وتحاري كل الظروف الي بتقيدك وتوصلي لي أنتِ عايزاه، بّطي تعتمدي على مساعدة حد، اعتمدي على ربنا ثم قدراتك و(.) واقفلي السطر.. مش هو من الأول مرتبط بيك وهو عارف إنك عندك أهداف بتحقيقها وكان موافق على ده؟

جاي يعترض ليه دلوقتي؟! اثبتى على مبدئك يرحمك الله.



كل "ذكر" يتعامل مع أنثاه بعنف، سواء يمد إيده عليها، أو يتعصب عليها، يشتمها.... حكون خصيمه يوم الدين وحطلب من الحَكَم العدل القصاص منه!

عشان كل ما بشوف أو بسمع عن المشاهد دي؛ بتتذي نفسيًا وبحط نفسي مكانهن وبحس بأوجاعهن كأنها أوجاعي تمامًا.. وحقتص منها هي كمان، عشان سابتك تعمل كده وضِيعت حقها واستسلمت بحجة الرضا! وضِيعت نفسها وأولادها، لا هما حيسامحوها ولا أنا مسامحاه، وتعتبر شريكة في الجريمة دي لسكوتها واستمرارها في غَزْل ثوب الذل بإيديها!

شدي الحيط، انقضي غزلك، اقطعي دائرة الخطر وكفاية جهل عايشة فيه! من أول مرة صوته يعلى عليك أو يكلمك بأسلوب مايعجبكيش؛ ارفض، ووقفي المهزلة دي، خدي موقف لآدميتك وثورى لكرامتك.. حيحاول على قد ما يقدر ما تبقاش في مرة ثانية، حيخاف رد فعلك، حيبقى متأكد أن رد فعلك في الثانية حيبقى أقوى بكتييير من الأولى، ده لو يفهم يعني! مش حتستنيه لما يشتم ويمد إيده! وبردو كتييير بتوصلوا للمرحلة دي وما بتاخدوش أي موقف! ده اللي بيجرأهم عليك.. وتستاهلوا...


هو بيعس نبضك.. ويمد إيده على سبيل الهزار ويضربك ضربة خفيفة على كتفك كده ويشوفك هتعملي إيه؟ عديتها وكأنه معملش حاجة؟

هيتمادى! المرة دي كانت بهزار لكن والله المرة الجاية هتكون بجدد..
 عديتها هي كمان؟ حمداً لله على سلامتك أنت كده وصلتي القاع ودخلتي
 بير التنازلات! لو عَنَّفِكَ ولقائك ماشية زي ما أنتِ وعائشة عادي وزعلتي
 شوية ولما رضاك بكلمتين كذب؛ خلاص دوستي ع الزرار وفرميتي الي
 عمله، واتصالحتي، وكأن زفت لم يكن!! مُتخيلاه حيعاملك إزاي بعد
 كده؟ تخيلتي؟! تمام...

بطلي هبل وسذاجة بقى وفوقي لنفسك، ربنا كَرَمَك، مين هو عشان
 يهينك؟! وقولنا قبل كده أن التنازل زي السبحة، حتقع منها حباية؛
 حتنفطر كل الحبات، والي بتتنازل مرة؛ بتتنازل مليون مليون مرة... أصله
 مبدأ!

أنتِ ذات نفسك مش حتسامحي نفسك عشان صبرتي وتحملتني شخص
 عمره ما حيتغير، وحتيجي بعد كده تشتمني نفسك وتلغني سذاجتك ألف
 مرة، بس وقتها حتبقي خلاص انتهيتي فعلياً والي اتكسر منك ومنها مش
 حيتصلح مهما اعتذروا! ده إذا اعتذروا يعني! أو هيعتذروا ويعيطوا دموع
 التماسيح.. معروفة يعني عشان الدنيا تمشي وتتصالح.. لكن فعلاً الطبع
 ما بيتغيرش!

اصحي من الغيبوبة دي قبل فوات الأوان، عشان ربنا حيسألك رضىتي
 بالظلم ليه، زي ما حيسأله ظلمتها ليه...
 جاهزين للإجابة؟



كثير من الشباب يبلِّغوا على كل أنحاء الكوكب ويدوروا في كل المدارات ويعملوا علاقات مع كل البنات الي في المجرة بتاعتنا والمجرات المجاورة وييقوا فاهمين أنهم كده رؤشين طحن ومقطعين السمكة وديلها وأنهم كده أحسن بكتييير ما يبقوا حمادة وعيل توتو خام لا يفقه شيئاً في قاموس البنات.

المصيبة أنهم بيبقوا خيبة بردو وما بيعرفوش يتفاهموا مع الجنس اللطيف، أو ربنا يوقع حظهم مع بنت ما بتحبش الواد المدرح! الصنف ده لما ييجي يتجوز بقي وينوي يستقر ويستقل ويكمل نص دينه؛ بيخلي الست الوالدة تدور له على (بنت حلال) أو (بنت ناس) أو (بنت طنط عطيات) أو (بنت خالتو فتكات) المهم أنها على حد قولها: تكون بنت متربية، خام، ما تعرفش تروح ولا تيجي وتغرق في شبر مية، وتتوه لو راحت جابت طلب من آخر الشارع، تكون جميلة جمال مالوش مثال، وعنيها ما بتترفعش من الأرض مهما كان السبب، وصوتها ما بيتسمعش مهما كنتوا قريبين منها، ما تعرفش من قاموس الكلام غير 3 كلمات: حاضر/ طيب/ نعم.

مش بتتكلم، مش بتعترض، مش بتتناقش، مش بتشتكي
ناوية تصبر، عايزة تعيش، قادرة تتحمل، غاوية تربي عيال وتستقر

بالنسبة له دي مواصفات عروسة لُقْطَة، لكن بالنسبة لي عروسة ماريونيت!

مالهاش كيان، مالهاش وجود، مالهاش شخصية، مالهاش لازمة! أمه بتختارها له كده لأنها عارفة ابنها كويس وهي أدري بتربيتها.. وهو بيتعمد يختارها كده عشان يعرف يفرض سيطرته عليها، إكمنه ضعيف فعائز له واحدة أضعف منه عشان يمارس ضعفه عليها ويقول عليه "قوة" و "رجولة" وهو أبعد ما يكون عنهما.. لكن عشان يظهر قدام أهله وأصحابه في صورة سُبُع الشَّداد وسيد الرجال..!

وهو موهوم ومخدوع ومعرفش مين فَهَّمَهُ إنه كده حيعيش حياة زوجية سعيدة ناجحة مستقرّة! وأنهم بكده حيعيشوا في تبات ونبات ويخلفوا عيال كتير كلهم حيقوا سعداء بردو والفراشات والعصافير حيطيروا حوالهم ويعملوا شكل قلب كبير متحاوط بفيونكة بمبي!


واحدة فكرها محدود، خبرتها صفر، مهما كان مستوى تعليمها؛ في أساسيات أي علاقة ناجحة ما تعرفش عنها حاجة أو فاشلة حتى! معندهاش وعي في أي بتنجان في الحياة، أهلها مفهّمينها أن الجواز معناه مسؤولية بيت وطبخ وغسيل وتنظيف وعلاقة حميمة وشكراً ومش مطلوب منها غير كده عشان جوزها يحبها! جتك ستين نيلة عليك وعليهم!

غصب عَنَّاكَ حتندم.. حيبجي عليك وقت محتاج تفضفض لها عشان تسمعك وتطيّب خاطرك وتحتويك، حتكون محتاج

حتلتفت حواليك تدوّر على كل ده فيها ومش حتلاقي، عشان أنت السبب في اختيارك ليها من الأول، أو بمعنى أدق: موافقتك العمياء على اختيار الست الوالدة، حييجي عليك وقت وتكرهها هي كمان عشان سلبية ووافقت عليك بدون ما تعرف الفرق العظيم بين قدراتكم، حتكره أمك عشان ربّتك تبقى أناني وما كانش عندها وقت تعلمك إزاي تبقى راجل قادر تختار وتتحمّل نتيجة اختيارك مهما كانت، هي كمان حتكره نفسها لما تشوفك قد إيه تعيس في حياتك وعائش مُبهم، خيال مآة، شكل هُلامي مالوش ملامح، جثة بتمشي على رجلين! وبضحكوا على نفسكوا أنتوا الـ2 ومش قادرين تواجهاوا بعض، وبتهربوا من نظرات بعض عشان إحساسكم ما بتفضحش!

62

يصحش! لازم الذكر الشرقي الي جواك يطلع ويطغى عليك وطبعه يغلب
وأنت تلبس في الحيط بعد كده.
والعكس صحيح! نفس الكلام للبنات الي بتتعمد تختار زوج أضعف
شخصية منها، لنفس الأسباب المذكورة أعلاه..
حييجي عليك وقت محتاجة راجل جنبك يبقى سندك يحملك من نفسه
ومن نفسك، ومش حتلاقيه!
اتقوا الله واختاروا صح، عشان بينكم أولاد ضحية حيتداسوا بسبب
أنايتكم وتفكيركم في راحتكم وفس، ويا ريت حترتاحوا أصلاً..!



إياك والارتباط بشخص شكّاك!

الشك صفة موروثة أحياناً ومُكتسبة أحياناً وفي الحالتين ستكون طبع صعب جداً التخلي عنها! يعني ما تفكريش أنه عشان بيحبك ويعرف يعاملك كما يجب؛ أنه مش حيّشك فيك! مهما كنتي صادقة معاه ويثق فيك؛ لازم تيجي عليه لحظات حيّشك.. عشان ده طبعه الي مش حيتنازل عنه ولو حتى عشانك أنت!


والشك هنا يعني (شك) مش (غيرة)، وأعتقد كلكم عارفين الفرق بينهما طيب لو صفة موروثة؟ طبقاً لچينات أمه أو أبوه أو جده....؛ خلاص عرفنا سببها، طيب لو مُكتسبة إيه أسبابها؟
الآتي:

1* الكذب.. يكذب كتييييير، طول الوقت، 24 ساعة كذب، يكذب بمنتهى الصدق، من كُتر ما هو مُخلص ودقيق في كذباته؛ محدش يقدر يكشفه! فطبيعي مش بيثق في نفسه؛ لأنّه عارف ومتأكد أنه معجون بمية كذب، ودمه يحتوي على كُرات حمرا وكُرات بيضا وكذب، وبالتالي مش بيثق في أي مخلوق مين ما كان -حتى أمه الي ممكن جداً يطلق مراته عشانها؛ وارد جداً يشكك في أخلاقها ويّتهمها بالباطل - مش بيثق في أي حد لأنه مُتخيّل أن كل الناس زيّه مُخادعين وكذابين!

2* الخيانة.. مثلاً: كان يعرف بنات سلوكهم مش تمام، فحيشوفهم في ملاحك، ويعاملك كأنك واحدة منهم لمجرد بس أن في بينكم حاجة مشتركة وهي (النوع)! فيتعامل بمبدأ التعميم، يَشْكُ فيكم بالجملة، عشان كلكم دايرين على حلّ شعورك! أو مثلاً، هو خانك وأنتِ على ذمته، فحيفضل يراقبك ويفتّش في أدق خصوصياتك ويتخيّل إنك اكتشفتي خيانتَه فتعامليه بالمثل وبترديله الجَمِيل!

حيشوف جرائمه فيك، ويعلّق أخطاءه عليك، ومش شرط تكوني أثرتي شكوكه بأفعالك المُرِية! حتلاقيه بيشك فيك من باب الاحتياط! حيوتّرِك، حيلقّفك حوالين نفسك، لدرجة أنه حيلخّليك تفقدي الثقة في نفسك، لأنك طوووول الوقت محطوطة في خانة الاتهام! مهما أقسمت بالله وقدمتِ براهين صدقك؛ مش حيصدق غير شكّه! واحد زي ده حيعيِّشك في جحيم، الحياة معاه موت مش حياة، والاستمرار على قيده؛ دمار شامل بالفعل.

أتمنى أن ربنا يرزقك الفراسة والحدس القوي والذكاء الكافي لكشف الصفة الذميمة دي قبل أي ارتباط رسمي، وتبقي حمقاء مجد لو اكتشفتيها فيه وكملي معاه على أمل أنه يتغير! أو تكوني أصلاً من الأول مش عارفة الفرق بين الشك المدمر والغيرة الحميدة الي بتحافظ على الود وتزيد الحب!



بص يابن الناس ..

يالي بتقول أنا مهما عملت لها وتعبت عشان هي تستريح، وحرمت نفسي من الغطا عشان تستغطي ومن العشا عشان تستعشى وبردو ماييطمرش فيها، كده كده مش حصدك عشان ماتعودتش أسمع من طرف واحد ولو إدناها الإذن تتكلم حتقول عنك بلااااوي أنت مش حتعترف بيها، عشان مش حتدين نفسك طبعاً يعني.. المهم؛ مستحيل تكون حتعاملها كويس وتحس معاك بالراحة والهدوء والاستقرار النفسي والأمان، وتنكد عليك... خدها قاعدة في حياتك... النفس جُبِلَتْ بالفطرة على ود مَن يحترمها ويقدرها وحُب مَن يُشعرها بالأمان.. ١+١=٢.. طبعاً لكل قاعدة شواذ، لكن السائد كده، فما تستنصحش بقي وتقول إن مراتك الوحيدة في الشارع بتاعكم الي طلعت من شواذ القاعدة وبتنكر جمايلك الي مغرقاها من ساسها لراسها!

حتعاملك بالمثل معظم الوقت، وتكون تصرفاتها مجرد ردود أفعال لأفعالك.. تصرفاتها هي انعكاس لمراية أسلوبك وطبعاً البادي أظلم...

لكن أقول إيه.. كلمة حفظتها وبسَمَّعوها طوووول الوقت "الزوجة المصرية نكدية"! ما هو الزوج المصري هو السبب وهو المتحكم الأساسي في دراع فرامل النكد جوة البيت


حواء مش مجنونة وبتتخاف مع دبان وشها يعني، أنت زعلتها؛ طبيعي حترعل

ضايقتها؛ أكيد حتاخد منك موقف.. أهنتها؛ رد فعل سليم جداً إنها تقلب التراييزة فوق دماغك.. عصبتها؛ لازم تتعصب هي مش آلة باردة.. استفزتها؛ حتفقد أعصابها وتصرخ وتكسر وتجب عالها واطيها.. هي كائن زيك بردو يعيش ويتعايش ويتأثر بالظروف البيئية المحيطة بيه.. فإنت الي بتحدد طريقة معاملتها معاك وبالتالي؛ امتداداً للكلام ده: دلعتها؛ حتحس بأنوثتها وتستعيد رونقها ورقتها وتعاملك معاملة صاحبك الليدي الدلوعة..

عاملتها بجنية واحترمت ضعف تكوينها ورقة جدار قلبها وعواطفها؛ حتعرف إزاي تخلق جو مرح وضحك ورومانسية في البيت.

احترمت ذكاءها وحدها وإحساسها وشكوكها؛ حتشيلك تاج فوق راسها وتحطك كحل جوة عينيها، عملت غير كدة؛ حتعييك وتستاهل!

سيدنا محمد "عليه الصلاة والسلام" ما قالش عليها نكدية عشان كل ما تتوجع بتعيط! ما قالش بسكوية، ما قالش كيكة نايتي، قال "قارورة" رفقا



بالقوارير... ليه؟ عشان لو ضغطت عليها زيادة عن قدرتها على التحمل؛

حتتكسر! ما لهاش خيار تاني

وكله بما قدمت يداك.. يا تحافظ عليها وتصون رقتها وتظهر بريقها، يا إما تهملها وتوجعها وتكسرهما! والي بيتكسر فيها ما بيتصلحش لأ! بيفضل مكسور ومعلّم جواها، وكل كسر بيحصل لها؛ بيّموت فيها حاجة بدون ما أنت تشعر، لكن كسر على كسر على كسر؛ بيخليها جثة متحركة! والفضل يرجعلك!

والمكسور؛ بيجرح.. ما بيتصلحش لأ!


لو كل واحد فيكم أنتوا الاتنين كان حريص أنه يقوم بواجباته كاملة قبل ما يطالب بحقوقه؛ والله ما كنا حنشوف نسب الطلاق وخراب البيوت المربعة دي

وكله في إيدك يا آدم، باعتبارك أنت الي بتطالب بحقك دايمًا في القوامة، - وشرحتها بالتفصيل قبل كده- ف تحت بند القوامة دي بقى؛ إنك تبدأ بالخير وشوف هي حتعمل إيه

وأأحـداك.. لو عملت ده كله وهي لسه زي ما هي، وقتها أنا الي حجوزك مثنى وثلاث ورباع!

سبحان الله ربنا خلق الست دي من قوة مدهشة فعلاً؛ تديها شوية خيط ما لهمش ملامح، تلاقيها غزلت لك منهم كوفية تدفي قلبك! تديها شوية

مكونات غذائية ما لهمش علاقة ببعض، تلاقيها حطت بصمتها وطبختلك
أشهى أكلة! تديها نطفة منك، تلاقيها بفضل الله ورحمته وحكمته حافظت
عليها جوة رحمها 9 شهور، وأكلت كويس وتابعت مع دكتورتها والتزمت
بتعليماتها لحد ما جابتلك أحلى طفل شبه ملامحك وشبه شخصيتها! تديها
أي غرفة مكركة؛ هتلاقيها قامت رتبته وظبطتها وخليتها مكان هادي
ونضيف صالح للاستخدام الآدمي وزرعت لك فيه ورد كمان! هي كده..
هتديها أي حاجة ما لهاش قيمة.. هي هتحولها لحاجة تانية خالص لكن
ليها قيم غالية وعالية جداً.. وده الي خلى ربنا يقول عنها إن السكن عندها
مش عندك أنت.. عشان الفطرة الطبيعية السليمة إنها تحوّل التوتر والقلق
والخوف وكل المشاعر السلبية؛ لحب وحنان ودفع وهدوء واستقرار.. ده
الطبيعي.. فمالناش دعوة بشواذ القاعدة بردوا!



ما تنفخيش في إربة مقطوعة!

دائماً بقول إن محاولة الحفاظ على العلاقة -من جهة واحدة- : مشروع فاشل

كأنه حب من طرف واحد، والطرف الثاني جاحد

عُمر المركب ما حتمشي غير وهي بتعرج، أو حتغرق!

تلاقي نفسك بتتعامل بأقصى معاملة، مفيش اهتمام، مفيش أدب واحترام
لكيانك، مفيش ثقة في تصرفاتك، مفيش تقدير لأي حاجة بتعملها مهما
كانت قيمتها، مفيش معاملة بالمثل على الأقل -رغم إن ده أبسط حقوقك-


إحساسك بالفجوة الي بين قلوبكم بتكبر يوم بعد يوم، وبعد كل موقف
يحصل بينكم، والحاجز الي بين عاطفتك ونضجك؛ وصل لسقف الجيران،
ما بقاش في بينكم أي نقطة متشابهة ولا أي فكرة مشتركة، وحاسة إن
مش هو ده الي عرفتيه وحببتيه من الأول.. كأنه اتبدل تماماً وبقي واحد

غيره ما تعرفيهوش، وخلاص العلاقة بينكم وصلت لطريق سد

وأنت الي بردو عمالة تقاوي وتحايلي على الظروف عشان مركبتك تسبح
كيلو متر زيادة! بتحاولي تطولي عُمرها على قد ما بتقدري رغم إنك متأكدة
أن عمرها مهما طال؛ حتموت حتماً، لكن بتقاوي عشان بس نفسك

الطريق يكمل لآخره حتى لو وصل لنهاية غير الي أنتِ منتظراها؛ لكن بتقولي في قلبك "أهو أحسن من مفيش"! لأ معلش بقى "مفيش أحسن"! بتنعشي قلب علاقتكم المصاب، عشان خايفة يموت وتضطري تبدئي حياتك في علاقة تانية ليها قلب جديد، وتقولي لنفسك: "الي أعرفه أحسن م الي ما عرفوش"! لأ معلش.. الي ما تعرفيهوش وحيحترمك ويحافظ عليك زي ما أنتِ بتحافظي عليه بالظبط؛ أحسن بكتير من الي تعرفيه وما بيعملش كده، الي أنتِ أصلاً لسه مكتشفة فوق دلوقتي (إنك ما كنتيش تعرفيه كويس وبقي واحد تاني واتخذعتي فيه!)

فاكرة إنك كده شاطرة وأصيلة ومش حتسيبيه يضيع من إيدك عشان تبقي أنتِ الأفضل والأشجع والأجمل؟! طيب مافكرتيش هو شايفك إزاي؟ شايفك محلصة وأصيلة ولا شايفك مُغفلة غبية مش فاهمة رسالته الي بيقولك فيها "ابعدي عني" وتستاهلي الي يجراك بقى؟! ما سألتيش نفسك ليه أنتِ بس الي بتحاولي؟ ليه أنتِ الي فارق معاكِ القصة تكمل، وهو مش فارق معاه؟ ولا سألتني نفسك ولقيتي إجابة مش جاية على هواك؟! خايفة من شماتة الأعداء فيك! طيب آراء الناس كانت امتي فادتك عشان تفيدك دلوقتي؟! محدش بيعس بالنار غير الي لامسها فعلاً! طيب حتفضلي لحد امتي بتحاربي لوحذك في ميدان فاضي؟ وتدافعي عن قضية خسرانة؟! رغم أن كل الأفكار المنطقية المحيطة بيك؛ أجمعت واتفقت أنك غلطانة وماشية في الطريق الخطأ... وأنتِ بردو مصممة على



خطئك وبتجاهلي كل النصائح وصوت ضميرك والإشارات الربانية الي
بتتخط في طريقك عشان تنتبهي وترجي ما تكمليش، وأنتِ عاملة
نفسك مش شايفها!

ما تنفخيش في إربة مقطوعة عشان روحك حتروح على الفاضي ونفّسك
حيتقطع وياريته بفايدة، لأ.. حتفضلي زي ما أنتِ بتنفخي، وحيفضل زي
ما هو واحد غريب!

إن ما كانش هو ماشي معاك في نفس الطريق وبيساعدك على تقوية الحبل
الموصول بينكم؛ يبقى بلاها أحسن! ما هو لو مش ماشي في نفس اتجاهك؛
حيبقى ييمشي في عكسه، وكل ما أنتِ فاكرة إنك بتقرّبي؛ في المقابل
حيكون هو يبعد، وعمركم ما حتتقابلوا في نقطة واحدة


فوقي لنفسك وما تكمليش، عشان الي مشيوا الطريق قبلك؛ سابوا
نصيحتهم على لافتة كبيرة في أول طريقك، وأنتِ شوفتيها لكن ما
صدقتيش وقولتي "أجرب بنفسي أحسن"!

ده مجرد مثال لأي حد يحاول من طرفه هو ومش لاقى أي مساعدة من
الطرف الثاني، مش شرط بين الراجل والست.. أي علاقة عموماً لو حتى بين
اتنين أصحاب..

خلونا نقول الي لينا والي علينا.. يعني فعلاً (معظمنا) طبعنا مُحَيَّر
 أَنْتِ مزاجية جداً، يمكن بسبب تغيير هرموناتك، يمكن بسبب حد
 مضايقتك، أو حاسة بملل عشان أَنْتِ فاضية ما بتعمليلش أيتها حاجة، أو
 صاحبك اشترت فستان زي بتاعك بالصدفة البحتة، أو صباع رجلك
 الصغير اتعور بسبب جزمته الجديدة، أو بدون سبب أصلاً؛ -قمتي من
 نومك النهارده اكتأبتِ على سبيل الاحتياط- مين عارف، مش يمكن
 يحصل موقف يدخلك في مود اكتئاب؟ فهو تستعدي له بردوا! أو أَنْتِ
 بطبيعتك شخصية حساسة جداً وأقل موقف بيأثر عليكِ سواء سلباً أو
 إيجاباً..

تزعلي مثلاً.. بيحاول يراضيك بأي طريقة، وَأَنْتِ في المقابل؛ ما بتراضيش،
 زعلانة من حد وما عاتبتيش، ييجي يقولك مالك؟ تقولي مفيش!
 ليه تضغطي على نفسك طيب! ما تقولي كل الي جَوَّاكِ دُغري بدون إنكار،
 بدون ألغاز، بدون ما تحكي قصة طويلة وعريضة عشان يطّلع منها المغزى
 والدرس المُستَفاد!

حيجرالك إيه لو لاحظ عليكِ توتر -ده لو لاحظ يعني- وسألك: في إيه؟
 مالك اتغيرتي مرة واحدة كده؟ وجاوبتي على طول؟ حيجرالك إيه بمجد؟!



مش يمكن لما تقوليله بسرعة؛ الأمر يتحل فوراً بدون ما يسبلك أي آثار جانبية؟ أو تقلب الخروجة بخناقة!
سؤال صريح؛ يلزمه جواب صريح..
= مالك؟

- الجزمة ضيقة روح وسعها لي..
لو مرضاش بقي؛ خدي جزمته وسيبيه يمشي حافي، أو يروح لأقرب جزمجي يعمل جزمته شبشب على مقاسه! كده وش بدون عياط يا ماما الموضوع سهل جداً..

- يلا نروح ناكل.. ماجوعتيش بقي؟
- يلا أنا حموت من الجوع.. أو ممكن أنتِ الي تلفتي نظره عادي جداً بدون ما تحسي بحرج، أنتِ إنسانة وارد تجوعي وتعطشي في أي وقت زيه تماماً، مش عايشة بالطاقة الشمسية أنتِ يعني.. لكن ليه بقي تضيّعي على نفسك فرصة إشباع كرشك لمجرد إنك اتخرجتي تكوني صريحة معاه! مثلاً:
- يلا نروح ناكل.. ماجوعتيش بقي؟

- لا.. أنا لسه واكله من شوية!
وهو طبعاً أخذ منك جواب واضح والمفروض أنه صريح - لكن ما صدّق وسابك بدون أكل بحجة إنك لسه واكله - وأنتِ فضلتِ طول وقت المشوار جعانة وهبطانة ودايخة.. وأحسن تستاهلي وابقِي خلي إتيكيتك وبرستيچك ينفعوك! والمصيبة بقي إنك زعلتي أنه ما طلبش منك تاني تروحوا تاكلوا

ووصفتيه أنه بخيل مثلاً! الله! ما أنتِ الي قولتي عكس إحساسك، هو مطلوب منه يفتح المندل ولا يقرأ كفك ولا يشم على ظهر قفاك عشان يعرف إنك محرجة تروحي تاكلي!

جنس آدم ما بيعرفش يقرأ الخط الهيروغليفي بتاعنا ده، بيحتاج رسالة تتبعت له واضحة بدون شفرات عشان يقدر يستقبلها، إنما فك رموز حجر رشيد ده مالوش فيه، غلطك إنك بتعامليله على إنه أختك مثلاً أو واحدة صاحبتك أو مامتك الي حيفهموها وهي طيارة.. لا هو مش كده، عشان ببساطة هو آدم وأنتِ وهي.. وهي.. وهي.. (حواء) ولازم تفهمني حدود الاختلاف بين الاثنين عشان تعيشي مرتاحة وترجيحيه الراحة الأبدية! فهو مش غلطان، وبالتالي أنتِ مالكيش حق تزعلي

تزعلي إمتى؟ لما تديله جواب واضح على سؤاله وهو طنش

- يلا نروح ناكل.. ماجوعتيش بقي؟؟


- يلا أنا حموت من الجوع

- لا استحملي، كلها نص ساعة وتكوني في بيتك ابقِي كُلي من عمايل إيدين

حماتي العزيزة

ده يبقى بخيل إيببيدحة وجلدة ووقتها حلال تشنكليه يقع يتكسر صف سنانه العلوي (وأهو يثتاهل، هو الي جابه لنفته).


أنتِ يا آدم بقي قدامك حل من الـ3:



1* إما تلفت نظرها للنقطة دي وتعرفها كلامها بيوصل لك إزاي عشان تتكلم بوضوح أكثر بعد كده (وده الحل الأمثل الي حيحيب معاك من الآخر)

2* تحاول تركز في كلامها وتفهم الكلمات الي اتقالت والي بين السطور ما اتقالتش وتعاملها على أساس إنك هيرو الخارق (وده حل حاول تستبعده عشان ده حيجلطك ويجلطها ويجلطني أنا شخصياً)

3* هي مالهش غير الحلين دول أصلاً، وصرفوا أموركم بعيد عني بقى! لا بجد بقى.. الوضوح هو أقصر وأصدق الطرق للوصول للحل ولعلاقة ارتباطية قوية.. التراكمات سيئة جداً وبتهدم مابتبنيش والحياة مش مستاهلة إننا نزودها على بعض!



الأقل لحد ما تخرجي لمدرسة ثانية.. ما بالك بقي ده حد حتعيشي معاه أكثر ما عيشتي مع أهلك، يومك معاه 24 ساعة مش 17!

فلازم معرفتك بيه تكون شاملة مش سطحية، لازم يحصل بينكم "نقاش" بكل أشكاله: بهدوء، استفزاز، خناقات، مصالحات، لحد ما تبان لك شخصيته بكل جوانبها، تشوفيه وهو بيضحك، وهو متضايق، وهو رايق، وهو متعكن ومتعصب وعفاريت الدنيا بتتنطط في وشه...

اللقاء الأول مش كافي طبعاً عشان كل ده يظهر، ولا الثاني ولا الثالث.. لكن كل لقاء حيظهر لك جزء منه وبالتدريج حيظهرلك على الأقل ثلاث أرباع طباعه على الأكثر أو نصها على الأقل... المهم إنك ما تقوليش حكتب كتابي غير لما تحصلي النص على الأقل يعني..

يبقى في تكافؤ بينكم -مش المستوى المادي لكن المستوى الفكري- رغم أن التكافؤ الأول مطلوب لكنه مش مهم زي الثاني

بيفكر إزاي؟ بيتعامل إزاي في وجود المشكلة؟ إزاي بيلاقيها حل؟ عصبي ومتهور ويقلب الترابيزة؟ ولا حكيم وحليم وبيتمهل في إصدار قراراته؟ بيتواجد أصلاً ولا ييهرب ويسيبك أنت تحتاسي لحد ما تعرفي تتصرفي؟! آراؤه من دماغه ولا بياخد أوامر من أمه وأبوه وأخواته؟

من الآخر؛ راجل ولا لا؟!


ركزي أوي في الحديث ده: قال رسول الله صلى الله عليه وسلم: "تخيروا لنطفكم فإن العرق دساس"

ما قالش تخيروا ليكم، لا؛ لنطفكم (الأولادكم) يعني تقبليله أب لأولادك قبل ما تقبليله زوج ليكي

عشان شوفتيه بيتحمل المسؤولية، يُعتمد عليه، رؤوف بأولاد جيرانه وأخواته، بيتعامل إزاي مع الأضعف والأفقر والأكبر والأصغر منه... مثلاً... (وأنتِ وشطارتك في ملاحظته أو جمع المعلومات دي عنه)

تكون مميزاته واضحة، وعيوبه مش باينة من كتر ما هي عادية وسهل التعايش معاها، مش مطلوب منك تنتظري لحد ما تلاقي راجل خالي من العيوب! لأنك بكده حتموتي عزباء وعمرك 99 سنة، ولا مطلوب منك تطمحي بحياة لونها بينك ومافهاش مشاكل وزوج يجيبلك الفطار على السرير يومياً، لكن بردو مش حتوافقي بواحد مابيصليش وكداب وشكّاك وعديم الشخصية ومُدخن ونسوانجي ونصاب وترمي نفسك في التهلكة وترجعي تقولي أنا مش بدور على حد خالي من العيوب! عيوب عن عيوب تفرق..

في فرق بين (العيوب) و(الكوارث)! عيوب سهل تتقبلها وتعايشي معاها: نَمَام مثلاً وبيطلع أسرار بيته لأصحابه أو بيت أبوه وعادي عنده أن أهله يعرفوا عنه كل حاجة عشان هما باختصار -مش أغراب- دول أهله يعني ومش حيحسدوه وحيحبوله الخير ولا حيتمنوله الشر.. عيب فظيع طبعاً ووارد جداً يعمل بينكم مشاكل توصل للانفصال لا قدر الله، وممكن جداً تحاولي تفهميه وتقنعيه أن حقك يكونلك حياتك الخاصة - مش أسرار



بس ما تخصص حد غيركم أنتم الـ2- لكن وارد بردو أنه يكون ده طبعه وما يغروش فتتقبله وتتعايشي معاه -عشان مليون مميزات وحاجات كتبيير بتحبها فيه- ف دي بتشيل دي والدنيا بتمشي، وفي الأصل أنتِ حبيتي أهله وهما حبّوك وبكده ما بقيتش النقطة دي فيها خلاف أصلاً.. فكدّه الحمد لله متفقين.

مثلاً يكون شخص بيتوتي - بيحب قاعدة البيت ويفضّلها على الخروج - وفي المقابل أنتِ مدمنة شوبنج ومناسبات وتمشية بعد المغرب وسهرات ووووو... ده بالنسبة لك عيب خطير طبعاً وحتعملي معاه مشاكل كتير عشان يبطله، ممكن يبجي على نفسه ويخرج معاكِ مرة كل سنة وممكن يفضل على وضعه واضري راسك في راس جارتك مالوش دعوة هو... لحد ما تتأقلمي وطبعاً مش حتخري بيتك عشان مش عايز يخرج معاكِ وبسيسيك تروحي لما متك لوحدك! - مجرد مثال -

لكن كارثة لما يبقى كذاب مثلاً؛ عمرك ما حتثقي فيه لأنك عارفة أنه بيكذب في معظم كلامه، حتى لما تصادف ويقول الحقيقة؛ تبقي في حيرة وبردو مش قادرة تثقي فيه لأنه عودك على الكذب، ولا هو حتى حيثق فيك ويصدقك، -مهما كنتي صادقة- لأنه ما بيثقش في نفسه ولا يصدق نفسه، حيصدقك أنتِ إزاي؟ حيفتكرك زي كل الناس كدابة زيه! كل كلامك حيكون في محل شك لحد ما يتحرى عنه ويحجب أدلة وبراهين


ويصدقك وتخرجي أخيراً من دائرة الاتهام! ما تتخيليش ده بيبيني حواجز بينكم قد إيه؟ وللأسف بتوصل للكُره - بالتدريج -

طيب إيه معنى العِرق دسّاس؟ تعرفي العدوى؟ هي بالظبط كده.. أخلاق زوجك بتتنقل لأولادكم وطبعاً أخلاقك أنتِ كمان، وهو من حقه طبعاً يتحرى عنك ويختبرك بردو قبل الزواج.... علمياً: سموها (جينات وراثية)، وبالأمثال الشعبية: سموها (من شابه أباه فما ظلم)

أخلاقه مهما كانت - حتتقسّم على الولاد كلهم، فهل توافقي تعيشي مع نسخة مُصعّرة من زوجك؟ مهما تعبتي في تربيتهم وتوجيههم؛ حاجات معينة حيورثوها من أبوهم ومش حتطلع منهم إلا مع طلوع الروح - بعد عمر طويل -

من حق أولادك عليكِ إنك تختاريلهم أب يليق بيهم ويحسن معاملتهم، فاختاري صح عشان خاطرهم قبل خاطرك..

الاختيار الصح بيخلق بينكم انسجام رهيب وتناغم في كل حاجة أو معظم تعاملكم مع بعض.. بيبقى في ود واحترام حتى لو في الهزار أو الخصام.. مفيش إهانات وتدمير للعلاقة سواء لوحدهم أو قصاد الولاد! الاختيار الصح بيظمن ويريج الطرفين.. وهو نصيب في الأول والآخر.. لكن أهو بناخد بالأسباب ونعمل الي علينا.. وفي النهاية ده قدر ورزق فعلاً.. ووارد جداً بعد ما نجتهد في الاختيار الصح يطلع نصيبنا مش على




هوانا خالص.. وقتها بيكون ابتلاء بقى يا نصبر عليه ونحاول نعدل وننقذ ما يمكن إنقاذه بشرط يكون هو كمان مؤمن بالعيب ده ويساعدك تساعديه يتخلص منه للحفاظ على العلاقة... يا إما خلاص الانفصال هو الحل.. ونحمد ربنا وقتها أنه حل الطلاق.. على الأقل نعرف نسيب بعض واحنا بنحترم بعض وبنود بعض وولادنا بيشوفوا تعاملنا راقى فنفسياتهم تبقى مستقرة حتى بعض الطلاق.. لكن يا فرحتي لما أخاف من الطلاق عشان كلام الناس ولا عشان خاطر الولاد! والولاد أنفسهم مصلحتهم هتكون في الطلاق.. على الأقل مش كل شوية هنتخايق ونكره ونهين بعض قدامهم ونشوّه نفسياتهم ونعقّدهم في حياتهم ونكرّمهم في الجواز كله!

كام طفل ومراهق النهارده كارهين الجواز وبناء العلاقات بسبب أبوهم وأمهم؟! شايفين الخوف من كلام الناس وصلنا لفين! ويفضلوا طول حياتهم متعقدين، وبيحاولوا يتعافوا نفسياً عشان يعرفوا يرتبطوا ويختاروا صح في حياتهم.. يا إما يفضلوا مرضى ويختاروا ناس ما لهمش ذنب ويمرضوهم معاهم ويخلفوا منهم مرضى صغيرين، يا إما بيختاروا الوحدة وينعزلوا عن الناس كلها ويكتئبوا ويموتوا لوحدهم!

ربنا خلقنا كائنات اجتماعية، فطبيعي يكون كل تركيزنا إزاي نعمل علاقات ونبنى أسرة هادية كريمة مستقرة، فيها حبّ وأمان ودفع.. مش داخلين حرب احنا.. والشجاع بقى الي يقرر يتراجع ويقطع دائرة الظلم

ويمشي.. طالما حاول يختار صح والطرف الثاني خدعه مثلاً! أو حاول يصلح فيه، لكنّه مالقاش منه أي استجابة! وقتها فعلاً الانفصال بيكون رحمة لكل الأطراف.. وربنا يصلح حال الجميع.



سبب مهم جداً من أسباب فشل أي علاقة المفروض إن مؤهلاتها للنجاح كثيرة:

- محاولة تغيير الطبع! -

حببتيه وهو مُدخن؛ ماتفضليش تزني عليه يقلع عن التدخين، ده محتاج إرادة، لو بطلها عشانك؛ حيرجعلها بسببك عادي لما تعصبه أو بسبب أي حد بردو! - ده لو فهمك أنه بطلها يعني! - اختاري من البداية واحد مابيدخنش أي نوع من الدخان!

حببتيه وهي بتشتغل وحابة شغلها وناجحة فيه؛ ما تطلبش منها تقعد في البيت بعد الجواز عشان سيادتك مابتقبلش الزوجة العاملة! روح من الأول لواحدة ما بتشتغلش واتجوزها

حببتيه وهو بيلعب بلاي ستيشن وطول الوقت قاعد مع أصحابه؛ ماتجيش بعد الجواز تملي منه وتخانقي معاه لنفس السبب! ما هو ما تغيرش!


حببتيه وهي محجبة؛ ما تجيش تؤمرها تلبس النقاب غصب عنها وتغير ستايل لبسها عشان خاطر عيونك يا حمش.. هي لو مقتنعة بيه كانت لبسته بيك أو من غيرك!

حبّيته وهو تخين وبكرش؛ ما تفضليش تزني فوق دماغه عشان يروح الحميم ويخس! أيه الي اتغير يعني؟ لو فضل تخين؛ حتبطلّي تحبيه؟! وأنت حبّيتها رفيعة، لكن اتجوزت وحملت وولدت وشكل جسمها اختلف تماماً بطبيعة المرحلة، أيه هتطلقها ولا هتروح تخونها عشان هي مش هينفع تعمل دايت وهي في مرحلة رضاعة لمدة سنتين!

حبوا بعض زي ما أنتوا... الحب مش بشروط! تعايشوا مع عيوبكم واستمروا على كده، زي ما غصّيتوا عنها الطرف في أول العلاقة وتقبّلّتها عادي!

شايفين نفسكم حتقدروا تتعايشوا مع بعض للآخر؛ أهلاً وسهلاً، مش حتقدروا؛ يبقى بلاش توجعوا بعض من الأول!

مفيش حد كامل، لكن في حد حيفضل يحسك بنقصك طول الوقت، وفي حد حيشوفك كامل رغم نقصك... عشان بس بيبحك.. وفي حد مقتنع أنه فعلاً محتاج يتغير ويطور من نفسه عشانك، فأنت هتساعده على التغيير.. (هتساعده) يعني هو الي هيبدأ.. مش أنت الي هتزقه بالعافية.. ربنا قال إن الله لا يُغيّر ما يقوم حتى يُغيّروا ما بأنفسهم.. لازم تكون الخطوة الأولى من جواه هو.. ويكون صادق ومؤمن بيها فعشان كده ماشي نسااعده..




ما تتقمّشيش دور المُنقذ في حياة حد، خصوصاً شريك حياتك! ما تروحيش تختاري شخص ضعيف وأنتِ قوية مثلاً، وتتعاطفي مع مريض نفسي عنده كل العُقد والكلاكيغ النفسية وتبقي عايزة تحتويه وتحتضنيه وتنتشليه من الضياع! أنت مش طبيب نفسي، أنت مش مؤهلة لعلاج حد (طالما مش تخصصك طب نفسي، وهو ما جاش لحد عندك في عيادتك طالب العلاج!) ربنا يشفي كل مريض، لكن في حد أولى منك بالدور ده، المريض مكانه المستشفى، والمريض النفسي بالذات الي بيمرض خلق الله معاه، والزرجسي الي بيرهق كل الي حواليه ويعمل إسقاطات لعيوبه عليك ويجننك؛ رغم أنه بيخونك مثلاً، لكنه بيشك فيك! ده مكانه المصححة النفسية مش بيوت الناس!

بتكون نيتك خير وبتكوني شايفة إنك ممكن تساعديه وتغيري من طباعه وتنقذيه من الألم والهم الي هو فيه، لكنك بدل ما أنتِ تنقذيه وتحميه من الوقوع في القاع؛ هو بياخدك معاه ينزلك سابع أرض ويؤذيك! وتبقي عايزة الي ينقذك شخصياً!

الرحمة حلوة، وأنتِ تكوني شخص عطوف حلو جداً، لكن أنتِ مش متصلّجي الكون كله! في حاجات تتحط في طريقك، آه ممكن تساعدي فيها، ممكن تنقذي كلب مُشرّد في الشارع، ممكن تنقذي قطة كانت تعبانة وهتموت وتأكليلها وتحمّيها وتعني بيها، لكن مش هتعرفي تنقذي

كل القطط الي تعبانين في الشارع، وتنقذي كل الكلاب المُشرّدة في كل مكان!

في حاجات لازم تسلمّيها لله الذي لا يغفل ولا ينام ولا تضيع عنده الودائع، هو الوحيد الي قادر يستوعب كم الحاجات دي ويراعيها، لكن أنتِ مش هتقدري! يا دُوب تقدري تراعي نفسك وما تحمّليش نفسك فوق طاقتها!




من كتر ما توقّرت سبل الحرام وانتشرت مواقع الإنترنت وانفتحت علينا
 بؤرة من جهنم؛ واحنا استغنيانا عن الحلال بيه! بقى الشباب عندهم قناعة
 {نتجوز ليه ونتحمل مسؤولية ما دمنا بنعمل كل الي احنا عايزينه بدون
 جواز!} (وللأسف في بنات كده كمان!).. حتى الشياب! أصبر ليه على مشاكل
 مع مراقي وأهل بيتي طووول عمري عايش فيها (بدل ما يفكر يحلها مثلاً!)
 ما أنا أروح أتعرفلي على كام بنت صغيرة فرفوشة يردوا فيا الروح وينسوني
 الهم الي عايش فيه، وألحق أعيشلي يومين قبل ما أموت - ده لو افترضنا أنه
 يبفكر في الموت أصلاً، أعتقد لو فكر جدياً إنه فعلاً حيموت ويقابل ربه
 ويتحاسب على أفعاله؛ ما كاذش فعلاً عمل ده، بس المصيبة أن ذكر الموت في
 اللحظة دي بيكون مبرر! آه.. أموت؟ ما أنا كده كده ميت، هو أنا كده
 عايش؟! فيبرر أفعاله قدام نفسه على الأقل! - وينساق ورا رغباته ويتناسى
 واجباته تجاه أسرته وحقهم عليه، ويغفل عن دوره كـ رب الأسرة، مقابل
 البحث عن شهوته مع الي تدلّله! رغم أنه المفروض عارف ومتيقن أن الي
 يبيجي بالساهل بيروح بالساهل، ولو قعد مع نفسه وادى لعقله فرصة
 يحكم؛ حيوصل إلى أن الحرام ما بيشتريش حلال أبداً! وإن لما تهون عليه
 أسرة بالكامل بناها لبنة لبنة؛ يبقى على الدنيا السلام، وبكده خسرنا للأبد
 زي ما هو أكيببيبيد حييجي عليه وقت ويقرف من وضعه الي جد عليه -

ده إذا ما أدمنوش يعني!- ويستغنى عنه هو كمان، بس وقتها يا خسارة، حيرجع بيته يلاقيه مهدود مالوش أثر، أو على الأقل مهجور، والفضل يرجع ليه!

اتقي الله واعمل واجباتك قبل ما تطالب بحقوقك، وما تنساش "وكلكم راج وكلكم مسؤول عن رعيته...." رعيته الي أنت ضيعتها أو في سبيلك لضياعها!

وأنت اتقي الله وما تسمحيش لنفسك تشوفي أي حد غير زوجك عشان ما تفتحيش على نفسك باب المقارنة وعدم الرضا.

اقعدوا لوحدهم صارحوا نفسكم وبعدين اقعدوا اتكلموا مع بعض، صارحوا وصالحوا بعض، دّوبوا أي ماضي وحش بينكم وابدأوا من جديد على نضافة، صدقني برستيچك مش حينهار لما تعترفلها بذنبك وتقصيرك تجاهها وحُبك ليها وتوعدها تعوضها عن الي فات (وفعلاً تتغير للأفضل وتعوّضها مش مجرد وعد!) ولا أنت حد يقدر ينال من كبريائك لو اعتذرتيله عن خطأك وسوء ظنك وعصبيتك حتى لو هو كان السبب فيهم! ما تسمحوش للفتنة تدخل بينكم.. اكتفوا ببعض.. ارضوا ببعض.. غصوا بصركم عن أي دخيل بينكم أو أي طرف تالت يدخل يزعرع علاقتكم.. حياتكم محتاجة من فترة للتانية يتعملها ريفريش والحب يتجدد فيها، خروجة حلوة، هدية، اعتراف صريح، موقف مجنون، إن شاء الله تتنازلوا عن شموخكم وأعماركم لمدة ساعة على الأقل وتلعبوا مع عيالكم! أو



تلعبوا مع بعض.. صدقوني بتفرق.. وبتقرب جداً بينكم.. بتبقى في ألعاب دلوقتي معموله للمتجوزين أو المُقبلين على الجواز، بيكون فيها عدد لا بأس به من الأسئلة، كل طرف يسأل الثاني ويتعرف عليه أكثر، وأسئلة بتسألوها لبعض عن بعض وتشوفوا مين يعرف الثاني أكثر.. دي طبعاً للمتجوزين بقاهم سنين ويعرفوا بعض كويس.. بتعرف في اللعبة دي قد إيه أنت قريب منها وبتحبها وبتعشق تفاصيلها الصغيرة فبتفضل مكمل على نفس النمط وتسعدها وتسعد نفسك أكثر وتسعدوا ولادكم بالفاهم والحب ده.. يا إما بتكتشف أنك ما تعرفش عنها أي حاجة ولا عن ولادك وهنا بتعترف بتقصيرك وبتبدأ تحسن الوضع وتقرب منهم أكثر.. والله بتفرق جداً في صحة نفسية البيت كله..

عايزين نبي بيت سعيد قدر المستطاع، نهون على بعض ضغوط الحياة، ما نبقاش احنا نفسنا بنضغط على بعض!

أنتِ تبقي حابة بيتك وبتتفني في خلق طرق لاستقرار البيت، وأنتِ تساعدنا تعمل ده،

أولاً: عشان مراتك الي وافقت إنها تكمل معاك حياتك؛ تستاهل منك ده. ثانياً: عشان خاطر نفسية ولادك بتفرق جداً على حسب علاقتك بمامتهم سواء كويسة أو لا.

ثالثاً: على الأقل عشان تبقي حابب البيت ومستني اللحظة الي حترجعه فيها، مش البيت يبقى بالنسبة لك مجرد لوكاندا أو محطة استراحة تاكل

وتنام وتصحى تكرر نفس اليوم ثاني وثالث وعاشر ولحد 100 سنة
هتفضل زي ما أنت!

هي حياة واحدة.. يبقى نعيشها بطمأنينة وسلام، مش حرب طول الوقت!
واستنزاف بعض وتمارسوا عُقدكم ونقصكم وأمراضكم النفسية على
بعض وعلى ولادكم! أنتوا بكده ميّتين مع بعض مش عايشين مع بعض!


92

مش لوحذك في الهم الأسود ده! وإنه كده من قدييييييييييييم الأزل وهو كده مش حيتغير وما تحاوليش عشان كان غيرك أشطرا! ولازم ترضخي وتطاطي لريحه عشان دنيتك تمشي وببتك مايتخربش على دماغك ودماغه!

وكلامكم ده كان فييييين يا خضرا يا شريفة أنتِ وهي لما روحتوها تتقدموها؟! مش حرام وعيب عليكم تغشوا وتلبسوها في بضاعة معيوووووووبة وتدفع هي تمنها عمرها وقلبها وحرقة دمها وعيالها ووووو! كنتوا فاكرين إيه لما عملتوا ده؟ أن الحقيقة مش حتنكشف؟ أو لو انكشفت؛ تبقى خلاص مش حينفع تطلب طلاق وهي لسه عروسة ونبقى خلصنا من قرفه ومسؤوليته وخدمته، أو لعل وعسى ربنا يكتبله هدايته على إيديها؟ أو يمكن لما يشوف عياله منها؛ يعقل ويتحمل مسؤولية الأبوة وربيه ينفخ في صورته ويبقى راجل! الجواز مش مركز صحي للتأهيل النفسي والأخلاقي!

عن نفسي؛ ما بصدقش الكلام الي بيتقال في القعدة دي، بعتره كلام إعلانات، أو وعود انتخائية! لأنه بيبقى ما فهووووش غلطة! وطبعاً مفيش حد كامل، ومين يشهد للعريس غير أهله يعني؟!

المفروض ومن باب الأمانة تقولوها كــــل حاجة، عيوب قبل مميزات، وهي حقها تقبل أو ترفض، بنات الناس مش لعبة يا حلوة منك ليها، مش عشان عايزة تفرحي بابنك؛ تكسري قلب أم كان نفسها تشوف بنتها



عائشة فرحانة ومتهنية مع جوزها! مش عشان بتحبينه؛ فتختاريله بنت
متربية وملتزمة وتنفع زوجة وأم وهو ما يستهلها اااااااااا أصلاً!
أهلها بردو من حقهم يختاروها الزوج الصالح الي ينفع يكون أب!
أهلها من حقهم يشوفوها مرتاحة وسعيدة زي ما أنتم من حقكم تشوفوه
سعيد لكن مش على حسابها!

أنتوا بصيتوا تحت رجلينكم وكنتم أنانيين ومنافقين وكدابين وقدرتوا
تخدعوا عادي جداً وهما ربما يكونوا غلطانين استعجلوا وخلصوا
إجراءات الجواز سريعاً أو ما ستخاروش كويس أو أو أو هو نصيب! وطبعاً
مش من حقها تطلب طلاق بعد ما تفوق من الغيوبة دي! ولو طلبت؛
تبقى معندهاش أصل وما تعمّرش بيت وحتشرد العيال وخيخة وتافهة
وسطحية وزّنت على خراب عشاها صح؟!
وطبعاً الكلام للطرفين.. وارد جداً بردو أهل العروسة هما الي يخدعوا أهل
العريس وينوصل للنهاية نفسها..


بريئة من كل حد ييختار الطرف الثاني بالطريقة دي! وبريئة من كل حد
بيستعجل ويستسهل وما يسألش كويس على شريكه.. ده جواز، حياة ثانية
وربما يكون عمر أطول من عمرهم وهما مجرد أبناء في بيوت أهلهم.. ربنا
حيسألكم فجهزوا ردودكم عليه قبل ما تظلموا حد.. اتقوا الله في
نفسكم وفيهم!

اللَّهُمَّ بلغت.. اللَّهُمَّ فاشهد..!

لو أنتِ عاملة كل الي عليكِ ومش مقصرة وعارفة واجباتك وبتراعي ضميرك و و و؛ يبقى لازم ما بين كل فترة والثانية كده تاخدي أجازة، يوم في الشهر ع الأقل ما تعمليش فيه أي حاجة غير أنتخة لجسمك واهتمام بنفسك ودلع لكركشك واستجمام لنفسيتك ونوووم لذهنك ويسسسسس!

الأستاذ المبجل اتعود إنك كاملة مكتملة طول الوقت؛ طبخ وغسيل ونضافة بيت وأولاد ومذاكرة ومنااااهدة ويرجع يلاقي الولاد نايمين والبيت فلة شمعة منورة والأكل جاهز وأنتِ عسل وسكر.. فلما تيجي يوم يتيم تحسي فيه بالإرهاق من ضغط المسؤولية -طبيعي يعني ما أنتِ إنسانة مش آلة إلكترونية والله- يستغرب جداااا ويشمئز منك ويعترض للفكرة نفسها (فكرة إنك مرهقة ومحتاجة ترتاحي شوية!) لا أنتِ بتدلعي حضرتك وأنتِ بتعملي إيبىيه يعني غير شغل البيت شوية ترويق ومعلقتين رز بناكلهم والسلام! إيه يعني قاعدة مع العيال! مش أحسن ما تخرجي تشوفي الشغل برة البيت عامل إزاي ومحتاج جهد قد إيه!؟

أوك حضرتك احنا عارفين أن مجرد المشي في الشوارع أصلاً -سواء على رجلينك ولا مواصلات- بقى إعجاز علمي وزحمة وحر وخناقات وحرقة دم وقرف، ده غير تعاملك في شغلك نفسه.. ده الواحدة فينا لما بتنزل تشتغل



ترفيه عن نفسها؛ مش بتتحمل وكل شوية سايبة شغل ورايحة غيره، لكن أنت كواحد مسؤول عن بيت؛ ما تنفعش تعمل ده وبتضطر تراجع نفسك وتكظم غيظك وتتحمل - على الأقل لحد ما تلاقي فرصة أفضل، إن لقيت يعني! - كتر خيرك بصراحة.. لــــكــــن؛ مش بيديك الحق أبداً!!! إنك تقلل من مجهودها في البيت! ومع الولاد! لأن ربنا خالقها تسكن وتقيم في البيت مقابل إنها عندها قدرة زيادة عن قدرتك على التحمل (بدليل حضرتك مش بتطبق تقعد مع الولاد ساعة بس على مدار اليوم! تقعد بس.. بدون ما تتابع مذاكرتهم وأكلهم ونضافتهم وتشارك في تربيتهم وتنزلهم المدارس وتروح تحبيبهم وتوديعهم التمارين وتحبيبهم وتراعي نفسيتهم أثناء كل ده) رغم أن ده دورك أساساً كأب إنك شريك لحياة أهمهم وحياتهم مش ضيف شرف! معلش يعني هي مش مخلفاهم لوحدها، لكن واضح عشان هي بالطبعي بتتحمل؛ فحضرتك فاكلها ما بتحسش وكتيبيير عليها تشتكي وتقول أي! وعشان هي بالطبعي بتقوم بكل واجباتها وواجباتك تجاههم كمان؛ أنت بقيت تشوف ده فرض عليها أصلاً، وبتكسل على حسها وبتلغي دورك بالتدريج لحد ما تبقى هي الأم والأب وأنت مجرد **ATM** أو زائر في حياتهم دون أي شعور بالذنب، حتى لو في مرة - لا قدر الله - ضميرك أنبك؛ ما بتحركش ساكن أحسن تتمرع عليك مثلاً! وبتستعيز بالله فوراً من شعورك بالتقصير وترجع تستقوي عليها ثاني عادي، حتى التلميح بالإحساس بيها وتشجيعها والاعتراف بحقها


ونشاطها وفضلها؛ بتستكثره عليها! رغم أنك أدرى واحد أن الكلمة الحلوة دي؛ بتعملها ريفريش كده وتنعنشها وتشجعها تواصل الي جاي.

طيب حضرتك جوزك من النوع الجبله عديم الإحساس والنخوة والدم عملي إيه؟

ما تعمليش حاجة! آه والله بجد ما تعمليش أي حاجة... دي كانت نتيجة عدم تقصيرك، طيب ابدئي قصري بقى! أصلاً كانت غلطتك تدخل بقلب جامد في المعمة دي بدون ما تفتكري إن لنفسك عليك حق! رتم الحياة السريع نساًك حقك عليك رغم أن ربك بجلالته حيسألك عنك وحياسبك على تقصيرك في حقك وظلمك لنفسك، ويا ريته طمر يعني! كان لازم من البداية تورّيه إنك مش بتقدري عملي مليون حاجة في نفس الوقت، ولا سهل عملي كذا حاجة في يوم واحد.. ولكل حاجة وقتها، مش ترويق 8 ساعات وطبخ ومواعين 24 ساعة في اليوم، ونوم ساعة بالعافية - منهم نص ساعة ابنك جالك معيط فقمي تشوفي ماله بعيد عن ابوه الي مش عايزة تقلقيه عشان يقدر يقوم لشغله الصبح!

————— إيه سذاجتك دي؟! إيه جبروته ده؟!

يعني ما يصحش تقلقيه عشان عنده مسؤوليات لكن يصح عادي تلضي الليل بالنهار عشان لو تهاونتي في مسؤولياتك بسبب قلة نومك تبقي ست مهملة! أنت فعلاً مهملة لكن في نفسك أنت وديس!



ما ينفعش تعوديه إنك دائماً جاهزة، لا... غلط! مش شرط تكوني على طوول رقم 1 ومنظمة حياتك بالمسطرة، مش لازم تقعي من طولك وتقعبي جسدياً ونفسياً وتقطعي النَّفس عشان يقتنع إنك مرهقة (ومش حقتنع بردو على فكرة) فلازم تعملي ستووووب كده وتقعي بمزاجك، قضوها دلي فري يوم يا ستي! لو الشقة ما تروقتش النهارده؛ مش حتعفن يعني! لو ولادك ما ستحموش النهارده؛ مش حيطلّعوا دود! لو قميصه وبدلته ماتكوش النهارده؛ يلبس كاجوال عادي!

طيب ما أنتِ عودتيه من وقت ما تجوزتوا؟ خلاص بقى.. غلطة وبنصلحها.. الدنيا ياما بتعلمنا.. لكن التلميذ الشاطر هو الي ما يكررش غلطة وإلا ما يكررش شكوته بقى!

محتاجة تبقي باردة شويتين بس وبالتدريج حتبقي فريزر يمشي على رجلين (أسأليني أنا)

مفيش حد كامل، فما ترهقيش نفسك وتحملها فوق طاقتها، لأنّه هو نفسه مش كامل ولا حتى بيسعى للكمال ويحاول يرضيك بكل الطرق زي ما أنتِ بتعملي (وياريته عاجب!)

بتقولي: "أنا بعمل عشان ربنا" ونعم بالله لكن ربنا نفسه ما يرضاش بظلمك لنفسك ده! لازم تعرفي الفرق بين (طاعتك لجوزك) و(سذاجتك وضعفك)!


ربنا زي ما فرض عليك طاعته؛ فرض عليه الرفق بيك وحمایتك وحمل مسؤوليتك أنت وولادكم بالكامل، ده بالعكس بقى لو قرיתי في باب حقوق الزوج على زوجته حتلاقيها أكثر وأهم وأدق بكتير لأن القوامة ليه هو، ودي في حد ذاتها مسؤولية عليه مش كلمة يستعملها على مزاجه ليل ونهار!

ده طبعا النموذج الشائع في معظم البيوت، أي حاجة غير كده تبقى حالة استثنائية (يعني لو حضرته بيحس وعنده دم) ده شواذ القاعدة بقى.. بما إني منصفة ومش عنصرية ورفض التعميم يعني!

لا بجد.. أكيد في رجال مُنصفين ورحماء بزوجاتهم وطبعاً الكلام مش ليهم تماماً..

(الراجل) ها؟ الرجل الطبيعي يحب يشوف مراته محتاجاله ع طول،
تاخذ شورته وتطلب مساعدته وتلجأ له في أي حاجة إن شاء الله يفتحها

برطمان المرئي، وتظهر له ضعفها (مهما كانت قوية) لازم تيجي قدامه وتبقي
كتكوتة وهو الأسد عبد الجبار عادي!
فحسسيه برجولته عادي حقه طالما يستحق..
ما تبقيش الأم والأب وتساوي وجوده في البيت بعده.. طول ما هو موجود
بالذات؛ أنتِ الأم الكيوتة والصاحبة والحببية والطفلة (زيك زيهم عادي)
اتدلي ولا يهمك لكن وهو برة؛ كوني الأم بس بردو فاكراني حقولك
تكوني أم وأب ولا إيه؟ ليه عدمتيه! بعيد الشر عنه طبعاً..



مش لاقية حل لمشكلتك العويصة؟ ما تلجأيش لحد، لأن أحياناً ممكن تلجئي للشخص الغلط ويقولك رأيه من وجهة نظره وطبعه وتجاربه من ممارسة حياته هو، الي مش شرط أبداً يناسب حياتك أنت! لأن الي مريبه مش شبه أبداً الي أنت بتمري بيه! وممكن بردو حد يكون ثقة وقريب منك وعارف تفكيرك كويس ويديكي الحل المناسب ليكي حتى لو هو مش مقتنع بيه، بس متأكد أنه الحل الأمثل ويكون خبرة عنك ويحبلك الخير فعلاً (بس نادراً ما نلاقي الحدد)

الحل إيه؟

أنا عموماً لما ما بلاقيش حل لأي مشكلة؛ (بجكياي كأني حد ثاني غيري)، وبما إننا رواد فضاء في حل مشاكل الناس وباب النجار محلّع؛ فبعرف أنصح نفسي بالحلول الي حقولها لغيري لو كان في نفس مشكلتي بستعين بالله وبتتحل سبحان الله.

اعتمدي على ربك ثم نفسك يا حلوة أنت وهي وهي، محدش أدري بمصلحتك والي يناسبك غيرك، لأنك ببساطة مش (حقل تجارب)، عشان كمان ما تجيش في يوم تندمي وتقولي: "ياريتني ما سمعت كلام فلان.. ضيعني!"


تحمل نتيجة تفكيرك وتصرفاتك واعتمدي على نفسك في حلول مشاكلك، حتى لو أخطأت القرار (وده مش حيحصل غالباً لو اديتي لنفسك فرصة لتفكير عميق وصليتي استخارة طبعاً) لكن لأسوأ الظروف وما أصبتيش هدفك؛ ع الأقل تكوني اتعلمتي بنفسك محدش علّمك ولا علّم عليكي ولا له فضل وجميل عليكي.

حاوطي نفسك بناس شبهك، لايقين عليك، ما تقعديش مع ناس في فرق ثقافة بينكم كبير، وفجوة وعي عظيمة؛ وتشتكي إنهم مش فاهمينك ولا أنتِ قادرة تتكلمي معاهم، وبستغري وقت وجهد كبير عشان تشرحي لهم وجهة نظرك!!

انت دلوقتي ماخلاش مشكلة ماهاش حل، ابجي واقراي واعرفي وساعدي نفسك.. حتى لو هتنتي مهارة من مهاراتك؛ مثلاً مهمة بالرسم؟ انضمي لمجموعات رسامين واكتسي من خبراتهم، وخدي رأيهم في رسوماتك، وطوري من نفسك، واديهم من خبراتك كمان.

مهمة بالقراءة؟ انضمي لمجموعات أدبية بتعمل مسابقات ومناقشات في الكتب الي قرأتوها، وتبادلوا الآراء.

وهكذا في أي مجال أنتِ بتهتمي بيه، حتى لو عندك مشكلة معينة في حياتك؛ انضمي لمجموعة بيتكلموا في حلول للموضوع، على الأقل لما تلاقي ناس غيرك بيعانوا نفس معاناتك؛ الأمر يبقي هين عليك.



تَحَلَّى عن كل شيء عدا حريتك، راحتك، استقلالك الفكري والمادي، اهزمي كل شيء إلا أهلَكَ وحبايبك الصادقين المخلصين، كوني دائماً عوناً للخير، وتساعدني الناس طالما مش هتلقني بنفسك إلى التهلكة.. كوني بعيدة عن الشر، لكن كوني حادة وقاتي عندما يلزم الأمر..


كوني طيبة مع الجميع، لكن ماتكونيش ساذجة وتسمحيلهم يستبيحوا حدودك وييجوا عليك ويستغلوك أسوأ استغلال!

ابعدي عن المُستغلِّين مادياً ومعنوياً! في ناس كل هدفها في الحياة؛ إنها تاخذ بس ماتديش، دول ابعدي عنهم، لأنهم بيكونوا سلبيين، والسلبية عدوى زي ما الإيجابية عدوى، هيستغلوا عطاءك ويمصوا طاقتك ويفضلوا ياخدوا منك لحد ما يخلصوا عليك وما يقاش في أي حاجة عندك تديها حتى لنفسك! وقتها هيسيبوك ويروحوا لحد غيرك ياخدوا منه بردو لحد ما يخلصوا عليه! كوني أذكى منهم واسبقهم بخطوة، ابعدي عنهم واطردوهم من حياتك قبل ما هم يخلصوا عليك ويطردوك من حياتهم! واعمل العكس تماماً؛ قربي من الناس الإيجابيين والناجحين.. لو قعدتي مع أربعة ناجحين مثلاً؛ هتكوني الخامسة بتاعتهم، لو قعدتي مع ناس إيجابيين هتكوني شبههم، أنتِ تستحقي تبقي إيجابية وقوية ما تستحقيش أبداً إنك

تبقى مع ناس سلبية ضعيفة متشائمة تستنفد كل طاقتك وتحليك يائسة ومُحِبَّة!

ما تسمحيش لحد يتحكم فيك، تلبسي إيه وتتكلي إزاي وتصاحبي مين وتبعدي عن مين، طالما مرجعك هو قال الله وقال رسول الله صلى الله عليه وسلم.. هل لبسك يدخلك الجنة ولا النار؟ هل الي بينصحك في لبسك ده أبوك وأمك مثلاً وعازين ينصحوك لوجه الله عشان ده دورهم وهما مسؤولين عنك أمام الله.. ولا لبسك أصلاً تمام وواسع ومش مُلفت وخطيبك ولا جوزك معترض للاعتراض وخلص وعازي فعلاً يتحكم فيك؟ هل صحابك الي عازيك تبعدي عنهم دول ناس وحشين فعلاً وخارين حياتك؟ ولا عازي بعد عنك ناسك عشان يعرف يسيطر عليك؟ هل طريقة كلامك سوقية فعلاً وأخوك ولا أبوك ولا زوجك معترض عليها عشان يترفع بك عن كل ما لا يليق ويساعدك للتطوير للأفضل؟ ولا طريقة كلامك عادية فعلاً وهو متعمد ينتقدك كل شوية عشان يكرهك في عيشتك ويزعزع ثقتك في نفسك؟!

أظن إنك كبيرة وناضجة بما فيه الكفاية عشان تعرفي المغزى من كلام الي حواليك وتحكمي بنفسك هل تستجيب ليهم عشان آه معاهم حق بيحبوك وخايفين على مصلحتك فعلاً.. ولا لأ مش هتسمعي منهم عشان هي دي طريقتهم إنهم معترضين دائماً على أي شيء بتعمله سواء صح ولا غلط ومش عاجبهم العجب!



شوفي الأول أنتِ محاوطة نفسك بمين؟ لأن الي حواليك مؤثرين في قناعاتك وطريقة تفكيرك وأسلوب كلامك وأفعالك بنسبة كبيرة جداً.. فاختاري وفقاً لثقافة.. اختاري عن وعي وإدراك مش لأ مجبروت وخلص! اقرأي.. ثقفي نفسك.. ما تخليش النهارده زي امبارح زي بكرة زي ال10 سنين الجايين مش بتتقدمي خطوة أنت زي ما أنت! نفس طريقة تفكيرك، نفس كلامك! احضري محاضرات تنمية ذاتية وعلم نفس وتحليل الشخصيات وكيفية بناء العلاقات، مفيدة بجد جداً لكل الأعمار.. في ناس مش بتحب تقرأ.. فعادي خدوا المعرفة والعلم بطرق تانية زي الفيديوهات.. المهم نتطور ونتعلم ونعمل بالي اتعلمناه.. عشان يبقى حُجة لينا مش علينا..

كملي دراستك، اشتغلي، وسعي دايرة معارفك، اكتشفي نفسك وميولك وهواياتك ما تقوليش خلاص كبرت، في ناس اكتشفوا أنفسهم في الخمسين من عمرهم وقدروا ينجحوا ويثبتوا أنفسهم ويخطوا بصمتهم في مجالهم.. ما تبقيش واحدة عادية بتاكل وتشرب وتنام وخلص، لمجرد إنك خلصتي الجامعة فأنت كده خلاص عملي الي عليك!

ما تسمحيش لحد يبعدك عن الحياة ويخليك بتدوري في مداره هو وديس! ومشغولة بيه وناسية نفسك واهتماماتك وهواياتك.. فيلغي كياناتك ويقطعك عن العالم كله عشان تهتمي بيه لوحده وتغذي أنايته! على فكرة


كثير من الناس ما يكونون أنانيين في الأصل.. لكن احنا الي من فرط الاهتمام بيهم على حساب نفسنا؛ بنعلمهم الأنانية.. الأول بتديهم كل اهتمامك ومشاعرك فضل منك.. ثم بعد كده بيبقى فرض عليك وبتتلامي على التقصير كأنه حق مكتسب!

اقرئي.. واجحي عن صحة الخبر، ماتصديش أي حاجة بدون دليل... ماتنساقيش ورا الناس.. كوني مميزة بس خدي بالك.. لكل نجاح وتميز؛ ضريبة! هيهاجموك لاختلافك ده.. بس يكفيك شرف المحاولات لمجرد بس إنك رافضة تكوني مع القطيع!

كوني على طبيعتك.. حقيقية، ماتقلديش حد، حتى لو في شخص بالنسبة لك مثل أعلى؛ حبيه واحترميه وامشي على نهجه براحتك، لكن ببصمتك أنت، كوني فاهمة مش حافظة! مفيش بصمة إصبع بتتكرر مرتين؛ ده دليل أن ربنا عايز يوصل لنا رسالة كونية للتفرّد والتميز.

حتى التوأم المتطابق؛ بصمة إيديهم مختلفة، ونبرة صوتهم مختلفة، مفيش حد شبه حد بالملي كده!


ما تتكلفيش في حب حد، ما تتصنّعش عشان ترضي حد، وتنولي إعجاب شخص معين، لأنك بكده قبل ما تكوني بتغشيه؛ فأنت بتغشي نفسك. كوني متصالحة مع نفسك، وصادقة، ما تنصحيش حد بحاجة وأنت مش بتعمليها! ماتكونيش من الي ربنا قال عليهم: "أتأمرون الناس بالبر



وتنسون أنفسكم" و"كَبُرَ مَقْتًا عِنْدَ اللَّهِ أَنْ تَقُولُوا مَا لَا تَفْعَلُونَ"، وأنا يشهد
الله إني ما كتبتش كلمة عموماً في كل كتيبي أو قولت كلمة وأنا مش بمشي
بيها مبدأ في حياتي.

أكبر تنازل ممكن لعمليه
لما تتأقلمي وتتعودي على وضع أنتِ كارهاه وتعبانة نفسياً منه، للدرجة الي
انعكست كمان على صحتك
وبردو عاملة نفسك مش واخدة بالك ومكملة هدم في ذاتك وكيانك
وبتقاوحي على أمل التغيير والإصلاح ومفيش أي حاجة بتتصلح بردو!
إوعي تقولي هما الي خذلوني وظلموني وضايقوني وتعيشي دور الضحية!
محدش يقدر يعمل فيكي حاجة بدون ما تبديله الفرصة وتساعديه! أنتِ الي
أفسدت حياتك بنفسك.. ومَن أفسد شيء؛ فعليه إصلاحه.. اخرجي برة
الدائرة دي بإرادتك.. أنتِ مش جماد!
حتى الحيوان -ربنا يعزك- لما بتضربه بيخربشك ويعضك ويعترض.. لما
بتحطيله أكل هو مش يبجبه مش هياكله غصب عنه! بيقدر يقول (لأ)
بطريقته..

بيكون الوضع تاعبك ومش مرتاحة أبداً، وحزينة وغضبانة وعصبية طول
الوقت بسبب كده، وعندك قلق وتوتر وأرق وكل الضغوط النفسية.... ورغم
ذلك معندكيش الجراءة ترفض وتنسحي من كل ده وتبدئي من جديد في
مكان تاني! عشان خايفة تخرجي من منطقة الراحة، من الوضع المألوف الي
اتعودتي عليه حتى لو مش مريح، لكن الي أعرفه أحسن من الي ما



أعرفوش! وتفضلي تشكي إنك متضايقه ومش مرتاحة بردو! طيب قومي اعلمي حاجة!


مثلاً.. شغلك بعيد جداً وبتاخدي وقت طويل في المواصلات، بتهدري طاقة وفلوس وجاي عليكِ بخسارة، وكمان مديرك بيعاملك وحش كأنك جارية عنده مستعبدها، مش موظفة هو محتاج خبراتها أكثر ما هي محتاجة مرتبه الي أصلاً هي بتزود عليه من جيبها عشان تعرف تقضي الشهر! وكمان زمايلك بينافسوك تنافس غير شريف وعاملين أحزاب ضدك، ده مش جو شغل ده جو حرب! مستحمله ليه؟ أصل لسه هدور على شغل تالائي؟ لسه هعدل الـ C. V وأكتبه من الأول وأفضل أدور لحد ما ألاق حاجة مناسبة؟ وبردو مش هيبقى مريح أكيد، أكيد كل مكان فيه مشاكل بردو، فخلاص خليني مكاني وخلاص! كسل! كسلانة تتعبي وتجتهدى تدوري على شغل مناسب وقريب من بيتك وراتبه مناسب لخبراتك ومواعيده مناسبة لباقي اهتماماتك في يومك، ما هو أكيد يعني مش هتفضلي تعملي حاجة في يومك غير شغل بس! أو مال لو قولتلك ابدئي مشروع خاص بيك وشوفي إيه المجال الي مهمته بيه وتعلمي عنه أكثر وابحثي فيه واقري وزودى معلوماتك عنه وابدئي شغلك الخاص أحسن ما تشتغلي تحت رحمة حد!

أنتِ لو سيبتي الشغل ومشيتي؛ في 20 واحد هيحل محلك ويعمل نفس الي كنتي بتعمله عادي.. لكن دورك في حياتك وحياة أهلك مفيش غيرك هيقوم بيه بطريقتك وتفكيرك، مفيش حد بصمته شبه بصمتك ومفيش

حد هيعرف يحل محلّك، لذلك حافظي على نفسك، صحياً ونفسياً وفكرياً
زي ما عايزة تحافظي عليها مادياً!

لذلك اعملي كريرك بنفسك.. الخوف من الفشل مسيطر عليك!
معنديش الجرة تبدي تتعبي عشان شغل خاص يرجعك بأرباحه بدل ما
تضيّعي وقت وجهد وفلوس مع ناس مش مقدّراك وبتهينك كمان!
معنديش ثقة في قدراتك إنك هتعرفي تنجحي وتقفي على رجلك لوحدا!

ما هو طبيعي كل نجاح بياخد وقت لحد ما يظهر.. أنت ما بتاكلش التمرة
في نفس اليوم الي زرعتي فيه النخلة! لازم تدفعي صبر وجهد وفلوس كمان
لحد ما مشروعك يقف على رجله وتبدي تحصدي منه أضعاف الي
صرفتيه عليه، يا إما كده تكوني فشلتی فعلاً وخسرتي! بس مش نهاية
المطاف بردو! المهم تبدي صح وتستخيري وتستشيري أصحاب الخبرات في
المجال ده وتستعيني بالله ثم بثقتك في نفسك ثم بخبرات أهل الذكر (ذوو
الخبرات في المجال الي اخترتيه) ادّي العيش لحبّازة.. واصبري ثم اصبري ثم
اصبري.. واجتهدي واتعبي واسهري وتفرّغي تماماً لمشروعك، وطوّري منه
باستمرار وما تقلّديش حد، ابتكري الأفكار الي تنهض بيه وتنفردي بتميّزك
فيه، هتلاقي النتيجة النهائية تستحق كل ده.. ثقتك في نفسك هتزيد
أضعاف.. هتعرفي قيمة ذاتك الحقيقية أكثر، هترقّعي عن كل ما لا يليق
بك، المكان الي مش هيناسبك؛ هتلاقي نفسك تلقائياً مش عايزة تروحيه،
الناس الي مش بتحترمك وتحبك بجد؛ مش هتقعدي معاهم، مش




هتجاملي حد على حساب نفسك وراحة بالك وسلامة نفسيتك.. هتلاقي نفسك تلقائياً بتحاوطي نفسك بناس شبهك ناجحين مثقفين زيك، عشان تتشجعي وتتحفزي أكثر وتستمري في نجاحاتك أكثر.. لأننا قولنا قبل كده الي هتحاوطي نفسك بيهم؛ مؤثرين فيك بشكل مباشر.. هتصاحبي إيجابيين ناجحين هتبقى زيهم، هتقعدي مع سلبيين مُتَشَائمين مُحْبِطِينَ هتبقى زيهم بردو.. من حق نفسك عليك إنك تكوني ناجحة، عشانك مش عشان حد..

طبعاً الشغل ده مجرد مثال.. وهكذا بقى في علاقاتك، دراستك، أي حاجة عموماً.. مش مرتاحة فيها سيبها ودوري على غيرها.. ها.. الي بعده! الدنيا مش هتقف على حاجة ولا على حد.. بتستمر.. فاستمري وطلعي أفضل نسخة منك واكتشفي قدراتك المكبوتة.

في ناس (ما بيعرفوش.. ولا عايزين يعرفوا!) إوعي تكوني منهم! ما بيعرفوش يتكلموا بأسلوب راقى ولا عايزين يتعلموا، تلاقي صوتهم دائماً عالي، أسلوب عجرفة كده في كلامهم، هجوميين واندفاعيين! لما تيجي تحكيلهم موضوع؛ تلاقيهم قاطعوك بدون ما يسمعوا منك للآخر ويحكموا على القصة بمنتهى الجهل! أو يفضلوا ينصحوا وخلص! ربما لو صبروا وسكتوا لحد ما تتكلمي للآخر؛ هيكون كل كلامهم ده أصلاً مالوش لازمة فعلاً! بس هو كده وده أسلوبهم مع كل الناس مش معاك لوحداك! بيعاملوا كل الناس بنفس الطريقة، الكبير زي الصغير، القريب زي الغريب! المحترم زي الغير محترم!

ما بيعرفوش يلبسوا لبس شيك لايق على بعضه؛ تلاقيهم لابسين كل الألوان وقطعة صيفي على قطعة شتوي عادي، تيجي تلفتي نظرهم أن ده مش لايق على ده؛ وإن القماشه دي ما تنفعش في الجو ده؛ يقاوحوا ويقولوك: لأ حلو زي الفل كده!

ما بيعرفوش ياكلوا؛ تلاقي على سفرتهم؛ ملوخية ومكرونة ورنجة وفراخ ومسقعة ورز وسمك مشوي وبيض مسلووق، ومعندهم مش أي مشكلة ياكلوا كله مع بعضه.. ومبسوطين وحاجة في منتهى العك!




ما بيعرفوش يعملوا علاقات! عندهم غباء اجتماعي، حتى لو ناجحين في دراستهم وشغلهم لكن فاشلين في تكوين علاقات خصوصاً طويلة الأمد زي الصداقة والزواج!

ما بيسألوش كل فترة والثانية كده زي الناس المهتمين ويفضلوا يتابعوك ويتطننوا عليك ويحكولك عن نفسهم وبيقضوا يومهم إزاي ويسمعوا منك بتقضي يومك إزاي وهكذا.. يشاركوك تفاصيل حياتهم والكلام يفضل رايح جاي بينكم.. لأ هما ما بيعملوش كده! لو حد اتصل بيهم يفضلوا يشتكوا من كل أوجاع الحياة ويقفلوه ويسدّوا نَفسه وما يسمعوش من الطرف الثاني! كل ما يبجي يتكلم هو كمان زي ما بيسمع؛ ينطوا في الكلام ويقاطعوه لحد ما يسكت والمايك يرجعهم تاني ويكملوا شكوى وندب وكأن (الشكوى) هي دي بس الطريقة الي بيعرفوا يتكلموا بيها وكأنهم بيعانوا في الحياة لوحدهم ومش من حق أي حد يعاني غيرهم! فتلاقي نفسك كل ما تتصلي بيهم يسمّعوك نفس الكلام بنفس الترتيب، ماهي حياتهم فاضية روتينية عادية جداً مفيش فيها أي جديد، وهما ما بيتصلوش يسألوا عنك، فبالتالي كل حاجة بتحصل من طرف واحد بس؛ ما بتدومش طبيعي جداً، فتلاقي ما لهمش أصدقاء حقيقيين! معندهمش علاقة طيبة بالجيران؛ مفيش مرة كده في مناسبة وزعوا على جيرانهم طبق حلاوة المولد ولا رز بلبن ولا كحك العيد ولا فته ولا حتى كوباية ماية ولا كيس فاضي! بخلاء بالعطاء في مشاعرهم وفي المادة! فبالتالي اتعرف عنهم إنهم بيعرفوا ياخدوا

وبس، ويسمموا بدن كل الي يكلمهم؛ فالتواصل بينقطع وبينتهي من قبل ما يبدأ! لا يقولوا (مبروك) في فرح، ولا (ربنا يجعلها آخر الأحزان) في عزا! أو ممكن يشاركوا في الأحزان والخناقات والفضايح بس، بما إنهم نكد في الأصل!

العجيب بقى إنهم مُصرّين على ده وشايفين أن ده الصح وأن أنت الي فيك الغلط!

هي أذواق.. ومش كل الناس ربنا رزقها نعمة الذوق!
الفئة دي لا تكوني منهم ولا تتعاملي معاهم أصلاً، حفاظاً على صحتك ونفسيّتك!




احترمي نفسك.. دي مش شتيمة حاشا لله! بل نصيحة إنك تترفعي بنفسك عن كل ما لا يليق بك، وتحببها وتحترمها.. من الرقي؛ إنك تتعامل مع نفسك بطريقة شيك، خالية من نظرات الشك مثلاً، فبالتالي هتكوني واثقة في نفسك وعارفة قدراتك ومتصالحة معها - مهما كانت بسيطة- إنك تحترمي نفسك؛ يعني ما تهنيهاش، يعني نظرتك لنفسك محترمة مهما فشلت في هدف معين وأخفقت في طريق معين؛ تفضل نظرتك لنفسك ثابتة ما بتتغيرش، يعني ما ينفعش طريقة كلامك مع نفسك تكون كلها شتاييم، لما تتصرفي تصرف مايعجبكيش مثلاً؛ فتقولي لنفسك: "إيه ده؟ أنت غبية؟" تخيلي لما تكوني بتتكلمي مع واحدة صاحبتك وتفضلي طول الوقت تهزي ثقتها بنفسها وتتنمري عليها وتهميها بالغباء والفشل.. تخيلي هل هي هتحب تتعامل معاك تاني؟ أكيد لا.. هتحب تشوفك تاني؟ بردو لا.. هل هتفضل صداقتكم قوية زي ما أنتم؟ لا.. وبالتالي هتنقطع علاقتها بيلك.. تخيلي بقي أنت بتعملي كده مع نفسك، بتبوظي علاقتك بيها، من كتر ما أنت طول الوقت بتشتيمها وبتهنيها، وبتهميها بالغباء! وغالباً بيكون كلامك مع نفسك هو نفسه طريقه كلام أهللك معاك وأنت صغيرة وخصوصاً لو استمرت نفس طريقتهم معاك على الكبر!

فحاولي تقطعي الدائرة دي؟ حتى لو هم كانوا بيربوكي غلط ويهدموا شخصيتك، ويمسحوا ثقتك في نفسك؛ أنت لازم تحاولي باستماتة إنك ترفضي أسلوبهم وتثبتيلهم إنك مش ضعيفة وجاهلة وغبية.. محدش أبداً له الحق إنه يهينك ويهدم شخصيتك حتى لو أبوك وأمك أنفسهم وعليهم إثم وربنا هيحاسبهم ولو أنت رفضتي تسامحهم مش هيدخلوا الجنة؛ زيهم زي أي حد ييظلم الناس! حق الله على العبد شيء، وحق العبد على العبد شيء تاني خالص! ربنا ييسامح في حقه لو العبد بعد ما أذنب؛ تاب واستغفر، لكن لازم العبد يسامح العبد عشان ربنا يمحي عنه الذنب ده!

وبعدين تحاولي إنك تقوي علاقتك بنفسك.. الناس المتصالحة مع نفسها بتعرف تعمل علاقات صادقة مع الناس الي حوالها، والناس الي مش متصالحة مع نفسها ومش واثقين في أنفسهم ومش بيحبوا أنفسهم ولا بيحترموها وطول الوقت شايفين أنفسهم أغبياء وفشلة؛ طبيعي تكون علاقتهم أسوأ مع الناس!

احترمي نفسك.. ما تهزريش طول الوقت وتفضلي تضحكي بسبب أو بدون سبب! يكفيك ابتسامة بسيطة وضحكة هادية لما يبقى في سبب للضحك! الوقار شيء مهم جداً لحريتك.. إنك تكوني وقورة، ذات هيبة، حرة، أبية، شخصية قوية، هيكون ليك احترامك في أي مكان وكل الناس تحترمك لما تكوني جادة ومحترمة نفسك..



كوني مرحلة وبشوشة، مفيش مشكلة، لكن بحدود.. خصوصاً مع الناس الغرباء.. أما صحابك المقربين وأخواتك وأهلك؛ كوني على طبيعتك عادي معاهم، المهم أن يكون في احترام بينكم، حتى في الهزار، مش معنى إنهم يبهزروا معاك، إنهم يمدّوا أيديهم عليك أو يشتموك بأهلك!! حطي حدود وارفضي الأسلوب الي ما يعجبكيش، احترامهم ليك ده فرض عليهم مش فضل منهم!

احترمي نفسك.. ما تتدخليش في الي ما يخصكيش، ما تسألش حد مرتبك كم؟ هتتجوزي امتي؟ جوزك بيقبض كام؟ بيشغل إيه؟ مقاس رجله كام؟ هتخلفوا امتي؟ كنتم فين؟ والأسئلة الحشرية دي! حافظي على حدود الناس وخصوصيتهم عشان تعرفي عملي لنفسك حدود محدش يتخطاها بردو!

وبكده هتحافظي على خصوصيتك محدش يتحشر في حياتك الخاصة.. إلبسي اللبس المريح، ويكون أنيق، وألوانه متناسقة، ومش مهم خالص نظرة الناس ليك! كُلي الي يعجبك، والبسي الي يعجبك، وما لكيش دعوة بآراء الناس، طالما حلال ومفيش حاجة تغضب ربنا.

كلي الأكل الصحي مش عشان نظام دايت وتخسي وبس، لا، عشان نفسيتك كمان تبقى أحسن، وخدي فيتامينات تقويك، ما تهملش نفسك، زي ما بتهتمي بأولادك وبترفعي مناعتهم؛ اهتمي بنفسك.. خلي دايماً شكلك حلو


وريححتك جميلة، ما تخليش أبداً عيونك تشوفك وحشة ومنكوشة، ده بيفرق جداً في نفسيتك وفي نظرتك الأساسية لنفسك، وبالتالي هتنعكس على نظرة الناس ليك..

خلي يوم مفتوح في الشهر كي فيه كل الحاجات الي حرمت نفسك منها طول الشهر لكن بالعقل بردو عشان ما تتعيش، المهم ما تحرميش نفسك كتير من حاجة.

العي رياضة سواء في البيت أو الجيم، دي مش رفاهيات واللّه دي أساسيات لتحسين نفسيتك قبل جسمك، إن شاء الله تنطي الحبل 100 نطة! جري حاجات جديدة كل يوم حاجة واحدة على الأقل، المهم ما تنهيش اليوم بنفس النفسية والعقلية الي بدأتيه بيهم.. اكسري الروتين.. اشربي مائة كتير، مش أقل أبداً من 3 لتر في اليوم، لنضارة بشرتك وشعرك وتحسين الهضم.

خصصي وقت لنفسك تعملي فيه الحاجة الي بتحبها وتبلاقي نفسك فيها، من نص ساعة لساعة، مش أقل من كده أبداً؛ تأملي، صلي، ادعي، اقراي، فكري في حاجات إيجابية، اكتبى خواطرك، عبري عن مشاعرك..... إلخ. المهم الوقت ده بتاعك لوحذك، بشرط يكون بعيد عن الموبايل وكل وسائل التواصل.

إوعي ترقصي في الشارع أو في الأماكن العامة.. ما تهزأيش نفسك أبداً، وعموماً ما تحطيش نفسك في مواقف بايخة!



كوني جدعة.. شاركي حبايبك أفراحهم وأحزانهم، سيبي أثر طيب يفتكروك
ويدعوك، المهم أول ما تلاقي حد بيستغلك أسوأ استغلال؛ انسحي من
العلاقة دي بهدوء!


حاولي تفيدي الناس على قد ما تقدر، حتى لو قرأتي كتاب مفيد؛ لخصيه
في شكل نقط، وانقليلهم العلم ده بأسلوب سهل، سيبي بصمة فيهم تشفع
لك يوم الحساب..

أنبوبة إيه الي تغيريها، وحنفية إيه الي تصلحيها؟ وصنايعي مين الي تقفي معاه! ومين سواق التوكتوك الي تاخدي رقمه تتفقي معاه يودي ويحبب العيال؟! حوض إيه الي تغيريله البتاع الي بايظ! شاكوش مين الي تظبطي بيه النيلة الي واقع! ما يولعوا! في إيه بجد؟!

اتنحي شوية على جنب يا حبيبتي وسيبي الحاجات دي لجوزك وأخوكي وأبوكي، بتحلي محلهم ليه؟! مفيش حاجة اسمها هو مش فاضي! لأ يفضلك معلش، ويصلحك البايظ، ويقف هو مع الصنايعية، ويحاسب موظفين الكهرباء والغاز - طالما موجود على الأقل - طول ما أنتِ قايمة بدوره مش حتعرفي تقومي بدورك الأساسي أصلاً، وطول ما هو شايفك بتشيلي عنه؛ حيفضل يحمل عليكي ويدوس أوي! حيكون راجل إزاي وأنتِ مش أنثى!! زيك زيه!!

حطيه حلقه في ودانك يا سكر "الحديد الوحيد الي مسمو حلك تشيليه؛ هو حديد الجيم" وغير كده شكراً ماعطلكيش!

في مبدأ عند فئة من الناس بيقول: "وأنا ليه أهين نفسي؛ لما ممكن أهين قرشي؟" معناه إنه بيشتري صحته وراحة باله بالفلوس، الحاجة الي يقدر يشتريها جاهزة؛ بيرّيح باله وجسمه ويرّيح الناس الي حواليه ويشتريها،



ويقلل معاناته على قد ما يقدر، مقابل أنه يدفع فلوس ويشترى الحاجات الي تساعد على ده...

في فئة تانية من الناس بقى ماشية بعكس المبدأ ده، وهو: "ليه أهين قرشي، لما ممكن أهين نفسي؟!"

إوعي تبقي منهم! لأن دول أبخل أهل الأرض، بخيل على نفسه أولاً، ثم بخيل على الي حواليه وبيقرفهم معاه! بيبقى ربنا كارمها ورازقها وموسع عليها مثلاً ومش محتاجة، ورغم ذلك تدعي الحاجة عشان توفر فلوسها!

ممكن تشيل أنبوبة البوتاجاز وتطلع بيها 10 أدوار على السلم، عشان ما تديش للراجل 30 جنيه زيادة وتريح نفسها، وتحافظ على صحتها!


تروح آخر الدنيا (مشي على رجلها) ماتركبش أي وسيلة مواصلات، عشان تجيب هدم أو خضار أو أي حاجة عايزاها بسعر أرخص شوية! وهي فاكرة إنها كده شاطرة ولهلوبة وما حدش يقدر يستغلها!!

هي آه بتوفر فلوسها، لكن بتستهلك صحتها، وتوقع قلبها، وبتستنفد كل طاقتها في اللف والمقارنة بين الأسعار وطبعاً بتقرف عيالها معاه وتسحلهم وتقسم ظهورهم، لمجرد بس إنها توفر فلوس بسيطة جداً لا تُذكر! وبتيجي في الآخر؛ مش قادرة تتكلم مع أولادها ولا قادرة ترد على جوزها، ولا قادرة تعمل أي حاجة في البيت، ما هي خلاص ما عندهاش طاقة بقى! وولادها بردو بيبقوا تعبانين ومش طايقين أي حد يطلب منهم حاجة زيادة.. وطبعاً رجلها وجعتها من كثر المشي لمسافات لا يمكن أبداً إنسان عاقل يمشيها

إلا بوسيلة مواصلات! وضغط دمها ارتفع جداً من المجهود الجبار الي عملته، وأصبحت عصبية جداً لمدة لا تقل عن يومين، طبيعي عشان ماقدّرتش نفسها ولا قدّرت الي حوالها! ضحّت بحاجات كثير معنوية، مقابل حاجة واحدة بس مادية!


عزّزي نفسك واكرمياها وماتبخليش عليها ولا على أولادك، ولا توافقي أبداً تعيشي مع راجل يبخسك حقك ويزهد في صحتك، ويبخل عليك ويجبرك تعملي كل ده، ويهينك ولا يهين فلوسه! لا! الفلوس بتروح وتيجي عادي، لكن الصحة لو راحت مش هتلاقي أي حاجة تحل مكانها.. وطبعاً المقصود بالصحة هنا: صحتك الجسدية والنفسية.

ريحي نفسك، كبري دماغك على قد ما تقدر، والي ينفع تشتريه جاهز؛ ما تعمليهوش في البيت!



عودي نفسك لما تكوني تعبانة ما تضغطيش على نفسك وتقفني غصب
 عنك تطبخي وتغسلي وتنزلي تودي دروس ومدارس وتمارين وتطلعي
 تنضفي البيت وكأنه يوم عادي بصحتك! لو أنت ما حستيش بنفسك
 وقدرتها ، حستني مين يقدرها؟! لازم الكل يشوفك واخدة وضع الحظر
 كده شوية، إنك مش متاحة دلوقتي، في ظرف طارئ في البيت، مش حينفع
 الي بيتعمل كل يوم؛ يتعمل النهارده أو بكرة، لحد ما تقومي بالسلامة!
 جوزك بني آدم عنده لحم ودم وإحساس ويبيجي عليه وقت وبيتعب. بياخذ
 إجازة من شغله، وطبيعي بتضطري بالذوق أو بالعافية إنك تعلني حظر
 تجول في البيت، تسبي كل الي في إيدك وتقعدي جنبه، ممنوع تشغلي
 بأولادكم، بمكالمة تليفون، بمشوار مهما كان مهم، بشغل البيت، وإلا تبقي
 ما عندكيش دم ومش حاسة بيه، وحضرتك بنت آدم عندك لحم ودم
 وإحساس زيه تماماً يعني أهو! أومال ليه بقي بتيجي على نفسك وتفهميه
 إنك عادي تتعبي واليوم يمشي زيه زي أي يوم، لكنّه لما يتعب الدنيا
 بتقف؟! لو أنت ما حسستوش بقيمتك وأهميتك وتعبك وألمك وشاركتيه
 شدتك زي ما بتشاركيه رخائك؛ هل هو ممكن يحس من تلقاء نفسه
 ويقولك اقعدي أنت ارتاحي النهارده شكلك تعبانة؟ ولا حيشوف إنك طالما
 واقفة على رجلك ومش بتشتكي تبقي أكيد كويسة؟! حتى لو قولتي إنك

تعبانة، في ناس كده عندهم مفهوم إن الإنسان طالما واقف مش راقد في السرير؛ يبقى مش تعبان أبداً ومن حقهم يطلبوا منه أي شيء وييجوا عليه براحتهم! تعبتي يوم في 365 يوم واقفة ومسؤولة، الدنيا حتولع يعني؟! ليه حتى لما تتعبي وما تقدريش عملي حاجة؛ تحسي بالتقصير وتفضلي تلومي وتجدي ذاتك؟! كام مرة كنتي كويسة وقادرة؟ وكام مرة تعبانة ومش قادرة؟ مفيش وجه مقارنة أصلاً! أكيد في أزواج كويسين بيرحموا زوجاتهم ويرأفوا بحالهم، لكني بتكلم على الأغلبية.. حسي بنفسك وقدرها وماستنيش حد يعمل ده!



لازم تبقي عارفة يعني إيه جواز قبل ما تقدمي على الخطوة دي، جواز يعني تحمل مسؤولية نفسك أولاً ثم جوزك ثم أولادك بعد سنة أو أقل، أولادك ها؟ يعني حمل وتعب وولادة وتعب ورعاية وتعب وتربية وتعب، ومسؤولية يعني حب واهتمام ورعاية ونضافة وهدوم مغسولة ومكوية وأكل وشرب بيتعملوا، وطلبات بتتجاب (لو في مقدرتكم تجيبوا خادمة تساعدك؛ يا ريت، ده فضل منك أصلاً مش فرض عليك)، وبعد كام سنة في حضانة ومذاكرة وواجبات، وطبعاً لعب وهزار سواء مع ولادك أو أبوهم، في زيارات بتروحوها للأهل من الطرفين وعزومات بتعملوها ومواعين بتغسلها، عقلك متفتح ودماعك كبيرة والتفاهات والهيافات مايعرفوش طريقها، مثقفة واجتماعية بتعرفي تتكلمي مع الناس وتعملي علاقات سليمة وتعرفي تتصرفي وواعية بما يكفي لتربية أطفال.

الحياة مش شغل بيت بس طبعاً؛ في خروجات خاصة آه أنت وجوزك وأولادك لكن مرة في السنة على الأقل (خلينا واقعيين)، ولو مرتين يبقى ده إنجاز وإعجاز علمي وما تقوليش لحد من صحابك عشان ما يقارنوش حياتهم بحياتك وتتحسدي يا موكوسة..


فمن بدايتها كده ما تحلميش وتعيشي في الأوهام وتفتكري إن الحياة بمبي وكل صيف حتقضيه في مكان مختلف وفطارك حتقومي تلاقيه في السرير

والورد محطوط في الفازة لأنك لو فاهمة إن هو ده الجواز؟ يبقى يا ريت والله مين يكره يعني؟

ربنا كان قادر يخلي كل بنات حواء يتجوزوا في يوم واحد، لكن ده محصلش عبثاً! في حاجة اسمها خبرة لو تسمعي عنها، لازم تتعلمي من أخطاء غيرك وتتفاديها في حياتك، عشان ما تكرر يهاش وتفشلي زي ما فشلوا، أي نعم في اختلاف في حياة كل بيت والثاني، لكن في أساسيات وثوابت موجودة في كل بيت فيهم.

قد المسؤولية والواجبات دي وحتعرفي تري جيل صالح مُصلح.. أهلاً وسهلاً اتكلي على الله ووافقي تشاركي حد حياته، مش قدها وحتيجي بعدين تشتكي وتتأففي وتقولي بيت أبويا كان أرحم وتطلعي قرفك وعُقدك على العيال وتكرههم في عيشتهم؛ يبقى بلاها جواز خالص أو بلاها حمل! الشوارع مش ناقصة بلطجية! وما تجازفيش وتقولي هجرب! مش فستان كروشيّه هو! لو عجبك تكمليه ولو معجبكيش تفكّيه!!


واختاري شريك حياة (مسؤول) يساعدك في كل ده، مش هيبقى هو كمان عبء عليك!



تكون جميلة وذكية ومثقفة واجتماعية وناجحة في دراستها وشغلها وعلاقاتها، وطوب الأرض يحبها، ومحافضة على فروضها ونوافلها وعلاقتها بربها.. تتجاوز واحد ساقط وسلي وفاشل وجاهل في كل حاجة، تخاف على مشاعره لتجرحه لما تتفاجئ بحجم الاختلاف بينهم وتكتشف أن ما كانش ينفع يكملوا مع بعض أصلاً وإنما جوازة محكوم عليها بالفشل من أول يوم، كانت في حاجات واضحة من الأول قبل الجواز بس هي أصرت وعاندت مع الكل وكملت على أمل تغييره! في المشمش! ما كانش في أي تكافؤ بينهم، لا علمي ولا ثقافي ولا فكري ولا في أي مجال.. فضلت خائفة لتجرحه وتبين له أنه أقل منها في كل حاجة.. لحد ما اتنفخ وتضاعف حجمه، شاف نفسه حاجة كبيرة أوي، لحد ما استكتر نفسه عليها! بدأ يصدق نفسه ويحس بجنون العظمة الي هي كانت السبب فيه! بدأ يقلل من شأنها ويهينها ويفقدها ثقتها في نفسها، لحد ما شوّه ملامحها وقناعاتها بدأت تنزعزع فعلاً وبدأت تشك في قدراتها! وبالتالي فشلت في تربية ولادها الي كانوا متدمرين نفسياً بسبب سوء معاملته ليها وليهم... فضل يحطمها بشكل مباشر وغير مباشر لحد ما آمنت إنها ولا حاجة فعلاً! كان فاشل في كل حاجة إلا أنه نجح في السيطرة والتسلط عليها كذباً وافتراء! قاطعت كل الناس، فقدت الثقة فيهم، خافت منهم ومن كل حاجة حوالها!

كانت ضحية لاختيارها الغلط واستعجالها واستسلامها لضغط أهلها عليها
 عشان تتجوز بقي كفاية كده سنها كبر!
 أصبحت جثة هامدة لكن واقفة على رجلها! ماتت روحها ومات شغفها
 بالحياة.. نسيت شكل ضحكتها.. نسيت إزاي كانت بتفكر وتأخذ قرارات
 بعد ما بقت بتشوف الدنيا من منظوره الضيق وتفكر بعقله المحدود
 ومشيت على الخطه الي هو حطهاها! أصبحت بحاجة ضرورية لطبيب
 نفسي هي وولادها عشان يا دوب يبدأوا يتعالجوا 10 سنين على الأقل
 عشان يحاولوا يمشوا في عكس الاتجاه ويعملوا (format) ويبدأوا من
 الأول!

قصة حقيقية للأسف، ربما تكون قصتك (لا قدر الله) أو حتسمعي عنها
 في بيتك أو عيلتك أو في بيت جارتك أو أوص... المهم ضروري تتعلمي منها
 وتأخدي العبرة وتتجنبي أخطاء الآخرين ومش ضروري أبداً تشربي من
 البحر بنفسك عشان تتأكدي أن مايتة مالحه! العلاقة السامة بتبقى باينة
 من أول لقاء والله، وقلبك بيبقى مش متطمن وقلقان، فضروري تأخدي
 الإشارات دي بعين الاعتبار وتوفري على نفسك سنين من العذاب النفسي
 ليك ولكل الي حواليك! لا تظلمي نفسك ولا تظلمي حد معاك، سببي
 المرضي أولى ببعض واختاري شريك سوي نفسياً يضيف ليك، مش يشيل
 ويحط عليك!




إوعي تسمحي لحد يحولك من بني آدم حر طليق زي ما ربنا خلقه؛ لكائن مسخ بليد بدون هوية ولا إرادة، هيكل هلامي صديء هَش، عروسة ماريونيت سهل التحكم فيها ! ده حتى الطفل الرضيع عنده إرادة ويقفل بؤه وهو مش حابب يرضع! حتى الحيوان (أعزكم الله) عنده إرادة وبيرفض الأكل لو مش عاجبه!!

إوعي تدي لحد المساحة أنه يفكر بالنيابة عنك في تقرير مصيرك! العلاقة الصح بتنور الروح والقلب والملامح والله، بتبقي شايقة المرح والنشاط والطاقة عليها كأنها فراشة خفيفة طيارة في الجو، والعلاقة الغلط بتبقى باينة بردو، تلاقي ملاحها بهتانة والتجاعيد ظاهرة عليها، وقلبها بيعيط مش عينيها بس، ومعندهاش طاقة تقوم تشيل كوباية من مكانها، وعلى طول حزينه ومكتئبة.....

إياك تشاركي المجرم في إجرامه في حقك! إياك تتنازلي عن أول حق ليكي، عشان بعدها حتفتحي على نفسك أبواب كتييير من التنازلات مش حتعرفي تقفليها تاني! فوق لنفسك واعرفي كنتي إيه وبقيتي إيه وشوفي هل ده يرضي ربنا! وتأكدي إنك مسؤولة قدام ربك عن النتيجة الي وصلت ليها! إن لنفسك عليك حق (إوعي تنسي)!

وأنتم كأهل.. ربوا بناتكم يكون عندهم كرامة ومحمدش يدوس لهم على طرف، وافضلوا سند وضهر ليهم واختاروا معاهم صح، اختاروا الي عنده

دين وأخلاق مش شقة بمليون ج وعربية معرفش نوعها إيه! علموهم إن الكرامة أهم من المادة وماترموش عيالكم في النار ولا تُلَقُوا بيهم في التهلكة، ماترمهوش مع الناس الغلط ويكون كل همكم إنهم شالوا من عليكم حمل تربيتهم ومسؤوليتهم ومصاريفهم! اتقوا الله فإنكم مسؤولون..



كوني فلة شمعة منورة


اهتمي بنظافتك الشخصية، اغسلي أسنانك، قصي ضوافرك ونضيفها لو مطوّلاًها، سرحي دائماً شعرك وقصي أطرافه المقصفة كل 3 شهور هجرية، اعمليله حمامات زيت وكريم واهتمي بيه، وقصيه لو بتحبي نفسك بالشعر القصير، ولو الطويل لايق عليك أكثر؛ طوّليه ولوّنيه باللون الي بتحببيه، غيّري في شكلك؛ تتغيّر نفسيتك، المهم تكوني راضية عن شكلك ومتصالحة مع نفسك، بشرط زي ما بنقول دائماً (طالما مش حاجة حرام). اهتمي ببشرتك بأقل التكاليف (زي ما في منتجات غالية، في بردو منتجات أقل سعراً، المهم تجيبي وما تكسّليش)، رطي دائماً وشك وشفافيك وإيدك ورجلك وكل سم في جسمك يكون نضيف بدون ولا شعرة ويكون ناعم وطري وقشطة كده يا غسل أنت، مفيش حاجة اسمها (ماما رافضة إني أعمل كده قبل الجواز!) وريها الكلام ده وخليها تقرأ في كتاب فقه السنة؛ باب سنن الفطرة، هتعرف أن ده الطبيعي يتعمل بعد البلوغ مباشرة، وكمان عشان تحمي نفسك من الالتهابات والحكة والروايح الكريهة في الأماكن الحساسة خصوصاً!

استحمي مرتين على الأقل يومياً في الصيف، ومرة يومياً في الشتاء، ما ينفعش تسمى ريحة لعرقك أو الي حواليك يشموا منك غير الروايح الحلوة ومزيل العرق والبرفيوم (طبعاً حرام ترشي وأنت خارجة).

كوني شيك لنفسك قبل ما تتزيني عشان جوزك ولا لأهلك وأصحابك ولا معرفش مين جاي فعشان يشوفوك حلوة! أنت حلوة لنفسك، من حقك تشوفي نفسك في أحسن صورة، كل ما تعدي من قدام المراية؛ احدي بوسة لنفسك وطبطي على كتفك كده وظبطي شعرك وامشي شوفي كنتي رايحة تعملي إيه.. صدقيني مفيش أحسن من إنك تمارسي حياتك بالعقلية دي، ربنا جميل يحب كل ما هو جميل، هو خلقك في أحسن تقويم ويجب يشوفك جميلة..

وزي ما بتحافظي على مظهرك من برة، حافظي على قلبك وروحك من جوة..

ما تكذيبش أبداً مهما حصل، خدي عهد على نفسك بكده، الكذاب؛ جبان، بيخاف من الناس فيكذب ويفضل خايف طول عمره أحسن يكتشفوا الكذبة، ويكذب ألف كذبة عشان يحافظ على الكذبة الأولى! الكذب بيربط أكياس رمل وقیود من حديد في رجلك بجد وبيخليك ثقيلة وبطيئة وكأن في جبل جاثم على صدرك! الصدق مُنجي ده حقيقي وبيحررك من القيود دي ومن نظرة الناس كلها، مش هتشوفي غير أن ربنا



شايفك وسامعك ومُطلع عليك من فوق 7 سماوات، فاحترمي نظرتَه
سبحانه ليك.. واصدقيهم وواجهيهم وكوني شجاعة..
انتقي الناس الي هتتعامل معاهم خصوصاً الي أنت مضطرة تتعامل
معاهم؛ ضيّقي التعامل معاهم في أضيق الحدود حفاظاً على سلامك النفسي،
أما الي مش مضطرة تتعامل معاهم؛ اديهم استمارة 6 فوراً، صحتك
ونفسيّتك بالدنيا واللّه..


ما تعتذريش طالما مش غلطانة (بما يرضي الله) وما تبرّيش تصرفاتك
طول الوقت! ما تحطيش نفسك في موضع ضعف أبداً.. أنتِ مش متهمة!
قولي كلمتك والي عايز يصدقك؛ أهلاً وسهلاً، الي مش مقتنع؛ في 100
داهية مع السلامة، وما تقسميش باللّه.. الصادق لا يحلف! وطبعاً بعد ده
كله ضروري تكوني صادقة فعلاً، مش بنقاوح في الغلط احنا..
البسي لبس قطن، وغيّري كل يوم، ماتلبسيش حاجة مقطوعة وألوانها
باهتة ورسوماتها بايظة.. دلعي نفسك..
ارسمي حنة على جسمك، البسي إكسسوارات، أنتِ قمر كده كده بدون أي
حاجة، بس احنا بنحب نتدلع بزيادة، لو ما كنتيش أنتِ هتدلعي نفسك،
مين هيدلّع!

ما تقبلش بفضلات حد! ما تجيش واحدة تجيبك هدم مثلاً مقطوعة وبايظة من الكور ويا دوب تنفع خيشة لمسح الحمامات (أعزكم الله) وتيجي تديلك الهدوم دي صدقة عشان تلبسيها!! عشان هي جابت هدم جديدة وبتنصف دولابها من الكراكيب فبترميهم عندك بدل ماترميهم في صندوق الزبالة!

أكرمي نفسك، أنتِ عزيزة وغالية أوي، ده مش مقامك إطلاقاً! والي تبتلك بواقي أكل بايت بقاله يومين وباط أو على وشك أنه يبوظ وتقولك خديه بدل ما أرميه! الحاجات دي مش هدايا وحتى لا تُقبل كصدقة! (وبتبيّن مكنون قلب الي ببيعتهها والله، دي مش هدايا، ومن مقام الي باعتها مش من مقام الي المفروض ياخذها!) مهما كنتي محتاجة وظروفك المادية مُتعسرة، كوني مُتعففة وارفضي، لأن أهم شرط من شروط الصدقة؛ إنها تكون من نفس أكلنا دلوقتي أو لبسنا.. قال تعالى (لن تنالوا البر حتى تنفقوا مما تحبون.....) ما قالش سبحانه وتعالى: (مما تلقونه في القمامة)!

حوّشي من حر مالك؛ مرتبك أو مصروفك الخاص، وهاتي كل الي يليق بيك..

وبالتالي ما تقبلش أبداً ببواقي المشاعر، شريك حياتك مثلاً يعرف واحدة عليك، يحبها بكل جوارحه، يديها من المشاعر الي مش بيديها لك أصلاً، وييجي يرميلك بواقي مشاعر فايضة منه! وأنتِ تقبلي بأقل مما تستحقين! فييجي بكرة ويرميلك البواقي.. وتقبلي.. هيجي بعد بكرة مش هيديك



حاجة خالص، وهيميل منك ويزهد فيك ويسترخصك، ويبخسك حقك..
 ما أنت الي قبلي بالفتات! وفي المقابل هو كده كده بياخد منك كل
 مشاعرك لحد ما ما بقاش عندك حاجة تديها له ولا حاجة ليك حتى! هل ده
 الي أنت تستحقينه؟!


حافظي على نقاء قلبك، ما تكرهيش حد -قدر المستطاع- ما تسمحيش
 لخلايا الغل والحقده إنها تنفجر في قلبك، عشان مجرد ما هتنتشر وتتشعب
 في روحك؛ عمرك ما هتعرفي تحبي نفسك، ولا تحبي الناس الي يستاهلوا
 الحب..

عاطبي أول بأول، ما تخلّيش التراكمات تاكل في قلبك، وتنقص غلاوتهم فيه،
 لأن كتر التراكمات؛ بتهدم الروح وبتغيّر الملامح.. مش بس بتغيّر مشاعرك
 تجاههم

لما طفل في الحضانة يضرب زميله جامد جداً، والطفل المضروب يفضل يعيط ويخاف ويجري، وما ياخذش حقه، في احتمالية كام % إنه يضربه ثاني؟ طبعاً = 98% ليه؟ لأنه ما أخذش موقف يدافع بيه عن نفسه، ويمنع عن نفسه الأذى، فإداله تصريح إنه عادي يضربه ثاني وتالت، طالما مفيش عقاب.. لكن لو كان الطفل المضروب حاول يدافع عن نفسه ويزقه بعيد عنه، ويفهمه إنه رافض أسلوبه ده، خصوصاً لو تهادى وضربه ثاني؛ هيضربه ويرد له نفس الألم، أو على الأقل يبلغ المعلمة وهي تعاقبه.. هنا هيكون في احتمالية كام % إنه يضربه تالت؟ = 1% ويمكن أقل.. الطفل اللي بيضرب ساعتها هنا هي فهم إنه كل ما هيضربه؛ هيتضرب، وكل ما هيوجعه؛ هيتوجع.. فبالتالي مش هيتمادى ثاني عليه وهيتوقف تماماً عن أذاه..

لأن مَنْ أَمِنَ العقاب؛ أساء الأدب.

تخلوا دي سياسة اتنين أطفال في حضانة، ما بالكم بقى بالناس الكبيرة اللي عايشة معانا دلوقتي في الواقع، وبنقابلهما كل يوم؟! أنا مش بقول طبعاً أن احنا نمشي نضرب في خلق الله! أنا كده كده ضد العنف بكل أشكاله..




لكن على الأقل نمنع عن نفسنا الأذى، ونفهمهم أن احنا مش هنقبل
أذاهم، عشان ما يتمادوش فيه، وهنعرف إزاي نوقف الأذى عن نفسنا
بكل الأساليب..

أنت تستحق كل حاجة حلوة..
 من حَقَّ أنه يكون شريك حياتك مرح رغم الضغوط النفسية
 ومتطلبات الحياة.. يعرف يلاقي نفسه في شيء معين ويرتاح ويهدى عشان
 يغير المود ويعرف يسعدك؛ يقضي وقت مع صاحبه مثلاً. أو معاك أكيد -
 ده أمر مفروغ منه-، يلاقي روحه في رياضة مُفضلة، في فيلم يتفرج عليه،
 في خروجة أنتوا سواء، تنعش قلبكم وتجدد الحب بينكم..
 المهم تكون روحه مرحلة بطبيعته.. لأن طبيعة الإنسان صعب تتغير تماماً،
 لكن ممكن تتأثر شوية وقت الضغوط، لكن بترجع لطبيعته تاني بعد ما
 الأزمات تعدي..

أنتِ ما تستحقين حد يكون مكشّر في وشك الساعتين الي بيشوفك
 فيهم في اليوم قبل ما ينام! ويصحى مكشّر، وييجي من برة مكشّر!
 ما بيضحكش غير مع الناس برة بس!

ما تستحقين حد روحه عجوزة! يقول لك إنه (مش قادر وتعبان) طول
 الوقت! حتى وهو في يوم أجازته قاعد ما بيعملش حاجة، يقول لك (مش
 قادر وتعبان)!



تستاهلي يكون شريكك دمه خفيف.. بيتسم على الأقل، بيعرف يهزر، أو على الأقل بيستجيب لك لما تهزري معاه، مش بردو مكشّر ومش قادر تعبان!


مش راضي يخرج معاك أنت والأولاد، مش راضي يشاركك في أي حاجة، طول الوقت نكد وخرافات عشان بتطلبي مصروف البيت أو طلبات الولاد! بينكد عشان تسكتي وتبطلي تطالبي بحقوقكم! حتى لو تكرم عليك وخرج معاك؛ بيكرهك في اللحظة اللي قولتيله فيها (تعالى معانا) فيجبرك بطريقة غير مباشرة أنك ما تطلبيش منه ييجي تاني! أصبحت بتكرهي وجوده معاكم عموماً، ده إذا سمح لك تخرجي أصلاً! للأسف في فئة كده (من كوكب المريخ) مستعبدين الست عندهم! شايفين الست للخدمة وديس! تكنس وتطبخ وتغسل وتنصف.. لكن مالهاش حق تطلب أي حاجة لنفسها، وبالذات أن يكون ليها مصروف شخصي أو إنها تخرج تنفس وتشم هوا زي باقي خلق الله! دي رفاهيات هي ماتستحقهاش من وجهة نظرهم! لكن الواحد منهم عادي طبعاً يخرج يتبسط بعد شغله، ويقابل صاحبه، ويسهر براحته، وييجي يلاقي الجارية اللي في البيت محضراله هدمومه النضيفة والعشا، ياكل وينام، ويصحى تاني يوم يكرر نفس اليوم تاني وتالت، لا بيكلمها ولا بيحكيها أي حاجة ولا قضى يومه ازاي، لا يهزر معاه، ولا ييسمعها، ولا ييستشيرها في أي موضوع، وفاكر نفسه أنه كده متجوز! حتى يوم الإجازة مابقاش ياخده، بقى بينزل كل يوم! وهي

فأكره نفسها أن بكدة يكون عندها شريك حياة! هو فين الشريك ده؟! هي فين الحياة دي؟! أنتِ قيمتك أكبر من كده بكثير.. من حقك تكوني صديقة وحببية لشريكك قبل ما تكوني مراته.. مراته ها؟ مش الست اللي بتحل محل أمه! من حقك تلاقي راجل حقيقي يحسسك بأهميتك عنده.. يحسسك بأنوثتك، تلاقي نفسك معاه، تكوني مرتاحة وسعيدة وأنتِ جانبه.. مش تضطري تخرجي تدوّري على أخواتك أو أصحابك عشان تلاقي نفسك وتتفسي وتتبسّطي!! أو مال هو أيه لازمته في حياتك؟ بيأكلك؟ أبوك ماكانش عارف يأكلك؟ أيه الفرق بين بيت أهلك وبيت شريكك؟! فين البصمة اللي سابها لك في حياتك؟

إزاي تعرفي أنتِ مختارة الشريك الصحيح ولا لا؟

بصي في المراية، شوفي ملامحك مرتاحة ولا أعصاب وشك دائماً مشدودة! بتلجأ لي له في أي مشكلة بيحلها معاك ولا بتبهري منه عشان هو في حد ذاته (مشكلة) في حياتك!!

زي ما قولتلك قبل كده تحافظي على نظافتك الشخصية؛ من حقك تعيشي مع شريك يحافظ بردو على نظافته ومظهره قدامك، زي ما بيقعد قدام المراية شهر قبل ما ينزل مشوار أو شغل عشان مظهره يبقى قدام الناس أفضل حاجة.. هتقوليلي: ما هو عايز يقعد براحته.. هقولك: ماشي.. يلبس هدوم مُريحة.. مش شرط يقعد بهدومه الداخلية طول اليوم يعني عشان يبقى براحته! وتفضلي شايفاه طول الوقت منكوش وعرقان وما بيغسلش



أسنانه غير في المناسبات، وريجة رجله وحشة! وضوافره طويلة ومش
نضيفة، ومش سايب حاجة في مكانها.. ده كائن بدائي، عشوائي همجي! مكانه
مرعى في الصحراء مش هينفع يعيش مع ناس أسوياء!

من حقك تشوفيه في أحسن صورة ويملا عينك عشان على الأقل تعرفي
تغضي بصرك عن الرجال الأجانب عنك، وتكوني دائماً راضية عنه.. آه
على فكرة.. غض البصر فرض عليك أنت كمان، من حقك جوزك يملا
عينيك، اشمعنا يقولوا للراجل: غض بصرك وينصحوك تكوني عروسة
مولد ليل ونهار عشان جوزك ما يبصش بره!

من حقك تلاقي شريك حياة متعاون معاك، يكلمك برفق، يكون الوعي
بينكم متساوي تقريباً، ما تكونش في فجوة فكرية بينكم؛ عشان لما
تتكلمي يفهم قصدك مباشرة بدون ما تقعدي تشرحي ساعة! يكون يفهم
كلامك وبالتالي يفهم نظراتك ويفهم سكوتك حتى!


يكون صاحبك الجددع الي لما تحتاجيه تلاقيه على طول، ما يقعدش يبرر
ويتحجب علشان تروحي تشوفي غيره يساعدك! ما هو ده الي بيحصل في
بعض البيوت ولا قدر الله بتوصل للخيانة! لما الزوج ما يكونش موجود
طول الوقت؛ ده يفتح باب للشيطان، والباب لما بيتفتح بيدخل صديق
الزوج أو أخوه أو صديق العيلة أو أي راجل غريب يحل محل الزوج،
ويساعدها في مشكلتها، ويتقربوا من بعض! وطبيعي مشاعرها بتتحرك

ناحيته عشان شافته الراجل الجذع، ولما بتقارنه بجوزها؛ كفته هي الي بترجح!

من حقك شريكك يكون شيك معاك ويساعدك (زي ما بيكون شيك مع زميلته في الشغل! الأقربون أولى بالمعروف) وما يخليكيش تلجئي لغيره وهو موجود في حياتك.

من حقك يسمعك للآخر بدون ما يقاطعك وينصحك لما تحتاجي لنصيحة، وتقدري تعتمد علي عليه فكرياً وتستشيريه في موضوع معين وتأخدي قرارك معاه..

يكون عشيقك ويدلحك ويكفيك مادياً ومعنوياً وجنسياً.. وجنسياً بالذات، لأنك لما بتكوني مقصرة معاه في النقطة دي؛ هو بيعرف يروح يتجوز عليك ويكفي نفسه ومن حقه ماقولناش حاجة، لكن حضرته لما يبقصر معاك جنسياً سواء مش بيشبعك أو مش بيقرب منك أصلاً! حضرتك هتتجوزي عليه إزاي! ده إثم كبير عليه وضروري تأخدي حقك وتتكلمي معاه بوضوح، كتر الاحتياج مش حلواً أبداً في العلاقات وخصوصاً لما تكوني محتاجاه جنسياً وهو رافض يشبع احتياجه ده، ده هيكوّن سبب في مشاكل كتير بينكم، ومش هيخليك تغفري المشاكل الثانية، وهييجي عليك وقت وتكرهيه شخصياً، وده بردو هيفتح باب للخيانة لا قدر الله، طيب ليه؟ يا تشوفوا حل سوا، يا تطلبوا مساعدة دكتور متخصص أو طبيب




نفسى لو السبب نفسى، يا كل واحد يروح لحاله، لكن ماتخونوش بعض أرجوكم!

لما كل الي حواليك يمرضوا! أنت الي بتداويهم، لكن لما أنت تمرضى؟ هل جوزك مثلاً يقولك: ارتاحي ويفضل جنبك يشوفك محتاجة إيه يعملهاولك ولا بيقولك روجي عند أمك لحد ما تبقي قادرة وتعالى! عايزك في صحتك بس؟ عايزك وأنت قادرة بس! لكن لو مش قادرة؟ لا خلاص ماتلزميةوش! تستاهلي راجل وسند حقيقي يكون جنبك وقت مرضك ومحدث يكون جنبك غيره لأنها والله فترات مابتتنسش.. سواء كان جنبك (والفترة دي شوفتي رحمته بيك وحنانه عليك وحبتيه أكثر والود والقرب بينكم زاد)، أو راح رماك عند أهلك لحد ما تحقى (بردو عمرها ما هتتنسى وهتفضل عاملة فجوة من القسوة بتكبر كل مرة وبتبعد ما بينكم، أصل كسرة الخاطر سيئة جداً بين الزوجين بالذات)

من حقك تعيشي في بيت مستقل فكرياً ومادياً عن العيلة.. حتى لو في بيت عيلة! محدش يتدخل في خصوصياتكم ولا حد ياخذ القرار في البيت غيرك أنت وهو بس، ثم تناقشوا عيالكم فيه (لو بخصوص الولاد كمان) لكن أبوه وأمك وأخوه وأختك يتدخلوا بتاع إيه؟!

ما تسيبوش أبداً باب الشيطان مفتوح واقفلوه من كل الاتجاهات وربنا يهدي بينكم ويسعد الجميع..

ليه الناس بيزعلوا من حد عامل لنفسه حدود وخصوصية؟! هو مفيش وسطية خالص؟ يا تكوني فاتحة حدود حياتك وخصوصيتك مشاع للكرة الأرضية كلها، يا إما يكرهوك عشان قافلة على حياتك الخاصة وهما ما يعرفوش عنك حاجة! ما قصدش هنا أسرتك أكيد.. لكن ليه الجيران وصحاب بابا وأهل مرات أخوك مثلاً يعرفوا مرتبك كام وبتشتغلي فين! في تفاصيل ما ينفعش حد يعرفها غير أسرتك، وفي تفاصيل أصغر منها، حتى أسرتك ما ينفعش يعرفوها وتحفظي بيها لنفسك.. خصوصاً لما بتكوني عارفة إن ماما مثلاً مش بتخبي حاجة عن خالتو! وبابا مش بيخبي حاجة عن تيتا وتيتا بتقول كل حاجة لعمتو وعمتو بتكلم عمو تحكيه! إذا وقتها ما ينفعش كل صغيرة وكبيرة تحكيها في البيت! للأسف يعني بقول كده.. أنا مش بقولك اعملي أسرار أو اعملي الغلط من وراهم بقى عادي! أكيد أنت ناضجة بما فيه الكفاية وفاهمة قصدي.. قصدي إنك مش هتعرفي تتحكمي فيهم وتقفل بيهم! لكن هتقدري تتحكمي في نفسك وتحكي بس الحاجات العادية الي ممكن العيلة كلها تعرفها عادي!




خلي لنفسك جانب غامض واحتفظي بيه لنفسك ولو صاحبتك المُقربة
بتعرف تمسك لسانها؛ قوليلها عادي.. ما هو صعب بردو إنك تفضلي
ساكتة كده، أنا عارفة احنا كبنات في مواضيع معينة بنحب نشاركها على
الأقل لشخص واحد، فنشاركها ماشي لأقرب شخص.. وهكذا

في 4 أشكال للأهل من وجهة نظري:

- 1* أشخاص اتربوا تربية سوية، مُشَبَّعة بالعطاء والحنان والحب والمودة والرحمة، ولما أصبحوا آباء؛ بدأوا يربّوا أولادهم نفس التربية الإيجابية
- 2* أشخاص اتربوا تربية سلبية، مليانة حرمان معنوي ومادي، وقسوة وتخوين؛ لكنهم قرروا يقطعوا دائرة الظلم ومايربوش ولادهم بنفس التربية وأدركوا أن تحميل الهم للطفل وسوء حمايته وعدم احتوائه ورعايته؛ بيكبر الطفل ٧٠ سنة على عمره؛ فقرروا ما يكونوش مجرمين في حقه بالشكل ده..
- 3* أشخاص اتربوا تربية سلبية وعنيفة؛ فكمّلوا الدائرة وربّوا ولادهم بنفس النمط، كانوا مظلومين فأصبحوا ظالمين!
- 4* أشخاص اتربوا تربية إيجابية وفيها احتواء لكن اتدلّعوا بزيادة أوي وطلّعوا فاسدين مُفسدين فقرروا أنهم ما يربوش ولادهم بنفس النمط وعملوا العكس تماماً، فعاملوهم بقسوة وعنف وضرب.... إلخ!

وأحياناً شخصين بينشؤوا في نفس البيئة ويتعاملوا بنفس الأسلوب، ولكن كل واحد فيهم بيطلع شخصيته غير الثاني.. واحد بيكون خايف يعترض وشخصيته ضعيفة مائلة للاستسلام والرضوخ وهادي ويحاول ما يغلطش عشان يفضلوا راضيين عنه.. والثاني بيطلع شخصيته قوية



وشجاع وبيواجه ويعترض ويعمل ثورات لحد ما يجبرهم يعاملوه بأدمية،
المعاملة الي يستحقها..

خليك وسط! لا قسوة وتعنيف وتعذيب، ولا دلح بزيادة بدون حسم وحزم
وجدية!


كوني صاحبة مبدأ، صاحبة كلمة، كلمتك عقد، خدي موقف وما ترجعيش
فيه إلا لو راجعتي نفسك ولقيتي نفسك غلطانة؛ ما تكابرش في الغلط..

من الضروري بقى إنك تكوني واعية وتدركي إن شريكك أو العلاقات
الي بتدخلها عموماً؛ فيها أشخاص اتربوا في أي بيئة من الأربعة الي
قولت عليهم فوق! عشان لما تكوني فاهمة ماضيه كان إيه؛ هتعرفي تفكي
الألغاز بتاعة حاضره وبالتالي هتعرفي تتنبئي وتتوقعي تصرفاته في مستقبله
القريب.. مش هيكون طبعه مُحير بالنسبة لك، ولا هيكون في علامات
استفهام وأسئلة بدون إجابات! لأن إذا عُرِفَ السبب؛ بَطَلَ العجب.

لما حد يزعلك وييجي يصالحك، امتي تتصالحني بسهولة، وامتى تتصالحني بصعوبة، وامتى ما تتصالحيش خالص؟!

مثلاً.. عمل في حقك غلطة مش مقصودة فعلاً -لسه في بداية علاقتكم وما يعرفش طبعك لسه- ولما حس إنك اتضايقتي؛ جه اعتذرلك، اتصالحني بسهولة وأكديله على أنه ما يعملهاش تاني -بأسلوب لطيف طبعاً- لكن لو كرر نفس الغلط تاني؛ ماتتصالحيش بسهولة، سيببه وقت كافي لا يقل عن يوم كامل أو يومين وخدي موقف حاسم، لو جه اعتذرلك؛ عاتبيه واسأليه بطريقة حادة شوية: هو أنت مش سبق وعملت الموقف ده قبل كده وأنا عديته؟ ليه بتكرره تاني؟ وكوني واضحة تماماً إنك اتضايقتي جداً عشان هو ما أخدش زعلك المرة اللي فاتت على محمل الجد!

لو نفس الموقف اتكرر للمرة الثالثة، أو موقف جديد لكن حصل إنه أهانك فيه وكسر حدودك وتعدّاها جامد، شتمك، أو شتمك بأهلك، أو قلل من شأنك بأي حال؛ في اللحظة دي إوعي تتصالحني، وخدي موقف حاسم بردو، ومجدة أشد من المرة اللي فاتت، وإياك تتهاوني وتفوّقي وتتصالحني في إهانة كرامتك! لأن للأسف الصلح هنا معناه؛ تصريح وموافقة بالتمادي لمستوى أعلى من قلة قيمتك كإنسانة لها حقوق وحدود! وكله في إيدك أنت.. أنت اللي هتجبري الناس يحترموك أو يهينوك.



ما تتنازليش عن حقك! طالما قادرة تاخدي حقك؛ بتفرطي فيه ليه؟! ليه تخلي حد يستضعفك ويسترخص فيك ويبخسك حقك؟! قاومي واطلعي برة دايرة الراحة والكسل وخدي حقك، لازم تتعي عشان تحصي على مُرادك عموماً، محدش هيتكرم وييجي يقولك خدي أهو حقك اتفضلي، وأنتِ نايمة في السرير أو مانتخة على الكنبه قدام التلفزيون! ما تخليش حد يستغلك أو يستغفلك.. لأن حتى القانون لا يحمي المُغفلين!

مثلاً.. اشتريتي حاجة وطلعت مكسورة وبايطة؛ إوعي تنطشي! حتى لو تمنها رخيص.. انزلي تاني واتكلي وبديها، طالما دفعتي فلوس وادتيهم حقهم، ليه تاخدي حاجة بايطة وتسكتي عنها؟! لو كل شخص دافع عن حقه؛ محدش هيجرؤ يعمل منتج فاسد أصلاً.


في مثل شعبي بيقولك (إن كان ليك حاجة عند الكلب؛ قوله يا سيدي! كناية عن إنه عادي تذلل نفسك لشخص ما، طالما هتاخد مصلحتك منه! لكني بحب دايماً أقول: إن كان ليك حاجة عند الكلب؛ قوليله يا {كلب} مش يا {سيدي}! مفيش أي سبب مقنع يخليه يتنطط عليك ويذل فيك ويحركك ويحرك - خصوصاً قدام الناس - لمجرد إن ليك عنده مصلحة! وطبعاً تبقى غلطانة وتستاهلي الي يجراك لو صبرت على قرفه واستحملت إهانتة لحد ما تاخدي حاجتك منه! اقلبي التراييزة فوق دماغه ووقفه عند

حده وعرفيه قيمة نفسه حتى لو بكدة مش هتطولي منه لا أبيض ولا أسود!

اطلبي حاجتك بعزة نفس لأنّ قضاءها بيد الله وحده.

حاجتك عند ربه، مش عنده، وقادر يدبرها بعيد عنه، وسبحان الله يا مؤمنة مجرد ما ربنا يدبرها لك من طريق تاني؛ تلاقيه جاي يتقرب منك ويتمسح فيك وطالب الود ويقدملك فروض الولاء والطاعة! ولا كأنه عمل حاجة!

وقاحة.. وبجاجة! فأنتِ ما تتحرجيش تخرجي حد كان بيحرجك بل ويجرحك! هو ده القانون للأسف.. زي كده ما بقول: ما تتواضعيش مع حد مغرور وبيتعالى عليك، لأن التواضع وقتها هيتفهم غلط تماماً، وتبقي أنتِ كده بتهيني نفسك وتذليها! تواضعي مع المتواضعين والفقراء والمساكين فقط!



سبحان الله.. ربنا فطر الإنسان على الإرادة من صغره؛ من أول الطفل الرضيع الي لازم يسعى الأول ويبدأ بمص حلمة ثدي أمه؛ عشان رزقه من اللبن ييجي له، لحد الشيخ المُسنّ الي مهما ضعفت قوته؛ إلا أنه يبيتقى عنده إرادة يؤمر وينهي ويؤيد ويرفض! إذاً فإن الإنسان جُبِلَ على الحرية.. على الاختيار.. حتى المذهب الديني مش بالإجبار أبداً..

قال الله تعالى: "لا إكراه في الدين"، "وهديناه النجدين".

طريقين خير وشر وأنت يا عبد الي في إيدك الاختيار، رغم أن ربنا جل وعلا كان قادر يخليك مُجَبَّرَ على دينه! لكنّه أعلم منا سبحانه، أن الي بيتعمل بالحب والقناعة أحسن بكثير من الي بيتعمل بالإكراه والغصب! صحيح الاختيار ليك في البداية، لكن هتتحاسب عليه في النهاية.


تخلي معايا كده مثلاً؛ إنك في يومك العادي مش بتفتحي التلفزيون أبداً، وأي برنامج أو فيلم حابة تتفرجي عليه؛ بتفتحي اللابتوب أو الموبايل؛ وتجببيه وتحضره وخلاص، تخيلي لو أنك جيتي في يوم على سبيل الملل؛ بتفتحي التلفزيون، لقيتيه باظ وخلاص ما بقاش يشتغل، هتحسي بإيه؟ طبيعي تحسي إنك متضايقه وعازية تؤديه لحد يصلحه، رغم إنك أصلاً مش بتهتمي بيه ومش فارق معاك طالما اللابتوب والموبايل موجودين! لكن المنوع مرغوب فعلاً!

لما كان الجهاز قد امك متاح؛ كنتي بتزهدى فيه ومش بتلمسيه ولا بتفكرى تفتحيه لأنك مش محتاجاه، لكن أول ما أصبح خلاص مش متاح؛ بقيتي عايزاه! أنتِ ترفضيه عادى، لكن محدش يجبرك على رفضه، حتى لو عمره الافتراضى انتهى!

وهكذا.. قيسى على المثال ده أي حاجة في الدنيا، سهل ترفضيه طواعية منك، لكن صعب الرفض ده يبقى مجبور ومفروض عليك! مش هتتقبلي أي شيء بالعافية حتى لو كان أنت أصلاً بتحببيه!

وهكذا الفضل الي بتعمليه ويتحول فرض! الأول هتبقى بتعمليه بإتقان بحُب ورضا.. لكن أول ما يحولوه لحق مُكتَسَب ويبقى فرض عليك؛ هتملي منه وتزهدى فيه وتكرهيه، وهتبدأي بعمليه بالعافية وتخلصيه بسرعة بدون إتقان لأنه بقى تقيل على قلبك، لحد ما هتتوقفي تماماً عن فعله!

زي كده زيارتك لحماتك، أنتِ من نفسك حابة تزوريها، وتخلي علاقة طيبة بينك وبينها كلها ود ولُطف ورحمة، ومفيش مانع وأنتِ رايحها تاخديها معاك حاجة هي بتحبها؛ طبق كيك ولا فنجان قهوة، ولا كيلو موز، شوكلاتة، درة مشوي..... أي حاجة، أنتِ كلك ذوق والي ييجي منك حلو، وتقعدي معاها شوية، تظمني على أحوالها وتسألني عن أخبارها وتسمعيها وتسيبها ترغي وتحكيلك كل الي في قلبها، تفضفض ومالو ما أنتِ مرات ابنها زي بنتها وسرها معاك في بير غويط والكلمة بتاعتها تقف عندك ماتتنقلش لسلايفك عشان كيد النسا والنفسنة وأنتِ أدري مني




بالحوارات دي! المهم ضحكة منك على ضحكة منها، اليوم بقى زي العسل، حتى أنتِ بقيتي نفسياً أحسن بكثير، واتبسطي من قلبك، عشان رايحة لله، مش عشان جوزك أمرك تروحي! وعيالك بيحضنوها ويلعبوا معاها وتأكلهم بإيديها، وتوتة توتة خلص اليوم وبتأخديهم وتتوكلي على الله تروّحوا بيتكم..

تخلي بقى لو جوزك أمرك تروحيلها وأنت مش حابة إن التودد ده بييجي بالإجبار! بس هو كدة، بالعافية مش بالرضا.. آه يمكن تعصري على نفسك ليمونة وتروحي غصب عنك عشان تتجني الخلافات معاه ومش عايزة وجع دماغ، لكن هل هتعملي نفس الي كنتي بتعمليه؟ بالتأكيد لأ! وحقك.. هل يستويان؟!

الي بيبجي بالرضا مش زي أبداً الي بيبجي بالغصب! حتى لو عملتي نفس الشيء وروحيلها بنفس كيلو الموز، لكن النفسية اتغيرت خلاص! والطاقة بتاعتك بقت كُره مش حُب! وزى ما الحب محسوس، الكره بردو يبقى محسوس سبحانه الله!

عشان كده نصيحتي ليكِ لوجه الله تعالى؛ ما تعمليش حاجة غصب عنك أبداً، جددي نيتك لله واعملي أي شيء بحُب، لله مش للناس مين ما كانوا! على الأقل عشان تاخدي الأجر والثواب! تخيلي ممكن تتعي وتعملي كل الحاجات دي وفي الآخر ما تاخديش ثواب بل تاخدي ذنب كمان! عشان بس النية!

أنتِ تستحقي كل حاجة حلوة، وتستحقي تعمي الي أنتِ عايزاه وما
تعمليش الي مش عايزاه، طالما ما بتغضبيش ربنا، وطبعاً رضا جوزك من
رضا ربك، المهم تكونوا متفقين على الأساسيات دي بالحب.. لا تظلمي حد
معاكِ ولا تظلمي نفسك!



إياك تسمحي لحد يفرّغ شحنته السلبية فيك، ولا يطلّع عقّده ونقصه فيك
ولا يعمل إسقاطات لعيوبه عليك ويحسسك إنها عيوبك أنت أو يقلب
الترابيزة عليك! أو يحطك تحت ضغط نفسي ويلعب معاك ألعاب نفسية!
ما تكونيش أبداً طرف في حرب الأعصاب دي! دايرة مسمومة كلها أمراض
نفسية أنت في غنى عنها!

ولا أنتِ تعلمي كده مع حد! ابعدي عن أي كيد وتدبير مكاييد لحد!
حافظي على طهارة قلبك ونقاء روحك، خليك دائماً بعيداً عن البقاع
المظلمة دي!


بلاقي زوج داخل من شغله متعصب أوي وعمال يزعق لمراته أول ما
فتحتله باب البيت، دخل عمال يزعق فيها بدون ذنب! وبنته جت تسأله
مالك يا بابا راح ضاربها! وقايم بدور الثور الهائج! أو الممسوس بالكهرباء أو
بالجن! -أيهما أقرب للتصوّر- طبعاً الزوجة الصالحة في المشهد ده واجب
عليها تسكت خالص وتتحمل أي حاجة يعملها زوجها عشان ما تخردش
بيتها بإيديها! ما هي لو نطق حرف واحد؛ هيطلقها وهو في حالته دي!
وتلاقي فعلاً النصايح الي بتتقال لها في المواقف دي! معلش استحملي، ما هو
طول اليوم برة في شغله تعبان وقرفان وبيقابل ناس قارفينه في عيشته وهو
صابر عشان كل الأشغال كده ولازم يحافظ على أكل عيشه، كفاية أنه مش

حارم بيته ولا عياله من حاجة! معلش اتحملي ما أنت الحيطه المائلة بتاعته! ما هو مديره رجل ظالم بردو وهو ما ينفعش يقف قصاده ويرفضله طلب!

ييجي تاني يوم متعصب بردو، فهي تفضل ساكتة لحد ما تلاقيه بيتمادى بقى وعمال يزعق في البنت ويضرب الولد، فتصرخ فيه الزوجة الصالحة وتعرض أخيراً! ما هو مش كل يوم هتيجي تدخل علينا بزعايب أمشير دي! ونفضل ساكتين ومستحملين ليه يعني! ولسه هتكمل باقي الجملة؛ يقوم يمد إيده عليها يضربها ويساوي وشها بالأرض! لأنه كائن ضعيف وجبان! خايف من ذوي السلطة والنفوذ، والأعلى منه مكانة في شغله! لكن مراته وولاده أقل منه، فعادي يقسى عليهم ويهينهم! ويطلع غلّه من مديره؛ فيهم! عشان إيه بقى؟! ده شخص سويّ؟!!

طيب دي مواصفات الزوجة الصالحة أصلاً؟! الساكتة عن الإهانة، الراضية بالزعيق وقلة القيمة، وطالما رفضت واعترضت ما تبقاش زوجة صالحة؟! مالكم كيف تحكمون!

وأنت يا زوج يا صالح عامل إيه! أخبارك إيه مع ربنا؟ هل اتقيت الله فيمن تعول؟ هل رفقت بالقوارير؟ هل أنت أب صالح وزوج صالح ولا أنت بتسأل عن برّهم بيك وعن حقوقك بس وتهمل واجباتك!




طبعاً في رجال كثير محترمين مُتّزّنين نفسياً ما بيعملوش كدة أبداً ويعرفوا
يتحكموا في أعصابهم ويفصلوا بين مشاكل الشغل والبيت؛ فالكلام مش
ليهم!

في عالم موازي.. في زوج صالح بجد، بيعرف أصلاً يختار الشغل الي يضمن
كرامته، ما يقاش مكبوت طول اليوم وييجي يفرّغ كبتة في ناس مالمش
ذنّب! شخص سوي عارف إمكانياته وقيّمته وحاطط نفسه في المكان الصح،
في مكان بيعترف -إلى حد كبير- بآدميته على الأقل! يا إما هو عامل
مشروع لنفسه لأنه مايحبش يشتغل تحت سُلطة حد ودة الأفضل طبعاً..
يعرف يخلع مشاكل الشغل مع حذائه على باب البيت برة، ويدخل لوحده
ويقفل الباب، بابتسامة مهما كان مرهق، يحضن زوجته وأولاده ويلقي
السلام، ويدخل ياخذ شاور، ويصلي ويقعد معاهم على السفرة ياكلوا
ويضحكوا ويسيب أثر طيب في قلوبهم قبل ما يناموا! يحكيلهم عمل أيه في
شغله، مواقف معينة يكون قاصد بيها عبرة يعلمهم من خلالها دروس
مثلاً، يكلمهم، يسمع لهم.. وهكذا، وهما يحكوله قضا يومهم إزاي في
المدرسة ولا النادي ومع أصحابهم وووو..... يسهروا مع بعض في نهاية
الأسبوع سواء في البيت ولا ياخذهم فسحة برة البيت، يلعبوا سوا، يطمنوا
كلهم على نفسية بعض، ويفضضوا لبعض.....
ده بيت دافي، سوي، نتمنى كلنا يكون بيتنا!

لكن البيت الثاني المشحون بالحناق والضعينة والقهر! ليه! هو ده يرضي ربنا؟! سواء العيب في الزوج أو الزوجة العصبية الزنانة الشكاية النكدية، ما هي نفس النتيجة بردو! ليه؟ إيه الي يسعد في بيت زي ده!

زي ما بقول أنتِ ما تستحقيش تعيشي تعيشي في حرب الأعصاب دي، هما بردو ما يستحقوش أبداً يعيشوا في تعاسة مضغوطين بسبب عصبيتك الي مالهش أي مبرر! لا تكوني ظالمة ولا مظلومة! زي ما ربنا هيسألهم عنك؛ هيسألهم عنهم! محدش هياخد إعفاء من الحساب! لا ضرر ولا ضرار.




أنا عارفة إنه صعب جداً إنك تتحكمي في الي حواليك، وتخليهم يتصرفوا معاك بطريقة معينة تليق بيك، لكن سهل جداً إنك تتحكمي في نفسك أنت، مش هتعرفي تسيطر على الكون كله طبيعي جداً، ومش مطلوب منك ترهقي نفسك وتحاولي عملي ده أساساً لكن كل الي تقدري عمليه إنك تمنعي تأثيرهم عليك؛ زي درع الحماية كده، هم هيطلقوا السهام من عندهم، وأنت تمنعي وصولها لقلبك بدرع الحماية الي هتصدي بيه.. سهام الأذى، الاستغلال، الإهانة..... إلخ. وأنت هتتصديهم بدرع الحماية بتاعك: ثقتك في نفسك ومعرفتك بذاتك، وإيمانك باستحقاقك، ونجاحاتك، هتتصدي ليهم وتمنعي الوصول وتحمي نفسك ونفسيته وبالتالي صحتك الجسدية ومناعتك..

ما تخليش حد يسيطر عليك للدرجة الي تخليك تعبانة نفسياً من أثر الكلمة الخبيثة والفعل الدنيء، ونايمة في السرير مش عندك طاقة تقومي وحزينة ومكتئبة، وهو في المقابل عايش حياته بأروع ما يكون! فين العدل من منظورك بقي؟! هي أو هو الجاني والظالم؛ ورغم ده عايش سعيد، وأنت المجني عليها المظلومة؛ تعيش وموتة نفسك من العياط! الحزن بيضعف جهاز المناعة، ويبخليك في عرضة زيادة جداً للأمراض، وكأنه بيفتح الباب ويبخلي جسمك مستعد لاستقبال الأمراض! هل صدفة إنك كل ما تزعلي؛ تُصابي مثلاً بأنفلونزا؟ لا طبعاً مش صدفة!

في فئة من الناس ما يهدهاش بال إلا لما تنكد على خلق الله، وتذبيهم! ماشيين بمبدأ: (أنا مؤذي.. إذاً أنا موجود!) الإنسان بطبيعته وفطرته دائماً بحاجة إلى إنه يتشاف؛ ففي إنسان بيلفت النظر بطيبته وكرم أخلاقه وحسن معاملته ومساعدته لي حواليه وصدقه وتربيته..

وفي (إنسحيوان) شكله إنسان، لكن طبيعة أخلاقه همجية عشوائية بهيمية مفترسة؛ يتفنن في أذى الناس عشان يثبت إنه موجود! قد إيه بيفرح وروحه تطير من فرط السعادة لما يلاقي تأثيره السلبي واضح جداً في حد معين، ويلاقيه مقهور وبيعتصر قلبه من الظلم والحزن بسببه، بيتبسط أوي إنه قد إيه حد مؤثر، وحد جبار ومفترى والناس بتعمل لشره؛ ألف حساب، وخافين من أذاه!

ده بقى (إنسشيطان) يعني فيه نزعة شيطانية كمان مش حيوانية بس، لأن والله حتى الحيوانات مهما كانت مفترسة؛ إلا أنها سهلة الترويض، وما يخطرش على بالها تذذي حد بدون سبب! ده في ناس دلوقتي بتربي أسود وفهود ونمور في البيت! وفي ناس كتير بتفضّل إنها تعيش مع قطط وكلاب وحيوانات بمختلف أنواعها، ولا إنها تعيش مع ناس من كتر ما اتخذلوا واتظلموا؛ فقدوا الثقة في كل الناس وخطوا ثقتهم في الحيوانات دي!




مفيش ثوابت.. الشيء الثابت الوحيد في الدنيا هو التغيير!
 تلاقي شخص طيب جداً، لكن مع مرور الصدمات النفسية ما بقاش
 طيب! وارد جداً يبقى شرير من كتر ما اتعرض للقهر والظلم؛ فحصله
 كبت، طلع في لحظات غضب مثلاً وحرق الأخضر واليابس وجاب عاليها
 واطيها! هو طيب بس مش سلمي ضعيف وساذج!
 والعكس.. الشخص الخبيث، قدامه طريقين، إما ينوي التغيير بصدق
 ويتوب فربنا يتوب عليه، والحسنات يُذهبن السيئات، والتائب من الذنب
 كمن لا ذنب له، يا إما هيبقى من سيئ لأسوأ ويطغى أكثر!
 كل شيء قابل للتغيير! فبلاش تراهني على ثبات حد، وما تضمنيش بقاء حد
 على نفس النسخة الي تعرفيها طول الوقت! وارد كل مفاهيمك عنه تتغير في
 لحظة لما يتكشف على حقيقته! ووارد يكون هو شخص طيب فعلاً
 ويثبتلك ده في كل المواقف.. المواقف وحدها هي خير دليل على حقائق
 الناس..

حتى أنتِ شخصية مُتغيرة ومش ثابتة على نفس الشخصية طول الوقت!
 شوية بتبقي رائعة لما بتتعامل مع الرائعين، وبتبقي حادة الطباع وعصبية
 مثلاً لما بتتعامل مع ناس بيستفزوك! يعني عادي جداً شخص رائع يوصفك
 إنك رائعة جداً، وشخص تاني يوصفك إنك عصبية ودايماً صوتك عالي
 وغضبانة! حسب الناس الي حواليك وبيتعاملوا معاك تعامل مباشر،

وحسب المواقف المتضادة فأنتِ شخص متغير ومرن.. هل ده يُسمى نفاق؟!
 بالتأكيد لأ.. أنتِ كده شخص طبيعي جداً، وارد تكوني قوية وسعيدة
 ونشيطة، ووارد جداً تكوني في وقت ما هشة وضعيفة وحزينة ومش قادرة
 تقومي تقفي! تقلبات طبيعية جداً تفيد مش بتضر، مهما كانت تبان لحظات
 صعبة أحياناً!

قرأت مقولة بالإنجليزية فيما معناها: إن قراءة نبضات القلب على شاشة
 الجهاز شوية طالعة فوق جداً وشوية نازلة تحت جداً، ده معناه إن الإنسان
 عايش، لكن أول ما الخط يستقيم؛ يبقى الإنسان ده مات خلاص!
 فطبيعي يكون مزاجنا مُتغير، شوية فوق وشوية تحت.



قبل ما تعيشي شعور لآخره، وتتقوقي على نفسك؛ تأكدي أولاً إنها مشاعرك أنتِ، مش مشاعر مُقْتَبَسَة من حد ثاني! فلانة صاحبتك مثلاً عجبته حاجة معينة، وجاية تحكيك قد أيه الحاجة دي جميلة جداً وعمالة تقولك مواصفاتها ومميزاتها، وأنتِ برغم أنك مش مهتمة أبداً بالموضوع ده؛ إلا إنك لقيتي نفسك فجأة اهتيمتي وحببتي الحاجة دي جداً! وبقي عندك استعداد تدافعي عنها باستماتة! هل دي مشاعرك أنتِ؟ لا دي مشاعر فلانة! وهكذا.. كل شعور يعدي عليكِ المفروض يكون نابع من جواك أنتِ وعن قناعة تامة وبكامل إرادتك، وقواك العقلية..


كنتِ مثلاً قاعدة في أمان الله، لا بيلك ولا عليكِ ولا حواليكِ! فجأة بقيتي عايزة تسافري ومُتحمسة جداً وبدأتِ تسألني بجدية عن أسعار تذاكر الطيران، وتعملي مقارنة بين أسعار شركات السياحة، وأنتِ أصلاً ما كنتيش بتفكري حتى في الموضوع! لمجرد بس أن صاحبتك مسافرة تبع مؤتمر طبي لشغلها! دي مشاعرها هي، مش مشاعرك إطلاقاً..

عيشي حياتك أنتِ.. حِسِّي مشاعرك أنتِ.. وحاولي بقدر المستطاع ما تاخديش مشاعر حد خصوصاً لو سلبية! حاولي تفصلي بين مشاعرك ومشاعرهم.. تعاطفي آه مع الآخرين لكن مش للدرجة الي تنسيك مشاعرك الأساسية!

ساعدي جوزك يبقى راجل!

(الزوج، الابن) بالنسبة للستات و(الحاطب، الأب، الأخ) بالنسبة للبنات
في علاقة عكسية واضحة جدا بقالها سنين كتير بس بدأت تنتشر الكام
سنة الي فاتوا بالذات؛ وهي "كلما كانت الست سوبر هيرو؛ كلما كان الراجل
... لا مؤاخذه مابقاش راجل!"

أنتِ السبب في إن جوزك أو ابنك أو ...-أياً كان علاقتك بيه- مايقاش
راجل! بتحبي تسيطر على الي يخصك والي مايخصكيش، فاكدة نفسك
سوبر هيرو مجد وتقدري تعمي كل حاجة في البيت مثلاً: تغيري الأنوبة
الي خلصت، وجدة الحنفية الي باظت، تمسكي شاكوش وأجنة ومسامير
وتصلحي الشباك الي اتكسر، تفتحي الباب وتستقبلي مُحصل الغاز
والكهربا والمياه، تروحي موقف العربيات تدوري على سواق وتتفقي معاه
يودي ولادك المدرسة ويجيبهم، تنزلي عشرتلاف مرة تحبيي طلبات البيت
وتشيلي عشروميت كيلو لوحذك، تركبي معاه أي مواصلة عامة وأنتِ
تحاسبي، تقعدوا تتغدوا وتحلّوا وتشربوا أي بتاع وبردو أنتِ الي تحاسبي!
التلفزيون باظ مثلاً فتخشوشني كالعادة وتاخديه توديه يتصلح أو تنزلي
تحبيي الراجل يصلحهم ولك وأنتِ الي تحاسبي! ويا سلام بقى لو أنتِ بتشتغلي
وهو بيعتمد على فلوسك في إدارة البيت كمان!



بصي يا سكر بقي، واضح إنك بتحاسبي على كل حاجة إلا إنك تتمسكي
بأنوثتك! بتحاسبي على كل المشاريب لكن ماتحاسبيش على رجولة الأخ
الي أنت متجوزاه! لحد ما بدلتی الأدوار وأنتِ مش واحدة بالك! وهو ممكن
يكون مش واحد باله، لكن الأكيد؛ إنه مبسوط كده، ومنشكح وهو نايم
في البطاطا وسايبك أنتِ تسوقي وهو مانتخ على الكنبه الي ورا!

وبعدين بترجعي تتعي، جسدياً ونفسياً -وده الطبيعي على فكرة- لأنك
قلبي النظام الرباني رأساً على عقب! حطيتي نقط مش على حروفها، كَوْنَتِي
جملة غلط وغير صالحة للفهم، وفي الآخر جاية تشتكي إنك مش قادرة
تقرئها! الله! زعلانة ليه! ما أنتِ الي كاتبها!

وهو مرتاح ومكسِل والبركة فيك؛ شيلتي مسؤوليته عنك ودوره الأساسي
في حياته؛ تكفّلتِي بيه! ونسيتي دورك أنتِ، دورك كأنتي ضعيفة رقيقة
عطوفة، نسيتي ثقافتك وتعليمك ونزلتي اتخانقتي مع عم متولي البواب
عشان ما كنسش السلم ولا طلع خد شنطة الزبالة من قدام الباب!


أَنْتِ مَالِك؟! لا بجد مالك! احترمي آدميتك، احترمي
نوعك، احترمي الراجل الي أنتِ اخترتيه يكمل معاكِ عشان يشيل عنك
ومعاكِ مش تشيلي بدل منه! تقدري تقولي إزاي بتحترمي بينك وبين
نفسك بعد كل ده؟!

احترمي سبب خلقتة! هو ربنا مكانش قادر يخلق الكون كله إناث؟ هو خلق
ذكور عشان عمار الأرض بس؟! ولا عشان هو بعزته وجلالته عارف إنك

مش حتقدري تعملي كل حاجة لوحديك! عارف إنك مش محتاجاله عشان تخلفي منه وديس، بل عشان يبقى ضهرِك وسنْدِك ووووو..... حاجات كتيرة أنتِ بتنازُلك عنها؛ كنتي السبب أنه يبطل يديهالك! حتقوليلي: "ما أنا لو شوفته راجل يُعتمد عليه؛ ما كنتش نزلت وجيبت واتخايفت و....!"

حقولك: غلطانة ولما تقعدي لوحديك وتحاسبي نفسك؛ حتعترفي بغلطك دة، حتقسمي بالله إنك السبب في الي أنتوا وصلتوله ده! بس الدنيا ماوقفتش، ودي مش نهاية المطاف ولسه قدامك فرصة تتغيري وتغيري حياتكم كلها تفرملي وتبصي لنفسك في مراية قلبك وتعملي الي كان المفروض يتعمل من زمان، اقعدي اتكلمي معاها، لأنه أكيبيد ما كانش كده، لكن بالتدريج؛ هو طنش وأنتِ اتنازلتي ونسيقي إنك الست وهو المفروض الراجل! فبالله عليك ساعديه يرجع رجولته تاني -على الأقل عشان تقدري تحترمييه وهو يقدر يحترم نفسه ويثق في نفسه من تاني-


تتفقوا تعوضوا الي فات من عمركم وتصلحوا الي باظ، وتبطلي تفتحي برطمان مربى طالما معاك راجل في البيت، آه! أخوك، أبوك... إظهري ضعفك عشان تحسسيه بقوته ورجولته حتى لو أنتِ قادرة تفتحيه... وهكذا... بالتدريج حتحسي بالفرق.. حتحسي بالسعادة بمجد، لأنك اتبعتي النظام الرباني، إنك تلزمي حدودك، وتسيبيه يعمل واجباته طالما بتعملي واجباتك، وتبقى العلاقة الطردية متوازنة؛ "كلما أنتِ بقيتي أنثى؛ هو حيبقي راجل"



"وكلكم راع وكلكم مسؤول عن رعيته..." وتفهمي معنى الحديث ده، إنك بتخفني عنه سؤال ربه ليه لما يحاسبه على اللي كان المفروض يعملها وماعملوش عشان اعتمد عليك وأنتِ ماخذلتيهوش! خفني حساب ربنا ليه، واعملي المطلوب منك بس، ماتحمليش نفسك فوق طاقتها!

الذكر الجبان الي ما بيعرفش يتشطر غير على الأنثى، سواء كانت أمه، أخته، مراته، بنته! ده بدايته كانت دلح أمه واستهتار أبوه وتسيب البيئة المحيطة بيه؛ لما كان يغلط مايتعاقبش عشان هو الولد والحيلة السند!! في المقابل أخته لو غلطت تتعاقب عادي وهو الي يعاقبها كمان وليه صلاحياته مهما كان أصغر منها لكنهم بيدوه الحق ده!! يضرب صحابه في المدرسة؛ عادي تحت مُسمى الهزار ولعب الولاد عنيف ما أنتوا عارفين، يتناول على أمه في البيت؛ عادي ما هو سن المراهقة كده وربنا يعديه منها على خير! يعنف خطيبته؛ معلش أصله مضغوط وعازي يخلص الشقة بسرعة والفلوس مقصرة معاه! يهين مراته ويشتمها ويضربها؛ معلش أصلها هي الي استفزته وهو كان مضغوط في الشغل! يكسر عضم بنته ويسبلها تشوهات في جسمها ويدمر نفسيتها؛ معلش من حقه يخاف عليها ويربيها ما كله عشان مصلحتها..... إلخ!

ونفضل ندور في دايرة مقززة من المُبررات السخيفة! وكأن يوم القيامة البنات بيتحاسبوا لوحدهم والذكور طبعاً أنبياء معصومين من الخطأ أو ملايكة مُنزلين من فوق سبع سماوات! اتقوا الله في أولادكم وربوهم صح عشان لو ربوهم غلط؛ أنتوا أول المضرورين والله..



الذكر من دول طالع فاطر نفسه سوهر هيرو الي يقدر يعمل أي حاجة ودراعه سابق محنه ومدي لنفسه كل الحقوق أن خلّقه يبقى ضيق ومتعصب طووووول الوقت عشان محدش يجروّ يضايقه! وهو أصلاً على الله حكايته ولو طلع له برص وهو ماشي حيغمى عليه من الخوف! ولو دخل في مُشادة حقيقية مع زمايله أو ناس مايعرفهمش في الشارع؛ هو أول واحد حيخاف وينسحب ويلم الموضوع بحجة إن الشيطان دخل ما بيننا ووحّدوا الله يا جماعة! الجبن مسيطر عليه لدرجة إنه متأكد -بينه وبين نفسه- أنه كائن ضعيف فيمارس ضعفه على الأضعف منه عشان يحس بلذة الانتصار العبيط، كائن سادي بالفطرة ما شاء الله.. غليظ القلب والكل بينفر منه... وعلى فكرة كان يايده يحسّن من أسلوبه طالما كبر ونضج بما فيه الكفاية عشان يعرف الصح من الغلط والحلال من الحرام ويختار أسلوبه بنفسه بدل ما يفضل بردو طول عمره يرمي الغلط على شماعه أمه وأبوه الي ما أحسنوش تربيته وهو يا عيني كان نفسه يطلع إنسان سوي بس نعمل إيه بقي ده نصيب وخلاص الي حصل حصل!


الكارثة الثانية هي البنت بقي الي بيتعامل معاها أيّا كانت صلته بيها؛ بتقبلي الإهانة وقلة القيمة ليه يا سكر؟! صابرة وراضية بُناءً على إيه يعني؟! ربنا حرّم الظلم على نفسه وجعله بين العباد مُحَرَّمًا، لكنك بسكوتك ورضاك وخوفك من الرفض؛ حللت الظلم وظلمت نفسك وربنا حيسألك عن ده يوم الحساب! أنت شريكة في جريمه ضدك، إوعي تفتكري إنه الجاني

لوحده، أنتِ جنيتِ على نفسك قبل جنايته عليك! من أول حبة في العقد ما وقعت؛ جس نبضك وضربك على سبيل الهزار، فعديتها، فحبات العقد كلها انفرطت! والضرب بقى جد مش هزار والي يعرف أمه يروح يقولها! هو يمينك؛ فأنتِ تخافي تردي وتعتري، فهو يتمادى.. الإهانة بقت مد إيد، ومد الإيد بقى تكسير عضم وارتجاج في المخ وشروع في قتل! ونرجع بردو نلتمسله العذر؛ معلش أصلها هي الغلطانة ولولا أنها بدأت بالغلط ما كانش هو فقد أعصابه! أصله لما ييضرب وهو متعصب ماييحسش بنفسه معلش محدش يعصبه بقى!

أنتِ فاكِر بعد كل ده هي شايفاك راجل؟ أو ممكن تحبك وتحترمك! بالعكس أنتِ بالنسبة لها كائن حقير زعزع ثوابت الأمان بداخلها، فقد احترامه لنفسه واحترامها ليه، بقت تكرهه وتكره أنفاسك وصوتك وحتى المكان الي بيجمعها بيك حتى لو صدفة!

القوامة للرجال يالي المفروض إنك رجل على حسب ما أنتِ مفكر نفسك، والقوامة تكليف وواجبات عليك أداها، القوامة؛ حكمة في التصرف بالقول والفعل، إنك تعرف تحتوي الموقف، وتمسك أعصابك وقت الغضب وتستعيد بالله من الشيطان الرجيم لحد ما تهدى وترجع تتناقش بالمنطق وتحل المشكلة بالهدوء، وإلا فلا تحسب نفسك من الرجال.


"اتقي الله في نفسك ثم في أهل بيتك فيوم الحساب ستُسأل عن أفعالك طالما أنتِ بالغ عاقل!" ابقى قول لربك بقى معلش أصلهم هما الي استفزوني وأنا



خُلقي ضيق! ستندم ورب الكعبة يوم لا ينفع الندم.. فوق لنفسك يا ابن
الحلال قبل فوات الأوان، خليهم لما تموت يدعوك بالرحمة ويتصدقوا
عليك بدل ما يدعوا عليك: ربنا يرحمك مطرح ما روح! اتقي الله..
حتكون محتاج حسنة واحدة تقيك عذاب الله.. غلطك في حق ربك؛ ربك
الي بيغفره لو استغفرت وتُبت، لكن غلطك في حقهم؛ لازم هما الي
يغفروه ويسامحوك عشان ربنا يرحمك! استقم يرحمك الله.

من أهم سُبُل الحرية؛ إنك تكوني غاسلة إيدك من الناس تماماً،
ماتعتمدش على حد، ماتتوكليش على حد من الناس، توكل على ربك ورب
الناس، مش هتحتاجي حاجة من حد..

آه عارفة إن ربنا خلقنا مجتمعات عشان محدش هيعرف يعيش لوحده،
ومايتحاجش حاجة من حد! لكن للأسف لما تحتاجيهم، ومحدش يلبي
احتياجك، أو يلبوه بس بعد ما يساعدوك؛ يفضلوا يمتنوا عليك ويؤذوك
ويذلُّوا فيك؛ هتعرفي بعدها تعتمدي على الله وحده، وهو قادر يسخر لك
الناس الطيبة الي يلبوا حاجاتك بدون ما يعقبوها بمنّ وأذى.. حتى لو
عايزة كيس ملح؛ صلي وادعي واطلبي من ربك.. لو خلاص مصروف البيت
خلص وماعكيش فلوس؛ ماتطلبيش من اختك وصاحبتك وتفضلي
تشتكي همك للناس! ده مش معناه إن كل الناس وحشة! لا طبعاً.. حاشا لله،
لكن كل الناس عندها هموم ومش كل الناس هيخدموك بدون مقابل -إلا
من رحم ربي- أو على الأقل مش كل الناس فاضية لك 24 ساعة في اليوم! لو
سمعوك النهاردة؛ هيزهقوا من شكواك بكرة! لو ساعدوك مادياً مرة؛ مش
هيساعدوك مرة كمان! الإنسان بردو لازم يكون عزيز النفس،
ومايكونش تقيل على الناس، حتى لو طلب دعم معنوي؛ ماتفضلش
تزني على حد عشان يسمعك، ويفضى لك، ويركز معاك وكل ما تحتاجيه



تلاقية! طبيعة الإنسان؛ ملول، فماتخليش حد يملّ منك، أو يبجي عليهم وقت؛ يشوفوا اسمك على موبايلهم بتتصلي ويتأفقوا منك! (لسان حالهم: دي بتقعد ترغي بالساعات وتشتكي وأنا مش ناقصة!)

كل واحد عنده هم وكرب، الدنيا مش بتصفى لحد أبدأ، ربنا خلقنا جميعاً عندنا ابتلاءات، واحد بيخلص والابتلاء الي بعده بيبدأ، والحمد لله على كل ابتلاء يبجي يخفف عنا ذنوبنا ويقربنا لله أكثر، لولاه لربما كنا هنبقى منشغلين عن ذكر الله والفروض والطاعات، فهو سبحانه الله بيكون في حكمة منه..

ادعي ربك.. حافظي على الصلة الي بينك وبينه، الحبل الموصول بالصلاة والدعاء، اقعدي كده في صلاتك بعد التشهد وقبل التسليم، أو بين الأذان والإقامة، أو في السجود أو وقت المطر، دي كلها أوقات استجابة الدعاء، أو حتى لو عندك عذرك الشهري؛ بصي للسما وأنت متوضية واقفي في اتجاه القبلة، واتكلمي مع ربك، هو شايفك وسامعك وحاسس بيك، اقعدي احكيه بدل ما تحكي لصاحبتك وجعك وتزوّدي همّها، فضفضي له لوحده، اتكلمي معاه كثير وادعي لنفسك ولأهلك ولكل الناس.. ادعي أنه يفرج كربك وينقّس همّك، فوّضي له أمورك كلها، هو هيدبرها أحسن تدبير..

لو لسه طالبة؛ ادعي ربك ييسر عليك المواد والاختبارات ويوفّقك لما يجب ويرضى.. لو لسه ما اتجوزتيش؛ ادعي ربك يرزقك بالزوج التقي الصالح ويرزقك منه الذرية التقيّة الصالحة، أو ادعي له يهدي لك أولادك ويحفظهم


ويبارك لك فيهم، بدل ما تدعي عليهم أو تضربهم وتشتيمهم وتسوي نفسيتهم!

ربك هو صاحبك وحبيبك.. اعملي بينكم صلة سرية وعلاقة خاصة، وصداقات وصلوات ودعوات في الخلوات، محدش من البشر يعرف عنها حاجة حتى أقرب الناس ليك.

لما هتصلحي علاقتك بالله، هيصالح علاقتك بكل الناس، ربنا لو حبك، هيحبب فيك خلقه وهيحفظك من كل حاقد شامت حاسد عدو ليك، ولو كرهك هيكركه فيك خلقه ويسلط شر خلقه عليك!

عن أبي هريرة رضي الله عنه قال: قال رسول الله صلى الله عليه وسلم: "إِنَّ اللَّهَ إِذَا أَحَبَّ عَبْدًا دَعَا جِبْرِيلَ فَقَالَ: إِنِّي أُحِبُّ فُلَانًا فَأُحِبُّهُ، قَالَ: فَيُحِبُّهُ جِبْرِيلُ، ثُمَّ يُنَادِي فِي السَّمَاءِ فَيَقُولُ: إِنَّ اللَّهَ يُحِبُّ فُلَانًا فَأُحِبُّوهُ، فَيُحِبُّهُ أَهْلُ السَّمَاءِ، قَالَ ثُمَّ يُوضَعُ لَهُ الْقَبُولُ فِي الْأَرْضِ، وَإِذَا أَبْغَضَّ عَبْدًا دَعَا جِبْرِيلَ فَيَقُولُ: إِنِّي أَبْغَضُّ فُلَانًا فَأَبْغِضْهُ، قَالَ فَيُبْغِضُهُ جِبْرِيلُ، ثُمَّ يُنَادِي فِي أَهْلِ السَّمَاءِ إِنَّ اللَّهَ يُبْغِضُ فُلَانًا فَأَبْغِضُوهُ، قَالَ: فَيُبْغِضُونَهُ، ثُمَّ تَوْضَعُ لَهُ الْبُغْضَاءُ فِي الْأَرْضِ.

صدق رسول الله صلى الله عليه وسلم.




تَحْيَلِي بِحَبْكِ رَبِّنَا وَأَهْلِ السَّمَاءِ وَالْأَرْضِ؟! فِي حُرِّيَّةٍ بَعْدَ كَدِّهِ؟
التَّسْلِيمَ لِلَّهِ وَتَفْوِضَ الْأُمُورِ لَهُ وَحْدَهُ؛ هُوَ فِي حَدِّ ذَاتِهِ حَرِيَّةٌ..
حَاجَتَكَ عِنْدَهُ لَوْحَدِهِ سَبْحَانَهُ مَشْ عِنْدَ حَدِّ، وَهُوَ سَبْحَانَهُ قَادِرٌ يَسْخَرُ لَكَ
الْكُونُ كُلَّهُ، وَيَقْوَى عِلَاقَتَكَ بِأَصْدِقَائِكَ الطَّيِّبِينَ، وَيَمْنَعُ عَنْكَ شَرَّ أَعْدَائِكَ
الْخَبِيثِينَ..

رَبِّكَ الْوَحِيدَ هُوَ الْإِلَهِ مَشْ هَتَحْتَاجِي تَسْتَأْذِنِيهِ قَبْلَ مَا تُرَوِّحِيهِ تَتَكَلَّمِي مَعَهُ!
مَشْ هَتَحْتَاجِي تَسْأَلِيهِ: أَنْتَ فَاضِي وَلَا مَشْغُولُ! هُوَ سَبْحَانَهُ سَامِعُكَ فِي أَيِّ
وَقْتٍ وَكُلِّ وَقْتٍ، سَبْحَانَهُ لَا يَغْفُلُ وَلَا يَنَامُ، مَشْ هَتَحْتَاجِي مِنْهُ لَمَّا تَكَلِّمِيهِ
وَتَصَلِّيَ وَتَدْعِي لَهُ فِي وَقْتٍ مُتَأَخِّرٍ، بَلْ بِالْعَكْسِ.. ذَهْ وَقْتُ السَّحَرِ دَهْ سِحْرُ
حَقِيقَتِي وَكَزْرُ، بِيَقْرَبُ الْعَبْدَ بَرِيهِ، وَبِيَقْوِي الصَّلَاةَ بَيْنَكَ وَبَيْنَهُ جَدًّا، خُصُوصًا
فِي صَلَاةِ الْقِيَامِ، حَتَّى لَوْ رَكَعَتَيْنِ بَسْ، بِخُشُوعٍ، بِيَقِينٍ، صَلِّيْ وَادْعِي وَابْكِي
وَاطْلُبِي مِنْهُ كُلَّ الْإِلَهِ يَخْطُرُ عَلَى قَلْبِكَ، ابْكِي لِحَدِّ مَا تَغْسِلِي رُوحَكَ وَتُطَهِّرِي
قَلْبَكَ بَيْنَ إِيْدِيهِ سَبْحَانَهُ..

لَمَّا بَتَقُولِي: "حَسْبِيَ اللَّهُ وَنَعْمَ الْوَكِيلُ" لَمَّا تَحْسِي بِالظُّلْمِ وَالْقَهْرِ، أَنْتَ بَكْدَه
مَشْ بَتَدْعِي عَلَى حَدِّ، زِي مَا نَاسٍ كَثِيرٍ فَاهِمِينَ -لِلْأَسْفِ-، بَلْ أَنْتِ بَتَنْقَلِي
مَلْفَ قَضِيَّتِكَ لِلْحَكَمِ الْعَدْلِ، مَالِكَ السَّمَاوَاتِ وَالْأَرْضِ، لِأَنَّهُ هُوَ الْوَحِيدُ
الْإِلَهِ قَادِرٌ يَحْلُ مُشْكَلَتَكَ بَيْنَ طَرَفَةِ عَيْنٍ وَانْتِبَاهَتِهَا؛ يَغَيِّرُ اللَّهُ مِنْ حَالٍ إِلَى
حَالٍ! بِشَرْطٍ؛ مُمْنُوعُ التَّجَرُّبَةِ مَعَ اللَّهِ! الْمَعَامَلَةُ بَيْنَكَ وَبَيْنَ رَبِّكَ هَتَكُونُ
بِيَقِينٍ تَامٌ.. هَتَفُوضِي أُمُورَكَ لِلَّهِ وَتَرْتَاخِي وَتَتَنَجَّى تَمَامًا وَتَنْسِي الْمَوْضُوعَ لِحَدِّ

ما يتحل، ورب الكعبة هيحل كل مشاكلك طالما شايفك بتسعي للحل، لأن في فرق بين التوكل والتوكل.. خدي بالأسباب واسعي وسيبيها لله.. هيدبر لك أمورك، هيرزقك بالي أنت محتاجاه، مش الي أنت عايزاه! لأن مش شرط الي أنت عايزاه؛ يكون خير ليك! هو الحكيم العليم بذات الصدور.. لما بنقول: "فوضنا أمورنا لله" نخط نقطة (.) ونقفل السطر. ما نروحش لحد ونفضل ندور على حد يحل المشكلة! خلاص احنا فوضناها لله الكبير العظيم الذي لا يغفل ولا ينام، لكن احنا هنام مرتاحين مش هنفكر ولا نقلق ولا نخاف، وقبل ما نصحى؛ هتكون اتحلت بإذن الله تعالى، مسألة وقت.. ده مش لأنه مش قادر يحلها بسرعة! استغفر الله وحاشا لله.. لكن الوقت ده احنا بنتربى فيه، وبفضل ندعي ونقرب منه سبحانه أكثر، قربنا بيحب يشوف ضعفنا بين إيديه، ويسمع صوت دعائنا ورجائنا، ويختبرنا؛ هل لو طال الابتلاء احنا هنزهق ونملّ ونروح لغيره نطلب المساعدة؟ ولا بردو هنفضل نخط على بابه لوحده؟ هل هنفضل ندعي ونصلي كل يوم بنفس الحماس، بنفس اليقين؟ ولا هنروح لغيره نطلب المدد؟! زي ما في ناس كثير للأسف بتشرك بالله ويروحوا لمقابر الأولياء الصالحين ويفضلوا يطلبوا منهم حاجاتهم، طالما ربنا اتأخر عليهم فيشوفوا حل بعيد عنه! استغفر الله.. للأسف.. كل ده ضعف وقلة إيمان، وجهل وشرك بالله! حاجاتنا عند الله وحده، حتى القدر يتغير بالدعاء والإلحاح بيقين.



كل ما هتكوفي قريبة من ربك؛ ده هيجررك من الناس.

يا حواء.. أنت هدية من الله لسيدنا آدم.. كان عايش لوحده في الجنة، له ما يشتهي من النعم، ورغم ذلك مش حاسس بالأُنس.. ربنا خلقتك من ضلعه الأيسر عشان تبقي منه وقريبة من قلبه، وتعيشوا السكن والمودة والرحمة في حضن بعض، تحتاجوا لبعض فتلجؤوا لبعض فيزيد حُبكم واحترامكم لبعض..

وخلق لكل آدم؛ حواء من ضلعه، ما أكرمها إلا كريم، وما أهانها إلا لئيم. أتمنى أن تكون رسالتي من الكتاب وصلت، وكل آدم يتقي ربه في حوائه.. وكل حواء تصون آدمها لله..

شكراً للأحرار والحرائر الي وصلوا معايا لهذا.

وأخيراً.. كلمتي للرجل.. للرجل بمعنى الكلمة، اقرأ الكتاب بحيادية تامة، وهاته لزوجتك، وأمك وأختك وبنتك ومرات أخوك ونساء بيتك، كن سبب في إدراكهن وزيادة وعيهن.. اترك كل أفكارك جانباً واقرأ بعين الإنصاف والعدل

لأن الكتاب ده غير مُصنّف لكل مَنْ يؤمن بأفكار موروثه خاطئة عفى عليها الزمن ولا تناسب العصر الحالي!
هذا الكتاب يُحفظ بعيداً عن مُتناول أيدي الذكور وأشباه الرجال!
اقرؤوا.. افتحوا عيونكم الثالثة، شوفوا بالبصيرة، اكسروا أصنامكم، صححوا مفاهيمكم، وناقشوني بالمنطق..

الزهران درويش



للتواصل مع الدار

المعارض



التعاقدات



مسابقات

طلب إصدارات



الصفحة الرسمية

التوزيع



الإعداد

